

PANATURAN

Nama Proyek: Panaturan
Basis Proyek: Panaturan (1985), Panaturan (2004)
Lisensi: Creative Commons
Versi: 1 (13 Juni 2015 – 13 Oktober 2015)
Umpan Balik: ulazan@icloud.com



Ulazan, 2015

Hak cipta milik Ranying Hatala.
Semua orang bebas menyiarkan Panaturan.

Panaturan disebarluaskan di bawah Lisensi Creative Commons Atribusi-BerbagiSerupa 4.0 Internasional. Untuk melihat salinan lisensi ini, kunjungi <http://creativecommons.org/licenses/by-sa/4.0/>.

*Mohon jangan mengganti atau menghilangkan atribut kami.
Sertakan halaman ini pada setiap salinan.*

Cetakan I, 2015
Cetakan II, 2016

Penggunaan Diakritik

Grave (`)

Kata	Terjemah
Ayumù	Milikmu
Ayungkù	Milikku
Kamangata`	Nikmatnya
Pangkasulakà	Pertama

Macron (¯)

Kata	Terjemah
Mate	Mata
Matē	Matanya
Indu	Ibu
Indū	Ibunya

Acute (´)

Kata	Terjemah
Balau	Lapar
Balaú	Rambut
Sarai	Selagi, mumpung
Saraí	Serai (tumbuhan)

Daftar Isi

Penggunaan Diakritik.....ii	
Grave (`).....ii	
Macron (¯).....ii	
Acute (´).....ii	
Panaturan Kutak Sangiang.....1	
1 Tamparan taluh handiaí.....1	
2 Ranying Hatala manjapa petak, langit, bulan, bintang, matan andaú, tuntang taluh huangà, hayak mambagi kakaput umba kalawa.....2	
3 Bukit Hintan hasahantak umba Bukit Bulaú.....3	
4 Bukit Hintan umba Bukit Bulaú hasahantak tinaí.....5	
5 Garing lalunjung pulang tuntang kumpang duhung pajanjuri bungking kayu erang tingang.....9	
6 Manyameí Tunggul Garing Janjahunan Laut Sahawung Tangkuranan Hariran ewen due Kameluh Putak Bulaú Janjulen Karangan Limut Batu Kamasan Tambun hasembang tanduk...11	
7 Kameluh Putak Bulaú Janjulen Karangan pajanjuri dahā je sulakà.....13	
8 Kameluh Putak Bulaú Janjulen Karangan pajanjuri dahā je kaduē.....14	
9 Kameluh Putak Bulaú Janjulen Karangan pajanjuri dahā je katelū.....14	
10 Kameluh Putak Bulaú Janjulen Karangan pajanjuri dahā je kaepatà.....15	
11 Kameluh Putak Bulaú Janjulen Karangan pajanjuri dahā je kalimē.....16	
12 Kameluh Putak Bulaú Janjulen Karangan pajanjuri dahā je kajahawenà.....17	
13 Kameluh Putak Bulaú Janjulen Karangan pajanjuri dahā je kaujū.....18	
14 Kameluh Putak Bulaú Janjulen Karangan pajanjuri dahā je kahanyā.....19	
15 Kameluh Putak Bulaú Janjulen Karangan pajanjuri dahā je kajalatiènà.....19	
16 Kameluh Putak Bulaú Janjulen Karangan pajanjuri dahā je kasapuluhà.....19	
17 Kameluh Putak Bulaú Janjulen Karangan pajanjuri dahā je kasawalasà.....20	
18 Kameluh Putak Bulaú Janjulen Karangan pajanjuri dahā je kaduewalasà.....20	
19 Manyameí Tunggul Garing Janjahunan Laut hakaja pating umba Kameluh Putak Bulaú Janjulen Karangan.....21	
20 Kameluh Putak Bulaú Janjulen Karangan Limut Batu Kamasan Tambun handiwung kanyurung pusu, pandung bapangku anak.....23	
21 Taluh je injadian awi Ranying Hatala limbah Kameluh Putak Bulaú Janjulen Karangan luas anakà.....25	

22 Raja Bunu dia tau baseput barigas hakananan pantar pinang	25
23 Raja Sangen, Raja Sangiang, tuntang Raja Bunu inuah.....	27
24 Raja Sangen, Raja Sangiang, tuntang Raja Bunu kanuah gajah bakapek bulaú unta hajaran tandang barikur hintan.....	28
25 Raja Sangen nanturung Bukit Bulaú Kangantung Gandang, Kereng Rabia Nunyang Hapalangka Langit.....	32
26 Raja Sangiang nanturung Bukit Bulaú Kangantung Gandang, nyahendeng Kereng Rabia Nunyang Hapalangka Langit.....	34
27 Raja Bunu nanturung Bukit Bulaú Kangantung Gandang, nyahendeng Kereng Rabia Nunyang Hapalangka Langit. .	35
28 Raja Bunu inyundaú awi Anguí Bungaí Mama Lengái Tingang.....	37
29 Ranying Hatala maningak mameteh Raja Bunu.....	41
30 Nyai Endas Bulaú Lisan Tingang maatuh kabalumā belum.....	42
31 Ranying Hatala janjaruman kahandakà umba Manyameí Tunggul Garing Janjahunan Laut.....	48

32 Ranying Hatala janjaruman akan panakan Raja Bunu auh jalan ewen buli haluli manalih Iē	50
33 Malalus tiwah suntu.....	51
34 Ewen Lewu Bukit Batu Nindan Tarung kanuah pantar bulaú sulep ikuh tambun.....	52
35 Raja Bunu ewen hanak hajarian mamungkat arepā bara Lewu Bukit Batu Nindan Tarung, mangkalewu intu Lewu Bukit Tambak Raja.....	54
36 Uluh Lewu Bukit Batu Nindan Tarung sama manandang petak mampar buang ekā mangkalewu intu Pantaí Danum Sangiang.....	56
37 Ranying Hatala malaluhan Raja Bunu ewen hanak hajarian nanturung Tantan Bukit Samatuan.....	62
38 Lewu Bukit Batu Nindan Tarung limbah uluh are babungkat.....	64
39 Ranying Hatala mambagi ungkup panakan Raja Bunu manyuang Pantaí Danum Kalunen.....	66
40 Mangku Amat Sangen ewen due Nyai Jaya Sangiang saluh sawak bambang penyang.....	67
41 Bawi Ayah hadurut bara Lewu Telu nanturung Pantaí Danum Kalunen.....	72

Panaturan Kutak Sangiang

1 Tamparan taluh handiaí

1 Hemben huran, tutuk panambalun tambun, baya je atun Iē je katamparan taluh handiaí. Jaí panapatuk sukup simpan, hasambalut umba ambun je dia bajahuntun tanduk, basakupa dengan enun isen baterus kening, hinje hasambalut umba kahain kuasā, belum japa jimat maharing.

2 Iē je tamparan taluh handiaí, mukeí kahain kuasā. Jaí panapatuk sukup simpan, murai japa jimat tanteng. Hayak auh nyahu batengkung ngaruntung langit homboh malentar kilat basiring hawun, palus ambun je dia bajahuntun tanduk, enun basansinep isen baterus kening, badandang manjadi balawa hayak barasih, lenda-lendang, linge-lingeí, hayak Iē hamauih mananggare arepā:

Aku tuh Ranying Hatala, mijen Balaí Bulaú Napatah Hintan, Balaí Hintan Napatah Bulaú, mijen Tasik Malambung Bulaú, marung Laut Bapantan Hintan. 3 Aku tuh Ranying Hatala je paling kuasa, tamparan taluh handiaí tuntang kahapus, tuntang kalawa jetuh iete kalawa pabelum je inanggare'kù gangguranan arā bagare Hintan Kaharingan.

4 Bara balaí āi te Ranying Hatala hadurut nanturung tantan Bukit Bulaú Kangantung Gandang, malentar nyahendeng tahanjungan Kereng Rabia Nunyang Hapalangka Langit intu Batang Danum Mendeng Ngatimbung

Langit, mijen Guhung Tenjek Nyampalak Hawun. 5 Intu hete Iē nyantah bulaú balawan tanduk, tampajahan sambil ngantau, Jaí niling rabia rantunan kening, nureng ulang pajambile, eleh benyem nyalantinau buang. Mariaṛa tinaí bulaú balawan tanduk nuntun hila ngiwa, hete taratuntū atun ampin pahaliar tingang je sama kilaú Iē. 6 Ranying Hatala nuntun pahaliar tingang, nureng nyababeneng tanduk, handung katawā jete puna pahalingeí Bitī, hayak Iē mananggare gangguranan arā bagare Jata Balawang Bulaú Kanaruhan Bapager Hintan, mijen Papan Malambung Bulaú, marung Laut Bapantan Hintan. 7 Katahanan kahain kuasan Ranying Hatala, te Jata Balawang Bulaú palus kalimpangan pahapang Papan Malambung Bulaú, timbul homboh Bapantan Hintan, nanturung Bukit Bulaú Kangantung Gandang, nyahendeng Kereng Rabia Nunyang Hapalangka Langit. 8 Mijen tantan Bukit Bulaú Kangantung Gandang, maharung tahanjungan Kereng Rabia Nunyang Hapalangka Langit, hete Jata Balawang Bulaú mendeng nandaí Ranying Hatala. 9 Sana ewen sintung due hasembang bulaú balawan tanduk, Ranying Hatala tuntang Jata Balawang Bulaú hasambewa rabia rantunan kening mijen tantan Bukit Bulaú Kangantung Gandang, marung tahanjungan Kereng Rabia Nunyang Hapalangka Langit. Palus japa-japan tatah, jima-jimat tanteng, Ranying Hatala manjapa langit, petak, bulan, bintang, matan andaú, palus kakare taluh handiaí akan puatā.

10 Eleh lungang-linguk pating sumping, pulang-pilik rabia junjung,

hanjak rantang pahalawang huang, rindang pahateluk kalingu, nunjung kumin tingang dia lunuk ngarangka, hiram tambun isen baras ngalimbang, Jata Balawang Bulaú nahingan pahariwut raweí Ranying Hatala. **11** Hete Ranying Hatala mukeí kahain kuasā belum, muraí japa jimat maharing, kalute kea Jata Balawang Bulaú mukeí kamait kajayā.

2 Ranying Hatala manjapa petak, langit, bulan, bintang, matan andaú, tuntang taluh huangā, hayak mambagi kakaput umba kalawa

1 Bara tantan Bukit Bulaú Kangantung Gandang, bahanjung tahanjungan Kereng Rabia Nunyang Hapalangka Langit, Ranying Hatala mukeí kahain kuasā, nampaurāi japa jimat tanteng. **2** Hete Ranying Hatala haduanan panataú sarumpah bulaú palus maandakā huang kabuang tanjung ambun. Hayak auh nyahu batengkung ngaruntung langit homboh malentar kilat basiring hawun, panataú sarumpah bulaú basaluh manjadi naga hai galang petak. Kalute Ranying Hatala manjadian kahandakā je sulakā.

3 Limbah te tinaí Ranying Hatala haduanan panataú lawung singkap antang palus mambirangā hunjun naga hai galang petak. Hayak auh nyahu batengkung ngaruntung langit homboh malentar kilat basiring hawun, panataú lawung singkap antang basaluh manjadi petak sintel habalambang tambun, liang deret habangkalan karangan. **4** Hayak te kea huang hunjun petak sintel habalambang tambun, liang deret habangkalan karangan hakaliling atun tasik, batang danum, tuntang atun taluh

tumbu, belum hunjun petak, kalute kea huang danum. Kalute Ranying Hatala manjadian kahandakā je kaduē.

5 Ranying Hatala haduanan panataú ranying pandereh bunu, Iē manejekā huang bentuk tasik lumbah, hayak auh nyahu batengkung ngaruntung langit homboh malentar kilat basiring hawun, panataú ranying pandereh bunu basaluh manjadi batang haring, hayak Iē mananggare jete bagare Batang Kayu Janji. Kalute Ranying Hatala manjadian kahandakā je katelū.

6 Bara tantan Bukit Bulaú Kangantung Gandang, bahanjung tahanjungan Kereng Rabia Nunyang Hapalangka Langit, Ranying Hatala nuntun kakare kahandakā je jadi injadiā. Iē haduanan tinaí peteng liung lingkari tali wanang, palus maandakā kea huang bentuk tasik lumbah. **7** Hayak nyaluh awi auh nyahu batengkung ngaruntung langit homboh malentar kilat basiring hawun, panataú peteng tiung lingkari tali wanang basaluh manjadi tambun hai nipeng pulau pulu. Kalute Ranying Hatala manjadian kahandakā je kaepatā.

8 Limbah te Ranying Hatala tuntang Jata Balawang Bulaú mantar pinang hanjenan kapantar, nyipa ulang nantali tanteng endas bulaú pulu batanjung henda, minyip rukun tarahan, eleh lungang-linguk bulaú pating sumping, pulang-pilik rabia junjung. **9** Kalute Ranying Hatala palus maandak tantauyas pinang tuntang puting rukun tarahan huang kabuang tanjung ambun. Hayak auh nyahu batengkung ngaruntung langit homboh malentar kilat basiring hawun, panataú juhun pinang kajadian manjadi tingang hai nipeng randung banama tuntang

panataú tantauyas pinang kajadian
manjadi antang, uras mijen Pukung
Pahewan Antang, kalute kea panataú
puting rukun tarahan kajadian manjadi
tambarirang hai marung singkap langit.
Kalute Ranying Hatala manjadian
kahandakà je kalimē.

10 Limbah te tinaí hayak auh nyahu
batengkung ngaruntung langit homboh
malentar kilat basiring hawun, Ranying
Hatala manjapa langit, bulan, bintang,
tuntang matan andaú, hete palus atun
langit, bulan, bintang, tuntang matan
andaú, hayak paham lenda-lendang,
linge-lingeí barasih haliaí. Kalute
Ranying Hatala manjadian kahandakà
je kajahawenà.

11 Kalawa je barasih lenda-lendang,
linge-lingeí, hayak atun petak, langit,
bulan, bintang, matan andaú, kalute kea
tasik, batang danum, palus taluh je
belum hunjun petak, huang danum,
tuntang penda langit. **12** Ranying
Hatala mambagi kalawa, hayak Iē
manyewut kalawa jete handaú, kaput
jete inyewut hamalem, palus kea Iē
maandak petak tumun ekā, danum
tumun ekā, kalute kea langit, bulan,
bintang, tuntang matan andaú tumun
ekā. Kalute Ranying Hatala manjadian
kahandakà je kaujū.

13 Limbah Ranying Hatala manjadian
kakare kahandakà je jadi te, Iē hamauih
umba Jawa Balawang Bulaú kuā:

| *Naraí taluh gawingkū je hindaí?*

14 Riwt raweí Jawa Balawang Bulaú
tumbuh, salatan tisui kanaruhan
bapager hintan hamauih kuā:

| *Taluh handiaí te sukup, bilang
uras atun, baya hindaí genep.*

15 Ranying Hatala hamauih tinaí kuā:

| *Kilen jakā Aku nabasan ulun
kalunen hatamunan arepkū?*

16 Hanjak rantang pahalawang huangà,
rindang pahateluk kalingū dia lunuk
ngarangka, isen hirim tambun baras
ngalimbang, Jawa Balawang Bulaú
nahingan riwt raweí Ranying Hatala.

17 Limbah te Ranying Hatala gandang
halalian buli nanturung Balaí Bulaú
Napatah Hintan, Balaí Hintan Napatah
Bulaú mijen tantan Bukit Hintan.
Kalute kea Jawa Balawang Bulaú
nyahendeng Papan Malambung Bulaú,
Laut Bapantan Hintan, nyaiawi
tahanjungan Bukit Bulaú. **18** Bara hete
ewen sintung due uras hanjak rantang
pahalawang huangà, rindang pahateluk
kalingū, hayak japa-japan tatah, jima-
jimat tanteng palus hasahantak Bukit
Hintan umba Bukit Bulaú.

3 Bukit Hintan hasahantak umba Bukit Bulaú

1 Kalute kakare taluh handiaí uras
manjadi aui kahain kuasan Ranying
Hatala tuntang kajayan Jawa Balawang
Bulaú. **2** Yē japa-japan tatah, jima-jimat
tanteng Ranying Hatala tuntang Jawa
Balawang Bulaú. Hayak auh nyahu
batengkung ngaruntung langit homboh
malentar kilat basiring hawun, palus
Bukit Hintan hasahantak umba Bukit
Bulaú. **3** Hete pahalendang Bukit
Hintan palus hasambalut umba
pahalendang Bukit Bulaú. Hayak auh
nyahu batengkung ngaruntung langit
homboh malentar kilat basiring hawun,
palus kajadian manjadi Raja Uju. **4** Yē
Ranying Hatala tuntang Jawa Balawang
Bulaú mananggare gangguranan aran
Raja Uju te bagare Raja Uju

Hakanduang Kanaruhan Hanya Basakati.

5 Nduan kauju andaú kauju alem,
Ranying Hatala malawu riwut raweí:

Awi ketun sintung uju nahingan pahariwut raweí'kù janjaruman taluh akan ketun. 6 Basa Aku tuh Ranying Hatala je manjadian ketun sintung uju, tuntang Aku handak mananggare gangguranan aran ketun, hayak janjaruman ampin kare taluh je akan inggawi awi ketun, palus janjaruman kea batang danum eka ketun sintung uju mijen.

7 Sana ewen sintung uju manahingan riwut raweí Ranying Hatala kalute, te palus ewen manukep tuntang manyeneh riwut raweí Ranying Hatala mananggare gangguranan aran ewen sintung uju, hayak te kea Ranying Hatala nyabutan gangguranan aran ewen sintung uju iete bagare Janjalung Tatu Riwut, Gambala Rajan Tanggara, Sangkaria Nyaru Menteng, Raja Tuntung Tahaseng, Tamanang Taraí Bulan, Raja Sapanipas, tuntang Raja Mise Andaú. 8 Limbah te hamauih tinaí Ranying Hatala umba ewen sintung uju kuā:

Tuh Aku handak janjaruman eka ketun sintung uju mijen palus kakare taluh je inggawi ketun mangat ketun sintung uju katawā hayak malalusà. 9 Bitim Janjalung Tatu Riwut, akam tantaí manantuani riwut barat je ihapan awi ulun kalunen dapit jeha amun ulun kalunen balaku umba ikaú. Palus ekam mijen iete bagare Batang Danum Mendeng Mahejan Langit, Guhung Tenjek

Makang Liu, Tasik Gandang Ngarambang Nyahu, Laut Tuwung Hambalat Kilat. 10 Bitim Gambala Rajan Tanggara, gawin ayum sama kilaú gawin Janjalung Tatu Riwut, akam tantaí manantuani riwut barat. Palus kea ekam mijen iete huang Batang Danum Mendeng Mahejan Langit, Guhung Tenjek Makang Liu, Tasik Gandang Ngarambang Nyahu, Laut Tuwung Hambalat Kilat. 11 Bitim Sangkaria Nyaru Menteng, gawin ayum tantaí manantuani nyahu kilat, tuntang ekam mijen iete intu Batang Danum Mendeng Mahejan Langit, Guhung Tenjek Makang Liu, Tasik Gandang Ngarambang Nyahu, Laut Tuwung Hambalat Kilat. 12 Bitim Raja Tuntung Tahaseng, ekam mijen intu Batang Danum Banyahu Bulaú, tukep Bukit Tunjung Marakunjung Aseng Panjang. Gawin ayum iete akam mite untung aseng ulun kalunen dapit jeha awang je tapas atawā kurang asengà. Kalute kea amun ulun kalunen balaku aseng panjang umba ikaú, sahelu bara ikaú manenga akan ulun kalunen, te ikaú janjaruman akangkù helu. 13 Ikaú Tamanang Taraí Bulan, gawin ayum tantaí manantuani kare paramun panataú ulun kalunen je dinun awi, hayak je jadi dia tau hapan awi katahī, kareh huang katika iē buli Aku, hete ramu-ramuā te halalian akā. Tuntang ekam mijen iete Batang Danum Baputi Nahajulen Tepung. 14 Bitim Raja Sapanipas, ekam mijen iete intu Bukit Batipas Bara Putting Lumpung Matan Andaú.

*Gawin ayum tantaí mahaga kiham batu tingkes uju hatuntung, kabentengan Batang Danum Banyahu Bulaú, hayak akam manantuani tuntang mahaga untung aseng ulun kalunen dapit jeha. Awang je batipas akam mangambuah. **15** Kalute kea ikaú Raja Mise Andaú, ekam mijen iete Bukit Bulaú Kangantung Gandang, Kereng Rabia Nunyang Hapalangka Langit. Gawin ayum iete akam tantaí manantuani atawā mise andaú tuntang mise alem akan ulun kalunen je sampai janji atawā katikā buli hinje Aku.*

16 Limbah ewen Raja Uju Hakanduang mandinun gawi tuntang ekā mijen bara Ranying Hatala, te ewen sama bilang bambulungan tambang mananturung eka je jadi inukas awi Ranying Hatala.

17 Tinaí amun ewen Raja Uju Hakanduang uras jadi sembang ekā mijen tumun je inukas awi Ranying Hatala, hete ewen sama malalus kakare gawī.

18 Limbah kakare kajadian kalute Ranying Hatala mangahandak tinaí iete palus hasahantak Bukit Hintan umba Bukit Bulaú. Hayak auh nyahu batengkung ngaruntung langit homboh malentar kilat basiring hawun, te pahalendang Bukit Hintan tuntang Bukit Bulaú palus kajadian manjadi bawi sintung uju, tuntang ewen te inanggere gangguranan arā awi Ranying Hatala bagare Bawi Kameluh. Kalute ampin gawin Ranying Hatala akan ewen Bawi Sintung Uju. **19** Ranying Hatala mananggere hayak nyabutan gangguranan aran Bawi Kameluh sintung uju te bagare Kameluh Selung Untung, Kameluh

Selung Buhul, Kameluh Selung Bulan, Kameluh Selung Bintang, Kameluh Selung Daha, Kameluh Timbang Tambangan Daha, tuntang Kameluh Timbang Tambangan Nyahu. **20**

Limbah te tinaí Ranying Hatala manyahuan ewen Raja Uju Hakanduang manalih Bawi Sintung Uju, hayak janjaruman peteh Ranying Hatala akan ewen Bawi Sintung Uju, kalute kea eka ewen mijen tuntang kakare gawī. **21** Limbah te Bawi Kameluh sintung uju sama buli ekā mijen tumun je jadi iatuh awi Ranying Hatala hajamban Raja Uju Hakanduang. Eka ewen mijen iete intu batang danum je uras manumbang intu Tasik Malambung Bulaú, Laut Bapantan Hintan.

22 Kalute kahandak Ranying Hatala tuntang Jata Balawang Bulaú maatuh manjadian kakare taluh handiaí bara katamparā palus manjadi atun.

4 Bukit Hintan umba Bukit Bulaú hasahantak tinaí

1 Ranying Hatala puna pangkahai kuasa. Hete kakare kahandakā uras mahapan kuasā. Yē hasahantak tinaí Bukit Hintan umba Bukit Bulaú.

2 Nduan kauju andaú kauju alem, pahalendang Bukit Hintan basalupu mijen huang pahalendang Bukit Bulaú. Hayak auh nyahu batengkung ngaruntung langit homboh malentar kilat basiring hawun, pahalendang Bukit Hintan tuntang Bukit Bulaú te palus kajadian manjadi ije biti bawi kangumban sinjang tuntang ije biti hatue kanampan bunu. **3** Sana hatue kanampan bunu tuntang bawi kangumban sinjang te atun, ampī ewen

due paham mahamen hayak mikeh tutu umba Ranying Hatala awi ewen sintung due jatun rangkan pakaian simpan. **4** Ranying Hatala jadi handung hakatawan panalatai. Hemben te Iē nyahuan Jata Balawang Bulaú hajalukan rangkan pakaian simpan akan ewen sintung due, palus nyahuan ewen sintung due mangkang ngangkanā. **5** Jata Balawang Bulaú haduanan rangkan pakaian simpan te bara Ranying Hatala, palus hajalukā tinaí akan ewen sintung due mangkang ngangkanan bitī. **6** Limbah ewen sintung due mangkang ngangkanan bitī, je hatue kanampan bunu eleh mangkang barangkap kilaú kanyukah kumpang, mangku bariun ruwan kanyahungker pulang, je bawi kangumban sinjang mangkang barangkap kilaú bulan babangkang langit, mangku bariun tingkah pahawang batenteng hawun. **7** Hemben te kea ewen sintung due manaharep Ranying Hatala tuntang katika jete ewen sintung due atun manuntun Jata Balawang Bulaú mendeng nandaí Ranying Hatala mijen tantan Bukit Bulaú Kangantung Gandang, marung tahanjungan Kereng Rabia Nunyang Hapalangka Langit. **8** Hete Ranying Hatala mameteh ewen sintung due kuā:

*Aku tuh Ranying Hatala ain ketun sintung due. Jatun Ranying Hatala beken bara Aku. **9** Tinaí gangguranan aram ikaú je hatue kanampan bunu iete bagare Manyameí Malinggar Langit, tuntang je bawi kangumban sinjang iete bagare Kameluh Bajarumat Hintan. **10** Hetuh aku maatuh kakare gawi akan ketun sintung due. Ketun sintung due mahaga hayak manguasa kakare*

*taluh handiaí je jadi injadian awi'kù, sama kilaú Aku jadi manjadian tuntang mahaga ketun sintung due. **11** Sinde tinaí Aku mameteh ketun sintung due, Aku tuh Ranying Hatala ain ketun sintung due, kalute kea dapit jeha akan ulun kalunen je cagar injadian awi'kù kareh, je bakaharap umba Aku tuntang jatun Ranying Hatala beken bara Aku.*

12 Limbah hapeteh raweí kalute, Ranying Hatala tuntang Jata Balawang Bulaú palus lilap bara tampayah ewen sintung due. Iē gandang halalian buli Balaí Bulaú Napatah Hintan, Balaí Hintan Napatah Bulaú.

13 Kilen kea panalataí Manyameí Malinggar Langit ewen due Kameluh Bajarumat Hintan limbah mandinun peteh bara Ranying Hatala, leka lampang tirukà madu batanjung panjang hakalingkang langit, haratean pain bukit panjang, hajajakan puruk batu ambu. **14** Hemben te kea hajamban kuasan Ranying Hatala je jadi imeteh huang ewen sintung due, te palus atun kapanataú ije sangku bulaú basuang Nyalung Kaharingan, palus ih entang nyalimbayung awi Kameluh Bajarumat Hintan. **15** Yē ewen sintung due palus batanjung panjang, bateteí ambu. Kilen kea huang kabentengan ewen sintung due batanjung panjang, leka tantuyak Nyalung Kaharingan pajanjuri baun kapanataú sangku bulaú. **16** Malawu raweí Kameluh Bajarumat Hintan umba Manyameí Malinggar Langit kuā:

Hakarang tingang nyahe, pajanjuri Nyalung Kaharingan jetuh balua baun kapanataú

*sangku bulaú manata petak sintel
habalambang tambun, liang deret
habangkalan karangan.*

17 Nyalung Kaharingan je manata petak sintel habalambang tambun te hatalaga hayak hai tutu pahalendangà. Yē ewen sintung due haya-hayak nantuneng. Intu hete atun taratuntū pahalingeí hatamunan iē. **18** Sana ewen sintung due nantuneng pahalingeí mijen Nyalung Kaharingan je hatalaga intu petak sintel habalambang tambun, hayak auh nyahu batengkung ngaruntung langit homboh malentar kilat basiring hawun, pahalingeí ewen sintung due te basuluh manjadi sintung due bawi hatue. **19** Ewen sintung due je kajadian bara pahalingeí jete endáu palus mananggare gangguranan arā kabuat bagare je hatue kanampan bunu iete Manyameí Tempun Telun Tingang, je bawi kangumban sinjang iete Kameluh Tempun Tiawun Tingang, hayak te ewen sintung due mananggare arepà ranying hatala.

20 Kilen kea panalataí Manyameí Tempun Telun Tingang ewen due Kameluh Tempun Tiawun Tingang hakarangka lingu nalataí umba Manyameí Malinggar Langit ewen due Kameluh Bajarumat Hintan madu nabasan matan andaú, bulan, tuntang bintang patendu langit tinaí. **21** Kuan Manyameí Tempun Telun Tingang:

*Has itah sintung epat nabasan
matan andaú, bulan, tuntang
bintang patendu langit.*

Nyulang raweí Manyameí Malinggar Langit kuā:

*Akan naraí itah nabasan matan
andaú, bulan, tuntang bintang*

*patendu langit lalaú karē, je tege
tuh sukup beweí.*

22 Tambah Manyameí Tempun Telun Tingang kuā:

*Naraí bulan salā are matan
andaú, bulan, tuntang bintang
patendu langit, mani-manih
kahalapà, manambah panataú
panuhan akan ketun sintung due.*

23 Kuan Manyameí Malinggar Langit:

*Amun kalute panalataí, has pajing
itah manabasà.*

Yē ewen sintung epat palus mangiwak matan andaú, bulan, tuntang bintang patendu langit, palus manabasà manjadi matan andaú, bulan, tuntang bintang patendu langit tinaí. **24** Hemben te kea gawin ewen sintung epat puna handung katawan awi Ranying Hatala ewen due Jata Balawang Bulaú. Kuan Ranying Hatala:

*Amun kilaú etuh panalataí gawin
Manyameí Malinggar Langit, dia
salan lepah ngarak nahajangka
kakare taluh handiaí je jadi
injadian awi'kù.*

25 Yē Ranying Hatala ewen due Jata Balawang Bulaú hadurut nyembang Manyameí Malinggar Langit ewen due Kameluh Bajarumat Hintan. Hemben te kea Manyameí Tempun Telun Tingang ewen due Kameluh Tempun Tiawun Tingang malilap arepà, babuhaú.

26 Ranying Hatala jadi hasembang tanduk umba Manyameí Malinggar Langit ewen due Kameluh Bajarumat Hintan. Ewen sintung due te paham nunjung ikeh tingang, nahaliman biti nyahukan kabangkang. **27** Kuan Ranying Hatala:

Pajing akan hetuh ketun sintung due, ela ketun sintung due nunjung ikeh tingang. Aku tuh Ranying Hatala je tutu akan ketun sintung due. Tinaí gawin ketun sintung epat uras jadi handung katawangkù.

28 Nahingan riwut rawéi Ranying Hatala kalute, hemben te kea Manyameí Malinggar Langit ewen due Kameluh Bajarumat Hintan manukep Ranying Hatala. Kalute kea Manyameí Tempun Telun Tingang ewen due Kameluh Tempun Tiawun Tingang umba manukep. **29** Sana ewen sintung epat jadi atun manaharep Ranying Hatala, hete Ranying Hatala hamauh umba ewen sintung epat kuā:

*Ketun sintung epat tuh atun tagal kahandakkù tuntang kuasangkù. **30** Tinaí ikaú Manyameí Tempun Telun Tingang ketun sintung due Kameluh Tempun Tiawun Tingang, awi ketun sintung due jadi manasalan bara petehkù umba Manyameí Malinggar Langit ewen sintung due Kameluh Bajarumat Hintan, ketun sintung due dia tau mijen huang penda langit jatuh, malengkan mijen intu penda langit ketun kabuat.*

31 Hanjak rantang pahalawang huang Manyameí Tempun Telun Tingang ewen due Kameluh Tempun Tiawun Tingang manahingan pahalawu rawéi Ranying Hatala kalute. Palus ewen sintung due manting nangkaruan tambang nanturung langit sapenda kabuat.

32 Hemben Ranying Hatala manyahuan Manyameí Tempun Telun Tingang ewen due Kameluh Tempun Tiawun

Tingang nanturung langit sapenda kabuat, kilen kea Manyameí Malinggar Langit ewen due Kameluh Bajarumat Hintan kamalemu palus nunjung tiruh tingang dia handung hakatawan arepà. **33** Metuh Manyameí Malinggar Langit ewen due Kameluh Bajarumat Hintan nunjung tiruh tujuh dia handung hakatawan arepà, hete Ranying Hatala ewen due Jata Balawang Bulaú nangkarian rangkan pakaian simpan ewen sintung due. **34** Rangkan pakaian simpan ain Manyameí Malinggar Langit akan Kameluh Bajarumat Hintan, ain Kameluh Bajarumat Hintan akan Manyameí Malinggar Langit. **35** Hayak te kea Ranying Hatala haduanan tinaí Manyameí Malinggar Langit palus inameā mijen garing lalunjung pulang duhung, hayak atun butah nyarataka penyang basuang rangkan pakaian simpan ain bawi kangumban sinjang tuntang ije suling bulaú rumbaí ambun. **36** Kalute kea Kameluh Bajarumat Hintan haduanan awi Ranying Hatala palus inameā mijen kumpang duhung, hayak umba rangkan pakaian simpan hatue kanampun bunu tuntang atun ije gariding bulaú sangkalemu. **37** Limbah te Ranying Hatala mimbit kumpang duhung tuntang garing lalunjung pulang nanturung kayu erang tingang tantan Bukit Bulaú Kangantung Gandang tahanjungan Kereng Rabia Nunyang Hapalangka Langit. **38** Sembang tantan Bukit Bulaú Kangantung Gandang tahanjungan Kereng Rabia Nunyang Hapalangka Langit, hete Ranying Hatala palus manamean kumpang duhung tuntang garing lalunjung pulang mijen bungking kayu erang tingang marung luhing kayu andung nyahu. **39** Hayak auh nyahu batengkung ngaruntung

langit homboh malentar kilat basiring hawun, pahalendang kumpang duhung tuntang garing lalunjung pulang halajur mangilat mamancar dia hakalayan, handaú hamalem hapanyingah sinde. **40** Limbah te tinaí Ranying Hatala haduanan matan andaú, bulan, tuntang bintang patendu langit je inabasan awi Manyameí Tempun Telun Tingang ewen due Kameluh Tempun Tiawun Tingang. **41** Hayak auh nyahu batengkung ngaruntung langit homboh malentar kilat basiring hawun, Ranying Hatala haduanan matan andaú palus injadiā manjadi Tasik Rampang Matan Andaú, haduanā tinaí bulan injadiā manjadi Tasik Mandalan Bulan, haduanā bintang patendu langit injadiā manjadi Tasik Mangirai Bintang, Laut Lambang Patendu.

42 Limbah uras jadi kakare gawin Ranying Hatala manjadian kahandakà intu katika jete, Iē ewen due Jata Balawang Bulaú gandang halalian buli Balai Bulaú Napatah Hintan, Balai Hintan Napatah Bulaú, tahanjungan Bukit Bulaú Kangantung Gandang.

5 Garing lalunjung pulang tuntang kumpang duhung pajanjuri bungking kayu erang tingang

1 Huang ije katika, garing lalunjung pulang tuntang kumpang duhung je mijen marung bungking kayu erang tingang taratuntun awi tambarirang hai marung singkap langit, tingang hai nipeng randung banama, tuntang antang datuh ngampuh pulau pulu. **2** Hemben te tambarirang hai marung singkap langit palus mintih bungking kayu erang tingang. Kilen kea palus parandahap tari tambarirang hai

marung singkap langit. Yē sarabangkaia basaluh manjadi Sungei Sahai Tambarirang. **3** Mintih tinaí awi tingang hai nipeng randung banama. Leka parandahap tinaí tari tingang hai nipeng randung banama. Yē sarabangkaia basaluh manjadi lunuk jayang tingang, baringen sempeng tulang tambarirang. **4** Mintih tinaí awi antang datuh ngampuh pulau pulu. Leka parandahap tari antang datuh ngampuh pulau pulu. Yē sarabangkaia basaluh manjadi batu lentap antang, liang irai bungaí.

5 Kilen kea bungking kayu erang tingang, luhing kayu andung nyahu palus dia ulih ranggang. Yē taratuntun tinaí pahalendangā awi Sangkaria Nyaru Menteng, Janjalung Tatu Riwt, tuntang Gambala Rajan Tanggara. **6** Hayak auh nyahu batengkung ngaruntung langit homboh malentar kilat basiring hawun, ewen sintung telu manyaherang bungking kayu erang tingang, luhing kayu andung nyahu. **7** Sana buah saherang awi ewen sintung telu, bungking kayu erang tingang palus ranggang nduan ije gawang tingang, bukeí dinun epat sambutin antang. Yē garing lalunjung pulang pajanjuri halawu hila kalimbahan laut mangantung palus nyelem kalang labehu handalem. **8** Kilen kea garing lalunjung pulang je nyelem kalang labehu handalem, taratuntun awi tambun hai nipeng pulau pulu, palus inahimbura. Yē kalampangan garing lalunjung pulang halawu upun garing. **9** Garing lalunjung pulang je halawu upun garing puna lenda-lendang sinde. Yē taratuntun tinaí awi Sangkaria Nyaru Menteng, Janjalung Tatu Riwt, tuntang Gambala Rajan Tanggara, palus

nyaherang ewen kā. **10** Hayak auh nyahu batengkung ngaruntung langit homboh malentar kilat basiring hawun, pahalendang je huang garing lalunjung pulang kajadian manjadi ulun mangalunen hatue kanampan bunu hatamunan Iē, hayak atun butuh nyarataka penyang basuang rangkan pakaian simpan bawi kangumban sinjang tuntang ije suling bulaú rumbai ambun. **11** Tinaí garing lalunjung pulang basaluh manjadi tunjang garing. Ulun mangalunen je kajadian bara pancar je intu huang garing lalunjung pulang palus mijen intu upun tunjang garing te. **12** Hemben te kea Ranying Hatala atun karamahan dumah manalih manyundaú ulun hatue kanampan bunu, rayun kanenjek ruhung, hayak Iē hamauh kuā:

Kai tege bitim hatue kanampan bunu. Hetuh Aku nanggare gangguranan aram bagare Manyameí Tunggul Garing Janjahunan Laut Sahawung Tangkuranan Hariran.

13 Limbah mananggare gangguranan aran hatue kanampan bunu te, Ranying Hatala gandang halalian buli Balaí Bulaú Napatah Hintan, Balaí Hintan Napatah Bulaú.

14 Kilen kea Manyameí Tunggul Garing Janjahunan Laut hemben iē mijen upun tunjang garing, leka atun ije katagaú dawen ipah laut hanyut babahantung katahan galumbang bilun nyalung. **15** Yē palus malawu raweí Manyameí Tunggul Garing Janjahunan Laut kuā:

Ceh ah, jakā Ranying Hatala masi bitingkù, ngajadian akangkù ije katagaú dawen ipah laut je

bahalap tutu ampī tuh manjadi banama eka'kù mijen.

16 Ranying Hatala manahingan raweí Manyameí Tunggul Garing Janjahunan Laut balaku manjadian akā tagaú dawen ipah laut manjadi ekā mijen. Hayak auh nyahu batengkung ngaruntung langit homboh malentar kilat basiring hawun, Ranying Hatala manjadian tagaú dawen ipah laut manjadi banama panjang pahalampeí laut ajung ambu taretaú hariran. **17** Sana banama panjang pahalampeí laut te jadi tege, Manyameí Tunggul Garing Janjahunan Laut palus lumpat intu hete tuntang hemben te kea banama panjang pahalampeí laut hanyut bahantung katahanan riwut galumbang hai nyababuwung tusang palus kasampahan mijen ije bahan batu mendeng.

18 Tinaí kumpang duhung sana bungking kayu erang tingang je kana saherang awi Sangkaria Nyaru Menteng, Janjalung Tatu Riwt, tuntang Gambala Rajan Tanggara te ranggang, palus panjanjuri kea akan hila jalayan hulu danum. **19** Kumpang duhung puna lenda-lendang sinde mijen bilun nyalung jalayan hulu danum. Yē taratuntun awi tambun hai nipeng pulaú pulu, palus nahimburà kumpang duhung kalamangan halawu ije antah batu. **20** Kilen kea taratuntun tinaí pahalendang kumpang duhung hunjun antah batu awi Sangkaria Nyaru Menteng ewen sintung telu. Hayak auh nyahu batengkung ngaruntung langit homboh malentar kilat basiring hawun, ewen sintung telu manyaherang kumpang duhung. **21** Pahalendang je bakahandung mijen kumpang duhung palus kajadian manjadi ulun

mangalunen bawi kangumban sinjang hatamunan Iē. Kumpang duhung kajadian manjadi ije batu ampar. **22** Mampahayak kajadian jete, atun kapek balulang bulaú basuang rangkan pakaian simpan ain hatue kanampan bunu tuntang ije gariding bulaú sangkalemu. Ulun kalunen bawi kangumban sinjang palus mijen batu ampar jete. **23** Hemben te Ranying Hatala atun hadurut nanturung batu ampar. Iē jadi sembang hete hayak hamaui kuā:

Kai tege bitim bawi kangumban sinjang, habineí kamangkang luyang. Hetuh aku mananggare gangguranan aram bagare Kameluh Putak Bulaú Janjulen Karangan Limut Batu Kamasan Tambun.

24 Limbah Ranying Hatala mananggare gangguranan aran ulun mangalunen bawi hatamunan Iē, Ranying Hatala gandang halalian buli Balaí Bulaú Napatah Hintan, Balaí Hintan Napatah Bulaú.

25 Kilen kea Kameluh Putak Bulaú Janjulen Karangan hemben iē mijen hunjun batu ampar jete, taratuntun atun ije pusun handiwung hanyut babahantung ngasuhan bilun nyalung paham bahalap tutu ampi. **26** Kameluh Putak Bulaú Janjulen Karangan malawu raweí kuā:

Ceh ah, kahalap ampin pusun handiwung jete, jakā Ranying Hatala manjadian akangkū manjadi lasang eka'kū mijen.

27 Auh raweí Kameluh Putak Bulaú Janjulen Karangan puna handung katawan awi Ranying Hatala. Hayak

auh nyahu batengkung ngaruntung langit homboh malentar kilat basiring hawun, pusun handiwung palus kajadian manjadi lasang hayak atun auh Iē manyewut jete bagare lasang bangkirai bahenda sambung. **28** Sana lasang te atun, Kameluh Putak Bulaú Janjulen Karangan palus lumpat intu hete hayak umba kare puat paramū. Lasang bangkirai bahenda sambung palus hanyut babahantung ngasuhan bilun nyahu, kasampahan intu ije bahan batu mendeng tumbang batang danum.

6 Manyameí Tunggul Garing Janjahunan Laut Sahawung Tangkuranan Hariran ewen due Kameluh Putak Bulaú Janjulen Karangan Limut Batu Kamasan Tambun hasembang tanduk

1 Jadi pire-pire andaú alem katahī, Manyameí Tunggul Garing Janjahunan Laut Sahawung Tangkuranan Hariran mijen banama panjang pahalampeí laut, ajung ambu taretaú hariran. Kalute kea Kameluh Putak Bulaú Janjulen Karangan Limut Batu Kamasan Tambun mijen lasang bangkirai bahenda sambung. Ewen sintung due sama mijen ekā kabuat-kbuat.

2 Kangkaraú lingu nalataí Manyameí Tunggul Garing Janjahunan Laut madu mampahiaú suling bulaú rumbaí ambun. Iē palus haduā hayak mampahiaú. **3** Eleh kangkarungut bahing suling bulaú rumbaí ambun, ulih kuta-kutak sinde kuā:

Pasi ulun aku hatue kanampan bunu, rayung kanenjek ruhung, lalu duhung tunggal aku dia badahang ije, pulang sahi isen batambah due. 4 Bitingkū lalaú

bulus kumpang kanalesaú buang, humberang bale kalalusan lawas, jatun bara rangkan pakaian simpan, kurang anan panyambungan sukup. 5 Atun rangkan pakaian simpan, anan iran panyambungan sukup, ain bawi kangumban sinjang, habineí kamangkang luyang, andaú kueh aku tau mangkang ngangkanā.

Kai auh pahiaú suling bulaú rumbaí ambun. **6** Nante-nanteng bengkel Kameluh Putak Bulaú Janjulen Karangan awi atun tarahiningā bahing suling bulaú rumbaí ambun, puna kuta-kutak sinde hayak paham tutu auh kangasī. **7** Kangkaraú kea lingu nalataí Kameluh Putak Bulaú Janjulen Karangan madu pahiaú gariding bulaú sangkalemu. Iē gating mendeng haduanan palus mampahiaú gariding bulaú sangkalemu. Kangkarungut bahing puna kuta-kutak sinde janjaruman panalataí bitī. **8** Yē kuan bahing gariding bulaú sangkalemu:

Iyo-iyoh tingang nyahe, hetuh tege ulun aku bawi kangumban sinjang, habineí kamangkang luyang, bawi tunggal aku dia badahang ije, habineí sahi isen batambah due. 9 Nauh kea jakā dia tinaí bitingkū bulus kumpang kanalesaú buang, humberang bale kalalusan lawas, jatun bara rangkan pakaian simpan, kurang anan iran panyambungan sukup. Aluh atun rangkan pakaian simpan, ain hatue kanampan bunu, rayung kanenjek ruhung. 10 Andaú kueh bitingkū tau mangkang ngangkanā.

Kai riwut raweí Kameluh Putak Bulaú

Janjulen Karangan hajamban auh gariding bulaú sangkalemu, puna asi-asi pahariwut raweíā. **11** Magun kuta-kutak auh gariding bulaú sangkalemu kuā:

Bitim tingang nyahe jadi handung hakatawan aku bawi kangumban sinjang, habineí kamangkang luyang. Kilen jakā bitim je junjung helu hajalukan akangkū rangkan pakaian simpan, iran panyambungan sukup?

12 Manahingan riwut raweí uluh bawi kangumban sinjang kalute, yē Manyameí Tunggul Garing Janjahunan Laut palus hajalukan rangkan pakaian simpan, iran panyambungan sukup, hajamban teken lentah nambuwung bungaí je atun tagal kahandak Ranying Hatala. **13** Palus taratambang pating jarin Kameluh Putak Bulaú Janjulen Karangan. Hemben te kea bawi kangumban sinjang mangkang ngangkanā, eleh mangkang barangkap kilaú bulan babangkang langit, mangku bariun tingkah pahawang batentang hawun. **14** Kangkarungut suling bulaú rumbaí ambun kuā:

Iyoh tingang betaú, pating hajalukan akangkū rangkan pakaian simpan, iran panyambungan sukup.

15 Yē Kameluh Putak Bulaú Janjulen Karangan hajalukan rangkan pakaian simpan, iran panyambungan sukup akan Manyameí Tunggul Garing Janjahunan Laut, mahapan teken lentah nambuwung bungaí. **16** Palus taratambang pating jarin Manyameí Tunggul Garing Janjahunan Laut rangkan pakaian simpan, iran panyambungan sukup, hayak palus

mangkang ngangkanā, eleh mangkang barangkap kilaú kanyukah kumpang, mangku bariun rowan kanyahungker pulang, linga batanjung pulu, engkan bapilik jalatien. **17** Kalute ampin ewen sintung due, uras jadi mangkang ngangkanaan rangkan pakaian simpan, iran panyambungan sukup, tuntang bara katika jete ewen due katawan arepà je tau mahamen.

18 Limbah te Manyameí Tunggul Garing Janjahunan Laut, leka atun pahalawang huangà, ngaraú pahariwut lingū madu nyembang bawi kangumban sinjang, habineí kamangkang luyang. **19** Yē Manyameí Tunggul Garing Janjahunan Laut palus batanjung nangkaruan karawang tiwing panjang, nanturung lasang bangkirai bahenda sambung. **20** Sana sembang lasang bangkirai bahenda sambung, hete Manyameí Tunggul Garing Janjahunan Laut palus lumping nyembang Kameluh Putak Bulaú Janjulen Karangan. **21** Riwut raweí Kameluh Putak Bulaú Janjulen Karangan:

*Panjung tingang nyahe, panjung.
Kai bitim atun. Kilen jakā kue
sama mijen hetuh, pasi bitingkù
jatun ulun beken mandengan aku.*

22 Tumbuh Manyameí Tunggul Garing Janjahunan Laut:

*Naraí bulan salā, manih bitingkù
tunggal dia badahang ije.*

Tagal kapakat ewen due, nampara bara katika jete hinje mijen lasang bangkirai bahenda sambung.

7 Kameluh Putak Bulaú Janjulen Karangan pajanjuri dahā je sulakā

1 Nduan kauju andaú kauju alem Manyameí Tunggul Garing Janjahunan Laut Sahawung Tangkuranan Hariran ewen due Kameluh Putak Bulaú Janjulen Karangan Limut Batu Kamasan Tambun hinje purun. Hete pajanjuri dahan Kameluh Putak Bulaú Janjulen Karangan Limut Batu Kamasan Tambun ije lumping bulaú tanduk tambun, dinun due sampilung dawen lunuk tarung. **2** Kilen kea dahan Kameluh Putak Bulaú Janjulen Karangan je pajanjuri te palus taratuntun awi Manyameí Tunggul Garing Janjahunan Laut. **3** Yē palus haduanan awi Manyameí Tunggul Garing Janjahunan Laut hayak mungkus mahapan timpung babilem, ingkes tinaí mijen panataú sangku raja je jadi atun tagal kuasan Ranying Hatala. **4** Manyameí Tunggul Garing Janjahunan Laut nabasan tinaí lanting bara batang bamban balang, eka amuat panataú sangku raja je jadi basuang bangkusan timpung babilem. **5** Sana jadi bapuat lanting bamban balang palus inanjuran awi Manyameí Tunggul Garing Janjahunan Laut pahayak dehes bilun nyalung, eleh hanyut babahantung akan hila tumbang batang danum. **6** Kapanataú sangku raja je hanyut babahantung akan kalimbahan laut mangantung hai tutu pahalendangà, taratuntun awi tambun hai nipeng pulau pulu. **7** Yē inahimbun awi tambun hai nipeng pulau pulu. Hayak auh nyahu batengkung ngaruntung langit homboh malentar kilat basiring hawun, lanting bamban balang palus kajadian manjadi lanting leleng burung dahiang. **8** Tinaí kapanataú sangku raja palus kea

kajadian manjadi banama bunter dia haluan, ajung bulat isen kamburi ngampuh timpung babilem. Limbah te dahan belum endau kajadian manjadi Sarupui Biha Apui.

9 Sarupui Biha Apui narantang Sahumpak Buren Petak; Sahumpak Buren Petak narantang Kasisik Buren Tasik; Kasisik Buren Tasik narantang Putir Tenung Silu ewen due Kameluh Bembang Ruang. **10** Kameluh Bembang Ruang mijen Bukit Maninting Dahiang je numbang Tasik Ambun Baragantung Langit, hayak narantang Putir Irang Pasiha. Putir Irang Pasiha narantang Putir Lanting Bawin Dahiang; Putir Lanting Bawin Dahiang narantang Hantarung Rajan Dahiang; Hantarung Rajan Dahiang narantang Tunggal Kurung Dahiang Batanduk Tunggal, jete je inyewut asal tatu dahiang. **11** Putir Tenung Silu narantang telu biti je inangare bagare Karang Rajan Peres, Bujang Kamising, tuntang Rayung Sangengem. **12** Karang Rajan Peres, Bujang Kamising, tuntang Rayung Sangengem, ewen telu tuh je manak manjaria baratus gangguranan ara, manjadi rajan peres mijen kalimbahan laut mangantung.

8 Kameluh Putak Bula Janjulen Karangan pajanjuri dah je kadue

1 Kalute kare ampin kajadian je jadi injadian awi Ranying Hatala akan Manyamei Tunggul Garing Janjahunan Laut Sahawung Tangkuranan Hariran ewen due Kameluh Putak Bula Janjulen Karangan Limut Batu Kamasan Tambun.

2 Kilen kea jadi umbet katahi, Kameluh Putak Bula Janjulen Karangan ewen

due Manyamei Tunggul Garing Janjahunan Laut hinje belum, salenga atun tiruk madu muhun bapandui tingang huang danum tapian ewen due mijen. **3** Ye ewen due masuh hejan nahalampat tambun nanturung bilun nyalung palus bapandui tingang, hanyalung repang misut ngalingking biti. **4** Karahetan ewen sintung due bapandui tingang, hanyalung repang, salenga pajanjuri tina dahan Kameluh Putak Bula Janjulen Karangan, palus hanyut bahantung mijen bilun nyalung. **5** Kilen kea dahan je hanyut huang bilun nyalung taratuntun awi tambun hai nipeng pula pulu, ye palus inahimbura. Hayak auh nyahu batengkung ngaruntung langit homboh malentar kilat basiring hawun, hete dahan belum Kameluh Putak Bula Janjulen Karangan basaluh manjadi Ular Malang Laut. **6** Tina Ular Malang Laut narantang Gajah Baparang Panjang; Gajah Baparang Panjang narantang Tambun Lalujung Bunu, Ihing Lampaian Sawang, Ginteng Tolong, Tabang Beang, Tampak Mangkuk, Darap Kajang, Bawi Bujang Labata, Rayung Tantang Gunting, Desan Jata Balawang Bula, tuntang Rayat Sangkuada Bapager Hintan. **7** Tarantang ain Ular Malang Laut tuh je manjadi rajan peres baratus gangguranan ara, sampar saribu sabutan biti, bara hila kalang labehu handalem.

9 Kameluh Putak Bula Janjulen Karangan pajanjuri dah je katelu

1 Miar kea katahi pire-pire andau alem tina, Manyamei Tunggul Garing Janjahunan Laut Sahawung Tangkuranan Hariran ewen due

Kameluh Putak Bulaú Janjulen
Karangan Limut Batu Kamasan
Tambun hinje belum.

2 Huang sinde andaú Manyameí
Tunggul Garing Janjahunan Laut ewen
due Kameluh Putak Bulaú Janjulen
Karangan atun tiruk madu manyauk
nampaenyet kumpaí rarayun tanjung. **3**
Yē ewen due palus batulak. Kilen kea
karahetan ewen sintung due manyauk
nampaenyet kumpaí rarayun tanjung,
salenga pajanjuri daha Kameluh Putak
Bulaú Janjulen Karangan. **4** Sana
taratuntun daha belum je pajanjuri te,
Kameluh Putak Bulaú Janjulen
Karangan palus haduan hayak
mangkusa mahapan dawen kumpaí
rarayun tanjung, inantilap mahapan
dawen kayu bulan tilap telu puluh. **5**
Limbah te bangkusan daha belum palus
hajakah akan hila kalimbahan laut
mangantung. Hayak auh nyahu
batengkung ngaruntung langit homboh
malentar kilat basiring hawun,
inahimbur awi tambun hai nipeng pulaú
pulu, palus kajadian manjadi Awu-awu
Ganan Pulaú Pulu. **6** Awu-awu Ganan
Pulaú Pulu narantang Gajah Babalaí
Lanting; Gajah Babalaí Lanting
narantang Raja Pangandurum Bukit;
Raja Pangandurum Bukit narantang
Sarupuí Petak Mateí. **7** Sarupuí Petak
Mateí haduanan minā ije kalambutan
bapā manjadi bulan bawi bambaí.
Bara hete ewen due narantang Randing
Tandang. Randing Tandang narantang
Rama Batanduk Garing; Rama
Batanduk Garing narantang Hadangan
Laut; Hadangan Laut narantang
Hadangan Bakawan. **8** Randing
Tandang ewen due Rama Batanduk
Garing jetuh tarantang bara Sarupuí
Petak Mateí je sala huruí. Awi te

tarantang jetuh inyewut tarantang tulah
sahu. **9** Jetuh bukū akan pambelum
ulun kalunen amun ewen kawin babane
sala huruí, jete hai tutu kapalí, pali
katulah petak danum. Awi te bukū uluh
mamunu hadangan akan sakin petak
danum mangat teraí nganduang tulah
sahu. **10** Bulan bawi bambaí Sarupuí
Petak Mateí je nyandang rahian je
bagare Kameluh Bawin Banting,
narantang Sapi Rumbaí Ambun. Sapi
Rumbaí Ambun narantang Sapi
Bakawan. Ewen tuh uras badaha
Nyalung Kaharingan Belum, baisi
guhung paninting aseng, tuntang jetuh
tarantang bara kahinje je kabuah huruí.

10 Kameluh Putak Bulaú Janjulen Karangan pajanjuri dahā je kaepatā

1 Kilen kea Manyameí Tunggul Garing
Janjahunan Laut Sahawung
Tangkuranan Hariran ewen due
Kameluh Putak Bulaú Janjulen
Karangan Limut Batu Kamasan
Tambun, atun tiruk madu haguét
batanjung panjang, mantang karawang
tiwing panjang. **2** Karahetan ewen due
mantang karawang tiwing panjang,
salenga pajanjuri tinaí daha Kameluh
Putak Bulaú Janjulen Karangan manata
sahep sahumpak dawen lunuk tarung. **3**
Dahan Kameluh Putak Bulaú Janjulen
Karangan je pajanjuri manata sahep
sahumpak dawen lunuk tarung te hai
tutu pahalendangā. **4** Kilen kea
pahalendang daha je pajanjuri te
taratuntun awi Sangkaria Nyaru
Menteng, Gambala Rajan Tanggara,
tuntang Janjalung Tatu Riwut, palus
nyaluh hayak auh nyahu batengkung
ngaruntung langit homboh malentar
kilat basiring hawun, kajadian manjadi
Nyaring Panyaraíá Belum Sahakung

Pamarupa Haring. **5** Nyaring Panyaraia Belum Sahakung Pamarupa Haring iatuh awi Ranying Hatala mijen huang tumbang batang danum injam tingang, teluk harantung langit. **6** Nyaring Panyaraia Belum Sahakung Pamarupa Haring narantang Siak Sakung Baguti Tandang Haramaung, ekā mijen iete Batang Danum Nyababerang Langit je manumbang Tasik Gandang Ngarambang Nyahu Laut Tuwung Hambalat Kilat. **7** Tinai Siak Sakung Baguti Tandang Haramaung te narantang Serang Tatu Nyaring; Serang Tatu Nyaring narantang Nyaring Nambalaú Bahandang Sahakung Bagundaí Serang; **8** Nyaring Nambalaú Bahandang Sahakung Bagundaí Serang narantang Sangkawung Buang Pamapuí Mendeng; Sangkawung Buang Pamapuí Mendeng narantang Salakutak Gila-gila Hanyi; Salakutak Gila-gila Hanyi narantang Raja Pandung Mama Rahuí Bungaí; **9** Raja Pandung Mama Rahuí Bungaí narantang Bahutaí Bukit Mina Nganyun Kereng; Bahutaí Bukit Mina Nganyun Kereng narantang Tunyuk Tatu Nyamuk, Kitaú Tatu Lamantek, Birep Tatu Patining, Kirap Tatu Piket, tuntang Riwut Tatu Rangit.

10 Kalute ampin kare taluh je jadi injadian awi Ranying Hatala bara dahan Kameluh Putak Bulaú Janjulen Karangan je jadi pajanjuri manata sahep sahumpak dawen lunuk tarung.

11 Kameluh Putak Bulaú Janjulen Karangan pajanjuri dahā je kalimē

1 Limbah kajadian je kaepat, Manyameí Tunggul Garing Janjahunan Laut Sahawung Tangkuranan Hariran ewen due Kameluh Putak Bulaú

Janjulen Karangan Limut Batu Kamasan Tambun, atun tiruk handak baramu kayu sangalang akan garing pamalangkan pantar ihing sanggaran dahiang. **2** Yē ewen due palus tingang nulak lunuk, tambun basangka baras, balua lasang bangkiraí bahenda nanturung karawang tiwing panjang nyahendeng liang panapian tambun. **3** Bara panapian tambun ewen due batanjung panjang, bateteí ambu nyaharan pain bukit panjang, maneteí pamalapak puruk batu ambu, halawu huang tantan ije bukit. **4** Intu tantan bukit jete, salenga atun kamean ewen sintung due ewaú hampis garu bulan. Yē palus malawu raweí Kameluh Putak Bulaú Janjulen Karangan kuā:

*Naraí gangguranan arā bukit
jetuh tingang nyahe?*

5 Kuan Manyameí Tunggul Garing Janjahunan Laut:

*Iyoh bulan betaú, kilen kea jakā
kue nanggare gangguranan aran
bukit jetuh bagare Bukit
Ngalangkang Garu Kereng
Naliwur Santi.*

6 Bara tantan Bukit Ngalangkang Garu ewen due magun batanjung panjang, bateteí ambu, sembang ewen sintung due intu ije bukit tinaí, palus ewen sintung due nanggare gangguranan aran bukit jete bagare Bukit Ampar Samben Kereng Iraí Santi. **7** Bara Bukit Ampar Samben ewen due magun batanjung panjang, bateteí ambu haratean bukit gantung. Sembang ewen sintung due intu ije bukit ura-uras ngaliling kayun sangalang garing. **8** Yē ewen sintung due palus mananggare gangguranan aran bukit jete bagare Bukit Ngarambang Garing Kereng

Hambalat Sihung. **9** Bara bukit jete ewen sintung due batanjung tinaí sembang tantan ije bukit, palus ewen sintung due nanggare gangguranan aran bukit jete bagare Bukit Batengkung Nyahu Kereng Batenggaú Ganggerang. **10** Magun ewen sintung due batanjung panjang, bateteí ambu, sembang intu ije bukit, hayak ewen due tengak tanggare nampayah ngambu, salenga gitan ewen sintung due atun bulan bara gantung langit. Yē palus ewen sintung due nanggare gangguranan aran bukit jete bagare Bukit Payah Bulan Kereng Tenggaú Pahawang. **11** Batanjung tinaí ewen sintung due bara Bukit Payah Bulan, sembang ije bukit kanda-kandang. Hemben te kea ewen due nanggare aran bukit jete bagare Bukit Kandang Duhung Kereng Anduh Bunu. **12** Intu bukit jete ewen sintung due baramu kayu akan garing pamalangkan pantar, ihing sanggaran dahiang. Yē palus isung sanggaran dahiang. Yē palus isung nyaratundā, hayak te ewen sintung due bilik balingaú tanduk nuntun ngaju tampajehan ngawa. **13** Karahetan ewen sintung due bilik balingaú tanduk, mangilaú eka ewen due madu nampahendeng garing pamalangkan pantar, ihing sanggaran dahiang je dinun ewen sintung due hete, salenga taratuntun atun ije batu ninda-nindan ampī. **14** Intu hunjun batu je ninda-nindan ampī te tege ije hatuen nyaring. Yē palus ewen due mananggare gangguranan aran bukit jete bagare Bukit Batu Nindan Tarung Kereng Liang Bantilung Nyaring. **15** Intu Bukit Batu Nindan Tarung Kereng Liang Bantilung Nyaring te ewen due madu nampahendeng garing pamalangkan pantar, ihing sanggaran dahiang.

16 Kilen haweh Kameluh Putak Bulaú Janjulen Karangan metuh ewen sintung due madu nampahendeng garing pamalangkan pantar, leka pajanjuri tinaí daha ije lumpang bulaú tanduk ambun, palus nutup awi Manyameí Tunggul Garing Janjahunan Laut hapan talawang hayak enyet tinaí mahapan ranying bunu. **17** Hayak auh nyahu batengkung ngaruntung langit homboh malentar kilat basiring hawun, daha belum umba talawang tuntang ranying bunu basaluh manjadi Hamaung Batulang Bunu Pangandien Balikur Talawang. **18** Hamaung Batulang Bunu Pangandien Balikur Talawang narantang Kameluh Pakun Hawun; Kameluh Pakun Hawun narantang Kameluh Indu Tahunjung Tarung. Eka ewen mijen iete intu Batang Danum Injam Tingang Lewu Bukit Bajaga Bulan.

12 Kameluh Putak Bulaú Janjulen Karangan pajanjuri dahā je kajahawenā

1 Limbah te tinaí kahandak ewen sintung due je madu nampahendeng garing pamalangkan pantar nampahingkat ihing sanggaran dahiang, salenga taraingkang garing pamalangkan pantar awi Kameluh Putak Bulaú Janjulen Karangan Limut Batu Kamasan Tambun, hayak pajanjuri dahā manata bungking sangalang garing. **2** Palus nyaluh auh nyahu batengkung ngaruntung langit homboh malentar kilat basiring hawun, daha belum mijen bungking sangalang garing basaluh manjadi Bawin Kameluh Lulung Sangalang. **3** Tinaí Bawin Kameluh Lulung Sangalang narantang Kameluh Bumbung

Balawan; Kameluh Bumbung Balawan
 narantang Manyamei Talampe;
 Manyamei Talampe narantang
 Manyamei Tingang; Manyamei
 Tingang narantang Manyuling Tarung;
 Manyuling Tarung narantang Tapitik
 Kawu Tempun Elang Garantung;
 Tapitik Kawu Tempun Elang Garantung
 narantang Tantuya Ikuh Bakei; Tantuya
 Ikuh Bakei narantang Marasiang
 Tarung; Marasiang Tarung narantang
 Bajakah Languan Tanjung; Bajakah
 Languan Tanjung narantang Lunuk
 Nyalantar Saratus; ⁴ Lunuk Nyalantar
 Saratus narantang Iman Hanjaliwan
 Baras Mumpun Penda Balawan, jete je
 narantang Lamian Panjang
 Harandikung Luwang Timpung
 Panjang Indu Entang Tulang. Kalute
 ampin kajadian bara tanjuri dahan
 Kameluh Putak Bula Janjulen
 Karangan je kajahawen belum tanggar
 jahawen bulan langit.

13 Kameluh Putak Bula Janjulen Karangan pajanjuri dah je kauju

¹ Huang katahi tina, Manyamei
 Tunggul Garing Janjahunan Laut
 Sahawung Tangkuranan Hariran ewen
 due Kameluh Putak Bula Janjulen
 Karangan Limut Batu Kamasan
 Tambun manandang petak mampar
 buang, petak sintel habalambang
 tambun, nehang liang deret
 habangkalan karangan. ² Limbah jadi
 badandang petak sintel habalambang
 tambun, batehang liang deret
 habangkalan karangan, palus ewen
 sintung due baramu bisak bendang
 bula sangkalemu, induan uju kabisak.
³ Ewen due balaku asi belum palakuan
 awat maharing umba Ranying Hatala
 ewen due Jata Balawang Bula, uka

manyaluh bisak bendang bula
 sangkalemu uju kabisak manjadi
 parung hai eka ewen sintung due
 mahawang. ⁴ Hemben te kea ewen
 sintung due manejek bisak bendang
 bula sangkalemu uju kabisak intu
 hunjun petak mampar buang tuntang
 limbah te ewen sintung due gandang
 halalian buli, garantung kamalesan
 mulang nanturung lasang bangkirai
 bahenda sambung. ⁵ Kilen kea Ranying
 Hatala ewen due Jata Balawang Bula
 nuntun taluh gawin ewen sintung due,
 hayak nahingan auh puna asi-asi. ⁶
 Rawei Ranying Hatala:

*Amun kila etuh panalatai, kueh
 tau tuntung karangkan lingun
 ewen sintung due manum je
 ingahandak tuntang iatuh awi'ku.
 Awi te nara je ingahandak awi
 ewen due hetuh Aku manjadi.*

⁷ Ranying Hatala palus mukei kahain
 kuasa, mura japa jimat tanteng, Ie
 manjadian kahandak. ⁸ Hayak auh
 nyahu batengkung ngaruntung langit
 hombo malentar kilat basiring hawun,
 Ie manjadian bisak bendang bula
 sangkalemu manjadi parung hai
 batunjung duan telu ruang napas, hayak
 sukup umba kare puat panata
 panuhan. ⁹ Limbah te Ranying Hatala
 malawu rawei umba Manyamei
 Tunggul Garing Janjahunan Laut ewen
 sintung due Kameluh Putak Bula
 Janjulen Karangan pating tame huang
 parung mahawang. ¹⁰ Ye ewen sintung
 due tina palus balua lasang bangkirai
 bahenda sambung mantang karawang
 tiwing panjang nanturung parung
 mahawang hinje purun paniruh,
 mangkang kabaluma belum. ¹¹ Uju
 andau uju alem ewen sintung due jadi
 mien parung mahawang, leka pajanjuri

tinaí dahan Kameluh Putak Bulaú Janjulen Karangan, kabentengan iē mabelum apuí mijen dapuhan lambing kawu. Daha belum te manata dapuhan lambing kawu. **12** Nyaluh tinaí awi Ranying Hatala hayak auh nyahu batengkung ngaruntung langit homboh malentar kilat basiring hawun, daha belum palus manjadi Putir Balawang Kawu. **13** Putir Balawang Kawu narantang Pusa Tiun; Pusa Tiun narantang Pusa Dukuh; Pusa Dukuh narantang Pusa Bakawan.

**14 Kameluh Putak Bulaú Janjulen
Karangan pajanjuri dahā je kahanyā**

1 Limbah kakare kajadian kalute, yē Manyameí Tunggul Garing Janjahunan Laut Sahawung Tangkuranan Hariran ewen due Kameluh Putak Bulaú Janjulen Karangan Limut Batu Kamasan Tambun paham tutu angkat huangà tau nuah garing tarantang. **2** Umbet kea katahī ewen sintung due hinje, leka pajanjuri tinaí dahan Kameluh Putak Bulaú Janjulen Karangan. Yē palus inyaluh hayak auh nyahu batengkung ngaruntung langit homboh malentar kilat basiring hawun. Daha belum jete palus kajadian manjadi Raja Jangkaung Langit. **3** Raja Jangkaung Langit narantang Patih Juluh Jungkaú; Patih Juluh Jungkaú narantang Patih Pulang Kaeng; Patih Pulang Kaeng narantang Asu Bangka. **4** Tinaí Asu Bangka narantang Asu Pahaluang Lewu, jetuh je narantang Asu Bakawan. Kalute ampin taluh je manjadi akan ewen sintung due awi Ranying Hatala tuntang Jata Balawang Bulaú hemben te.

**15 Kameluh Putak Bulaú Janjulen
Karangan pajanjuri dahā je
kajalatiënā**

1 Limbah pire-pire kajadian je jadi mahalaú, kilen kea huang ije andaú tinaí Kameluh Putak Bulaú Janjulen Karangan kangkaraú lingu nalataí madu batanjung penda lepaú. Leka pajanjuri dahan Kameluh Putak Bulaú Janjulen Karangan Limut Batu Kamasan Tambun, hayak daha belum te paham tutu ampin kahain pahalendangà. **2** Daha belum te manata petak sintel tapajakan parung mahawang. Hayak auh nyahu batengkung ngaruntung langit homboh malentar kilat basiring hawun, basuluh manjadi Ramuan Penda Bendang. **3** Tinaí Ramuan Penda Bendang narantang Raja Kariring Langit; Raja Kariring Langit narantang Raja Lalunjung Bunu; Raja Lalunjung Bunu narantang Raja Panyahempun Taya; Raja Panyahempun Taya narantang Raja Panyahempak Bukit; **4** Raja Panyahempak Bukit narantang Bawuí Samben. Bawuí Samben tuh je narantang tinaí Bawuí Bakawan akan ulun kalunen. Kalute ampin kahandak Ranying Hatala manjadian kakare taluh handiaí junjun helu huran.

**16 Kameluh Putak Bulaú Janjulen
Karangan pajanjuri dahā je
kasapuluhá**

1 Manyameí Tunggul Garing Janjahunan Laut Sahawung Tangkuranan Hariran ewen due Kameluh Putak Bulaú Janjulen Karangan Limut Batu Kamasan Tambun halajur kuta-kutak tahu ampin kakare kajadian je ingahandak awi Ranying Hatala akan ewen sintung due.

2 Kilen kea leka atun karangkan huang Kameluh Putak Bulaú Janjulen Karangan madu balua parung mahawang tinaí nanturung lawang parintaran tingang. **3** Karahetan Kameluh Putak Bulaú Janjulen Karangan masuh hejan taletai jela dahiang, leka pajanjuri tinaí daha manata hejan taletai jela dahiang. **4** Hayak auh nyahu batengkung ngaruntung langit homboh malentar kilat basiring hawun, daha belum je manata kabentengan hejan taletai jela dahiang basaluh manjadi Bangkuak Penda Pakang. **5** Bangkuak Penda Pakang narantang Marasiaú Bulaú; Marasiaú Bulaú narantang Jaga Hakasah; Jaga Hakasah narantang Talenjen Tandas. **6** Tinaí Talenjen Tandas narantang Manuk Darung Tingang; Manuk Darung Tingang narantang Manuk Bakawan. Tarantang manuk jetuh je manjadi manuk akan ulun kalunen.

17 Kameluh Putak Bulaú Janjulen Karangan pajanjuri dahā je kasawalasā

1 Kalute ampin kajadian huang sapuluh bulan langit intu pabelum Manyameí Tunggul Garing Janjahunan Laut ewen sintung due Kameluh Putak Bulaú Janjulen Karangan.

2 Huang katika jete, Kameluh Putak Bulaú Janjulen Karangan kangkaraú lingu nalatai madu batanjung panjang akan likut parung mahawang. **3** Kabentengan Kameluh Putak Bulaú Janjulen Karangan batanjung panjang, leka pajanjuri tinaí daha manata petak sintel habalambang tambun, liang deret habangkalan karangan, intu likut

parung mahawang. **4** Hayak auh nyahu batengkung ngaruntung langit homboh malentar kilat basiring hawun, daha belum te palus kajadian manjadi Karamunting Bahu. **5** Karamunting Bahu narantang Karamunting Taya; Karamunting Taya narantang Rambangan Bahu; Rambangan Bahu narantang Rambangan Taya; Rambangan Taya narantang Salumbar Kayu Nyahu; Salumbar Kayu Nyahu narantang Tabalien Munyin; Tabalien Munyin narantang Kalipapa Tanduk. **6** Kalipapa Tanduk narantang tinaí Uli-ulin Bahenda; Uli-ulin Bahenda narantang Kayu Nyurung Upu; Kayu Nyurung Upu narantang Tabalien Lantang Penyang.

18 Kameluh Putak Bulaú Janjulen Karangan pajanjuri dahā je kaduewalasā

1 Tanggar due walas bulan langit katahi Manyameí Tunggul Garing Sahawang Tangkuranan Hariran ewen due Kameluh Putak Bulaú Janjulen Karangan Limut Batu Kamasan Tambun hinje belum. Leka atun karangkan lingu madu mampah pulau pehun sawang, nyahep ruang jumpung bunge.

2 Yē tingang palus tulak lunuk. Karahetan iē mampah pehun sawang, nyahep ruang jumpun bunge, pajanjuri tinaí dahan Kameluh Putak Bulaú Janjulen Karangan manata pulau pehun sawang, ulih lenda-lendang, linge-lingeí tutu. **3** Yē taratuntun awi Sangkaria Nyaru Menteng, Gambala Rajan Tanggara, tuntang Janjalung Tatu Riwut. Hayak auh nyahu batengkung ngaruntung langit homboh malentar

kilat basiring hawun, dahan jete basuluh manjadi Sangkarawat Munduk Sangkarawat Mendeng. ⁴ Sangkarawat Munduk Sangkarawat Mendeng narantang Rangkang Sanaman Batunjang Duhung Panarukat Jangkarang Bahangkang Bunu; Rangkang Sanaman Batunjang Duhung Panarukat Jangkarang Bahangkang Bunu narantang Rangkang Batu Batunjang Karangan Parukat Liang Bahangkang Baras; Rangkang Batu Batunjang Karangan Parukat Liang Bahangkang Baras narantang Raja Ungkuh Batu Tuhan Jenjang Liang; Raja Ungkuh Batu Tuhan Jenjang Liang narantang Raja Singkuh Batu Tuhan Jenjang Liang; Raja Singkuh Batu Tuhan Jenjang Liang narantang Raja Tungkuí Hawun ewen due Kameluh Kumbuí Ambun; Kameluh Kumbuí Ambun narantang Nyahu Papan Taliwu Kilat Santep Dandang Tajahan. ⁵ Nyahu Papan Taliwu Kilat Santep Dandang Tajahan narantang patahu epat walas biti, je inanggare Ranying Hatala gangguranan arā bagare Lalunjung Bunu, Lalunjung Pulang, Anju Ganan Tutuk Bunu, Renteng Bantikan Tuntung, Tantiwa Pantun Garantung, Kaliwat Peteng Penyang, Sarimpak Bambang Kumpang, Kunjat Ganan Lambang Palangka, Sasanggah Ganan Lambang Balái, Kirip Renteng Tingang, Ruak Ganan Likut Talawang, Sipet Pandak Turus Sangkairaya Mendeng, Manyameí Mama Lampayan Sawang, tuntang Raja Rantaran Bun Ujan Bulaú Rintih Bintang Ije Habalita Bulaú Ganda-Gandang Ngandang Riak Hanyin Tempu. Ewen tuh je mijen Bukit Ginteng Nahakahang Duhung, Kereng Barangga Naharanggan Bunu

intu Batang Danum Pijir Habunu.

19 Manyameí Tunggul Garing Janjahunan Laut hakaja pating umba Kameluh Putak Bulaú Janjulen Karangan

¹ Kilen kea amun jadi kinjap tutu pajanjuri dahan Kameluh Putak Bulaú Janjulen Karangan Limut Batu Kamasan Tambun, palus hindaí atun mandinun garing tarantang, sihung lalundung. ² Ranying Hatala jadi mangahandak kakare taluh handiaí je jadi injadiā tuntang kalute kea huang kakare taluh handiaí je injadiā harian andaú tinaí. Hayak te kea Iē japa-japan tatah:

Hetuh jadi umbet katikā Aku manjadian kakare taluh handiaí huang pabelum kalunen. Aku manjadian biti bereng aingkū akan manyuang pabelum je ingahandak awi'kū. ³ Ewen due tuh puna ilalus gawi lunuk hakaja pating, baringen hatamueí bumbung, awi ewen sintung due dapit jeha je manak manarantang hatamunan Aku huang pabelum Pantaí Danum Kalunen je puna ingahandak awi'kū tuntang talatah panggawi manjadi suntu akan pabelum Pantaí Danum Kalunen.

⁴ Ranying Hatala tuntang Jata Balawang Bulaú malawu raweí hayak manyahuan Raja Uju Hakanduang pajing tingang lunu-lunuk nanturung Bukit Batu Nindan Tarung, nyahendeng Kereng Liang Bantilung Nyaring. ⁵ Hemben te kea Ranying Hatala tuntang Jata Balawang Bulaú hapeteh raweí umba Raja Uju Hakanduang pajing

malalus lunuk hakaja pating, baringen hatamuei bumbung akan Manyamei Tunggul Garing Janjahunan Laut ewen due Kameluh Putak Bulaú Janjulen Karangan. **6** Limbah jadi mandinun peteh mandehen, janji manjiret bara Ranying Hatala ewen due Jata Balawang Bulaú, te Raja Uju Hakanduang palus tingang nusang hadurut lunuk nanturing Bukit Batu Nindan Tarung. **7** Ewen Raja Uju Hakanduang Kanaruhan Hanya Basakati te, iete bagare Raja Mandurut Untung, Raja Mandurut Bulaú, Raja Barakat, Raja Angking Penyang, Raja Garing Hatungku, Raja Panimbang Daha, tuntang Raja Tamanang. Ewen Raja Uju Hakanduang jetuh iete je inyewut huang katamparan kajadian kakare taluh handiaí.

8 Raja Uju Hakanduang hadurut mimbit kakare paramun lunuk hakaja pating, parabean baringen hatamuei bumbung, iete sawang tanggan tarung, ranying pandereh bunu, uei rantihen tingang, bawuí samben, manuk darung tingang, lamiang bua garing belum, manas sambelum perun tambun, tuntang je beken kea paramun gawi. **9** Kakare taluh je imbit awi Raja Uju Hakanduang Kanaruhan Hanya Basakati uras atun tagal kahain kuasan Ranying Hatala ewen due Jata Balawang Bulaú, maatuh taluh handiaí tumun kahandakà.

10 Sana sembang Bukit Batu Nindan Tarung, Kereng Liang Bantilung Nyaring, Raja Uju Hakanduang hasembang tanduk umba Manyamei Tunggul Garing Janjahunan Laut ewen due Kameluh Putak Bulaú Janjulen Karangan. **11** Raja Uju Hakanduang janjaruman peteh mandehen, janji

manjiret Ranying Hatala tuntang Jata Balawang Bulaú, je akan malalus gawi lunuk hakaja pating akan Manyamei Tunggul Garing Janjahunan Laut ewen due Kameluh Putak Bulaú Janjulen Karangan. **12** Nduan hambekan katun, namunun peteh mandehen Ranying Hatala ewen due Jata Balawang Bulaú:

Ketun sintung due tuh akan ilalus gawi lunuk hakaja pating, baringen hatamuei bumbung.

13 Hanjak rantang pahalawang huang, rindang pahateluk kalingu Manyamei Tunggul Garing Janjahunan Laut mandinun peteh rawei bara Ranying Hatala, awi puna Iē je katamparan pambelum, tuntang pambelum kalunen je puna Aī kabuat. **14** Yē Raja Uju Hakanduang palus malalus peteh mandehen Ranying Hatala ewen due Jata Balawang Bulaú, malalus gawi lunuk hakaja pating, baringen hatamuei bumbung. **15** Huang katika malalus gawi lunuk hakaja pating, baringen hatamuei bumbung, Raja Uju Hakanduang mampunduk Manyamei Tunggul Garing Janjahunan Laut umba Kameluh Putak Bulaú Janjulen Karangan intu hunjun garantung, hayak lenge pangantau mimbing batang sawang palus tunjuk paninjuk manunjuk akan ngambu nyaruruí batang sawang. Kalute kea pai maninjak batu. **16** Ewen sintung due jadi mandukan hunjun garantung. Hete Raja Uju Hakanduang manyaki ewen sintung due mahapan dahan manuk, bawuí, manitis undus, palus mameteng lilis lamiang, manas sambelum, hayak mantar pinang sama hanjenan kapantar. **17** Limbah munduk hunjun garantung ewen sintung due mendeng nanturing baun tunggang parung hayak nekap

bahat ambu parung, nukiú naharungking bahing mandehen peteh Ranying Hatala tuntang Jata Balawang Bulaú.

18 Ewen sintung due malalus kakare peteh mandehen Ranying Hatala tuntang Jata Balawang Bulaú, hayak jetuh kea je manjadi suntu dapit jeha huang pambelum Pantaí Danum Kalunen je ingahandak awi Ranying Hatala. **19** Limbah jadi gawi lunuk hakaja pating, baringen hatamueí bumbung, huang Bukit Batu Nindan Tarung, Raja Uju Hakanduang gandang halalian buli umba Ranying Hatala mijen Batang Danum Banyahu Bulaú.

20 Kameluh Putak Bulaú Janjulen Karangan Limut Batu Kamasan Tambun handiwung kanyurung pusu, pandung bapangku anak

1 Are kea jadi katahī limbah lunuk hakaja pating, baringen hatamueí bumbung, leka atun angkat kahubah biti bereng Kameluh Putak Bulaú Janjulen Karangan Limut Batu Kamasan Tambun. **2** Awi atun angkat kahubah biti bereng Kameluh Putak Bulaú Janjulen Karangan, hete iē palus malawu raweí umba Manyameí Tunggul Garing Janjahunan Laut kuā:

Kahandak Ranying Hatala ampī uras manjadi akan pambelum kalunen.

3 Nahingan auh riwut raweí bulan bawi bambaíà Kameluh Putak Bulaú Janjulen Karangan kalute, Manyameí Tunggul Garing Janjahunan Laut paham hanjak rantang pahalawang huangà, awi bulan bawi bambaíà jadi handiwung kanyurung pusu, pandung

bapangku anak. **4** Palus hamauih iē kuā:

Kareh amun sama bujur-kabajuran karangkan lingungkū nuah garing tarantang, aku mangantung hajat, mandehen miat umba Ranying Hatala ewen due Jata Balawang Bulaú.

5 Magun Manyameí Tunggul Garing Janjahunan Laut kuta-kutak pahalawu raweí, balaku asi belum, palakuan awat maharing umba Ranying Hatala ewen due Jata Balawang Bulaú tau kanuah garing tarantang hatue kanampan bunu, rayung kanenjek ruhung. **6** Ampī Ranying Hatala ewen due Jata Balawang Bulaú atun manahingan pahariwut raweí Manyameí Tunggul Garing Janjahunan Laut je balaku asi belum, palakuan awat maharing, hayak balaku karambang kilaú pulau pehun sawang, hambalat ruwan jumpung bunge.

7 Kalute Manyameí Tunggul Garing Janjahunan Laut bilak dia buang andaú batanjung pain bukit panjang, haratean puruk batu ambu, mangilaú taluh je nahuang bulan bawi bambaíà hakananā.

8 Hemben te kea Ranying Hatala atun mameteh umba Raja Uju Hakanduang uka janjaruman akan Manyameí Tunggul Garing Janjahunan Laut, huang katika bulan bawi bambaíà Kameluh Putak Bulaú Janjulen Karangan handiwung kanyurung pusu, uka iē handung hakatawan, tuntang iē mahaga bulan bawi bambaíà te bua-buah. **9** Basa kareh, huang ampin tamparan daha je manjadi bereng ulun mangalunen, hete atun kajadian je pangkasulak, jete je inyewut bagare lumpuk mata. Limbah te harun iē kajadian tinaí manjadi biti bereng, isi

daha, tulang uhat, tuntang pupus bulu. **10** Limbah ewen te jadi sukup atun tuntang tanggar genep katikā, bulan patendū, banama te baungkar puat hayak auh nyahu batengkung ngaruntung langit homboh malentar kilat basiring hawun, iē masuh nyalung badehes bakarampung bua buntis, ngasuhan guhung batiki bakatepas sapanakir mendeng. Huang katika jete atun dumah Janjalung Tatu Riwt, tame bereng umba hinje iē. **11** Huang katika jete kea, iē nukiū naharungking bahing, mandehen riwt je manjadi aseng panjang, tuntang palus atun pahalingeí bití umba kalawa ain Ranying Hatala je rantep hinje umba iē, jete inyewut hambaruan. **12** Kalute peteh Ranying Hatala hajamban Raja Uju Hakanduang je inyampaí umba Manyameí Tunggul Garing Janjahunan Laut, palus iē mahaga bua-buah kakare asi tuntang kahandak je iatuh awi Ranying Hatala akā, je kareh akan iatuh tinaí huang pambelum Pantaí Danum Kalunen tumun jalā tesek, kalute kea jalā buli nanturing Ranying Hatala.

13 Jadi sukup bulan tagalā, genep bintang patendū, nduan telu bulan tanggar langit, Kameluh Putak Bulaú Janjulen Karangan handiwung kanyurung pusu. Hete Manyameí Tunggul Garing Janjahunan Laut malalus kakare gawí tumun peteh Ranying Hatala ewen due Jata Balawang Bulaú, paleteng kalangkang sawang manyadiri akan tihin bulan bawí bambaíā. **14** Kalute kea amun jadi sukup katahī tinaí, nduan uju bulan tanggar langit, Manyameí Tunggul Garing Janjahunan Laut malalus peteh mandehen Ranying Hatala ewen due Jata Balawang Bulaú. Iē manyaki ehet

palus manyadia sangguhan manak akan bulan bawí bambaíā, Kameluh Putak Bulaú Janjulen Karangan.

15 Sukup jadi bulan tagalā, genep bintang patendū, nduan jalatien bulan jalatien andaú tanggar langit, hete palus banama baungkar puat, ajung bauráí dagangā. **16** Kameluh Putak Bulaú Janjulen Karangan luas bujur-kabajuran, uras hatue kanampan bunu, rayung kanenjek ruhung sintung telu.

17 Hanjak rantang pahalawang huang, rindang pahateluk kalingun Manyameí Tunggul Garing Janjahunan Laut, nuntun uluh garing tarantangā sintung telu, uras linga batanjung pulu, engkan bapilik jalatien, uras mangkang barangkap, kilau bulan babangkang langit. **18** Yē Manyameí Tunggul Garing Janjahunan Laut maluput hajat miat umba Ranying Hatala ewen due Jata Balawang Bulaú, palus malalus gawí nahunan manampa gangguraran aran anakā sintung telu. **19** Huang katika iē malalus nahunan manampa aran anakā sintung telu, te Manyameí Tunggul Garing Janjahunan Laut balaku Raja Uju Hakanduang tingang nusang hadurut lunuk, hayak balaku asi umba Ranying Hatala ewen due Jata Balawang Bulaú. **20** Sana ewen Raja Uju Hakanduang jadi sembang Bukit Batu Nindan Tarung, Kereng Liang Bantilung Nyaring, te ewen malalus gawí nahunan garing tarantang Manyameí Tunggul Garing Janjahunan Laut sintung telu, palus manyaki malas tumun peteh tuntang kahandak Ranying Hatala ewen due Jata Balawang Bulaú, hayak nanggare gangguraran arā iete Raja Sangen, Raja Sangiang, tuntang Raja Bunu. **21** Limbah te Raja Uju Hakanduang gandang halalian buli,

tuntang kalute ampin taluh je jadi kajadian tagal kahandak Ranying Hatala akan Manyamei Tunggul Garing Janjahunan Laut ewen due Kameluh Putak Bulaú Janjulen Karangan.

21 Taluh je injadian awi Ranying Hatala limbah Kameluh Putak Bulaú Janjulen Karangan luas anakà

1 Limbah Kameluh Putak Bulaú Janjulen Karangan Limut Batu Kamasan Tambun luas anakà ewen sintung telu, te Manyamei Tunggul Garing Janjahunan Laut ewen hanak hajarian belum netep huang Bukit Batu Nindan Tarung, Kereng Liang Bantilung Nyaring.

2 Tinaí ampī Ranying Hatala bakahandak akan maatuh kakare taluh handiaí rahian andaú. Hayak auh nyahu batengkung ngaruntung langit homboh malentar kilat basiring hawun, manyaluh sangguhan manak ain Kameluh Putak Bulaú Janjulen Karangan, eka luas anakà sintung telu te manjadi lanting samben nampalang penyang haki runtun ngangkuang santagi enjung bunu nyalawi bungaí, lanting lamiang nyarantiman handang, tuntang lanting dare hekut habalawit balambang. **3** Sintung telu taluh je kajadian bara sangguhan manak te uras atun intu butuh nyaraka penyang basalupu butuh amben penyang nyirat bulang jara-jarang. **4** Butah nyaraka penyang basalupu butuh amben penyang inyaluh tinaí hayak auh nyahu batengkung ngaruntung langit homboh malentar kilat basiring hawun, palus kajadian manjadi butuh panji ringkin danum, hayak sukup taluh puatà iete lanting samben nampalang penyang

haki runtun ngangkuang santagi enjung bunu nyalawi bungaí, lanting lamiang nyarantiman handang, lanting dare hekut habalawit balambang, banama bulaú runtih bulan ajung rabia nalepu bintang saratus, batu timpung sapanguwang bintik, baruñ tahentung bakalampaú guhung, anggan hantitik baka ujang andaú, timpun rarayun danum urang urik balambang, tuntang banama bukit malempang tambun jampahen langit. **5** Kakare ramu panataú panuhan je atun intu Manyamei Tunggul Garing Janjahunan Laut ewen hanak tuntang jete inyarah Ranying Hatala ewen mahaga helu iete butuh panji ringkin danum, suling bulaú rumbai ambon, gariding bulaú sangkalemu, tuntang kapek balulang bulaú. **6** Panataú panuhan jetuh kareh rahian andaú itah atun mahining eweh-eweh je mahagā tuntang akan naraí gunā, awi kareh Ranying Hatala akan mintih raja-raja tuntang kameluh je mahagā palus manggunā.

7 Kalute ampin kahandak Ranying Hatala je atun huang katika jete ura-uras manjadi, tuntang jetuh kea je manjadi tamparan taluh handiaí kareh huang Pantaí Danum Sangiang palus Pantaí Danum Kalunen.

22 Raja Bunu dia tau baseput barigas hakananan pantar pinang

1 Limbah pire-pire andaú jadi katahī, ampī Raja Bunu lalaú hakabeken lingu nalataí bara tambun pahari ewen sintung due. **2** Raja Bunu dia maku hakananan pantar pinang. Aluh iē hakananā jatun tau nyurung isi dahan tuntang dia kea tau baseput barigas kilauñ tambun paharī sintung due. **3**

Amun tambun paharī sintung due, iete Raja Sangen tuntang Raja Sangiang, puna akan ndu kaseput karigasà.

4 Kilen kea uluh tingang apangà Manyameí Tunggul Garing Janjahunan Laut ewen due tingang indangà Kameluh Putak Bulaú Janjulen Karangan paham kapehen itung huang nuntun garing tarantangà Raja Bunu je kalute ampī. **5** Yē Manyameí Tunggul Garing Janjahunan Laut ewen due bulan bawi bambaí Kameluh Putak Bulaú Janjulen Karangan malawu raweí:

Pasi-pasi lingun itah sintung due, lalaú nuah Ranying Hatala lalangena, nyambung Jata Balawang Bulaú sampalangen.

6 Kilen kea Ranying Hatala ewen due Jata Balawang Bulaú nahingan pahariwut raweí Manyameí Tunggul Garing Janjahunan Laut ewen due Kameluh Putak Bulaú Janjulen Karangan je balaku asi belum, palakuan awat maharing. **7** Palus japa-japan tatah, jima-jimat tanteng, Ranying Hatala ewen due Jata Balawang Bulaú masi Manyameí Tunggul Garing Janjahunan Laut ewen due Kameluh Putak Bulaú Janjulen Karangan. Iē manjapa lalang tambangap langit je basuang behas nyangen tingang, hayak inutup mahapan pundang lauk ila-ilai langit je dia tau una tuntang dia tau rugi. **8** Hayak auh nyahu batengkung ngaruntung langit homboh malentar kilat basiring hawun, kahandak Ranying Hatala ewen due Jata Balawang Bulaú uras manjadi metuh te kea. **9** Tinaí behas nyangen tingang je akan suang lalang tambangap langit, ingaut ije supak nyurung ije gantang,

ingaut ije gantang nyurung ije luntung palundu, kalute laju-lajur palus katatahi. **10** Kalute kea pundang lauk ila-ilai langit, imipih kahain lukap nyurung kahain kiap. Awi lalang tambangap langit te atun Nyalung Kaharingan Belum mijen hila palempang.

11 Yē Ranying Hatala ewen due Jata Balawang Bulaú nyahuan Raja Uju Hakanduang tingang nusang hadurut lunuk ngagahan lalang tambangap langit je basuang behas nyangen tingang tuntang pundang lauk ila-ilai langit, nanturung Bukit Batu Nindan Tarung, Kereng Liang Bantilung Nyaring. **12** Sembang Bukit Batu Nindan Tarung, Kereng Liang Bantilung Nyaring, Raja Uju Hakanduang narui rangkan panginan, behas nyangen tingang tuntang pundang lauk ila-ilai langit akan panginan Raja Bunu, je mijen lalang tambangap langit. **13** Yē Manyameí Tunggul Garing Janjahunan Laut ewen due Kameluh Putak Bulaú Janjulen Karangan mampakasak rangkan panginan simpan, iran sakunyatan cukup, akan garing tarantang Raja Bunu. **14** Sana hakananan rangkan panginan simpan, iran sakunyatan cukup, Raja Bunu harū nunjung karigasà, baseput nyurung isi dahā sama kilaú tambun paharī ewen sintung due.

15 Limbah te Ranying Hatala ewen due Jata Balawang Bulaú manjapa tinaí hanggulan garing je basalupu apuí pambelum je dia tau belep akan Manyameí Tunggul Garing Janjahunan Laut ewen due Kameluh Putak Bulaú Janjulen Karangan tuntang ewen hanak hajarian. **16** Hayak auh nyahu

batengkung ngaruntung langit homboh malentar kilat basiring hawun, kahandak Ranying Hatala ewen due Jata Balawang Bulaú manjapa hanggulan garing je basalupu apuí pabelum palus manjadi. Yē bukū atun hanggulan garing je basalupu apuí pabelum intu Lewu Bukit Batu Nindan Tarung. **17** Tinaí behas nyangen tingang je mijen lalang tambangap langit tuntang pundang lauk ila-ilai langit jete puna dia tau imindah bara ekā, iatuh awi Ranying Hatala ewen due Jata Balawang Bulaú, basa amun iē imindah te tau lepah.

18 Kalute ampin kahandak Ranying Hatala ewen due Jata Balawang Bulaú manjadian kare kahandakā huang katika jete, intu Bukit Batu Nindan Tarung.

23 Raja Sangen, Raja Sangiang, tuntang Raja Bunu inuah

1 Kilen kea amun ewen telu te jadi sasa-sasar hai tuntang sasa-sasar bakas, hayak puna paham ampin karigasā. Indū ewen due bapā hanjak tutu pahalawang huangā, rindang pahateluk kalingū manuntun garing tarantangā. **2** Ewen sintung telu karas kabangang, habayang teras tapang bentuk lawang parintaran tingang, basangkelang kea nalanjung lawin kayun sangalang garing, tuntang halangunyan bilun nyalung. **3** Kalute kahanjak pahalawang huang indang apangā nuntun garing tarantangā uras balinga tambang.

4 Kilen kea huang sinde andaú ewen sintung telu salenga atun tiruk karangkan huang muhun panduí tingang, halangunyan bilun nyalung huang batang danum, panapian Bukit

Batu Nindan Tarung, Kereng Liang Bantilung Nyaring. **5** Sana jadi hakabua tiruk karangkan lingun ewen sintung telu, yē ewen sintung telu palus muhun panduí tingang, hanyalung repang, nanturung bilun nyalung. **6** Ranying Hatala ewen due Jata Balawang Bulaú manuntun ewen sintung telu je metuh karehu panduí tingang, hanyalung repang bara gantung bilun nyalung. **7** Yē Ranying Hatala ewen due Jata Balawang Bulaú halaluhan ije kadereh sanaman, lampang puntungā tuntang leteng puntungā. **8** Kilen kea kabentengan ewen sintung telu panduí tingang, hanyalung repang, salenga ewen sintung telu nuntun atun ije kadereh sanaman. Puntungā lampang hunjun bilun nyalung, tuntang hila puntungā leteng mijen kahaleman nyalung. **9** Sana ewen sintung telu nuntun atun sanaman te, yē ewen sintung telu haya-hayak manting nangkaruan tambang nanturung sanaman te hayak kea manekapā. **10** Kilen kea Raja Sangen tuntang Raja Sangiang manekap sanaman te hila puntungā je lampang, limbah te ampī Raja Bunu manekap puntung sanaman hila je leteng. **11** Hanjak rantang pahalawang huang ewen sintung telu palus haduanan sanaman te, yē kuan riwut raweā:

Itah sintung telu kanuah awi Ranying Hatala ewen due Jata Balawang Bulaú.

12 Ewen sintung telu palus mimbit sanaman jete gandang halalian buli nanturung parung mahawang, nanturung tingang apangā, burung indangā. **13** Amun ewen sintung telu jadi sembang parung mahawang, nyembang uluh tingang apangā. Yē

ewen sintung telu janjaruman panalataí, bau ewen sintung telu jadi kanuah ije kadereh sanaman je puntungà lampang tuntang puntungà leteng. **14** Yē ewen sintung telu palus hajalukan sanaman te akan uluh tingang apangà hayak janjaruman panalataí hila sanaman je lampang tuntang sanaman je leteng, hayak balaku umba uluh tingang apangà nabasan sanaman te manjadi duhung papan benteng, ranying pandereh bunu, tuntang sipet lumpung nanjeman penyang. **15** Tambah uluh tingang apangà kuā:

Naraí bulan kasalā tingang anak ketun sintung telu, itah balaku asi umba Ranying Hatala ewen due Jata Balawang Bulaú nabasan akan ketun sintung telu.

16 Yē Manyameí Tunggul Garing Janjahunan Laut ewen due Kameluh Putak Bulaú Janjulen Karangan kuta-kutak pahalawu raweí kuā:

Jakā Ranying Hatala ewen due Jata Balawang Bulaú tau masi karangkan lingun uluh garing tarantangkù sintung telu.

17 Ranying Hatala ewen due Jata Balawang Bulaú puna usang handung hakatawan panalataí, kilaú bulan mating malawit dare. Hayak auh nyahu batengkung ngaruntung langit homboh malentar kilat basiring hawun, sanaman jete palus kajadian manjadi sintung telu duhung papan benteng, sintung telu ranying pandereh bunu, tuntang sintung telu kea sipet lumpung nanjeman penyang. **18** Limbah kajadian urasà, taluh je ingahandak awi ewen sintung telu, duhung papan benteng, ranying pandereh bunu, tuntang sipet lumpung nanjeman penyang, hemben te palus

atun intu bentuk parung mahawang. **19** Hete uluh tingang apangà nyahuan garing tarantang ewen sintung telu haya-hayak haduanan ayū tuntang kanahuangà. **20** Amun ewen sintung telu jadi atun nuntun duhung papan benteng, ranying pandereh bunu, tuntang sipet lumpung nanjeman penyang huang bentuk labehu parung mahawang, te ewen sintung telu palus haduanā. **21** Ampī Raja Sangen tuntang Raja Sangiang magun taratekap je bara sanaman lampang, Raja Bunu magun taratekap je bara hila puntung sanaman leteng. **22** Kalute ampin kahandak Ranying Hatala ewen due Jata Balawang Bulaú, jadi manenga tingkes akan garing tarantang Manyameí Tunggul Garing Janjahunan Laut ewen due Kameluh Putak Bulaú Janjulen Karangan, sintung telu te. **23** Rimā hila puntung sanaman lampang, ain Raja Sangen tuntang Raja Sangiang, jete puna inatap awi Ranying Hatala ewen due Jata Balawang Bulaú. **24** Raja Bunu tempun je hila leteng, iatuh awi Ranying Hatala ewen due Jata Balawang Bulaú, mahaga lewu injam tingang, Pantaí Danum Kalunen kareh je bagin mateí.

25 Kalute ampin kakare taluh je kajadian huang katika jete, jadi iatuh awi Ranying Hatala ewen due Jata Balawang Bulaú.

24 Raja Sangen, Raja Sangiang, tuntang Raja Bunu kanuah gajah bakapek bulaú unta hajaran tandang barikur hintan

1 Miar andaú miar kea alem. Raja Sangen, Raja Sangiang, tuntang Raja Bunu puna hanjak rantang pahalawang

huangà, rindang pahateluk kalingū, jadi atun mahaga duhung papan benteng, ranying pandereh bunu, tuntang sipet lumpung nanjeman tingang je jadi injadian awi Ranying Hatala ewen due Jata Balawang Bulaú. **2** Bilak dia bahelang andaú ewen sintung telu tulak mengan mambuung lawang, hakaliling Bukit Batu Nindan Tarung, Kereng Rabia Nunyang Hapalangka Langit, nyamah kare metu burung uras nunjung ikeh tingang nantan pain bukit.

3 Kilen kea panalataí Ranying Hatala ewen due Jata Balawang Bulaú malaluhan gajah bakapek bulaú unta hajaran tandang barikur hintan mijen Bukit Engkan Penyang. **4** Taluh je ingahandak awi Ranying Hatala ewen due Jata Balawang Bulaú malaluhan gajah bakapek bulaú mijen Bukit Engkan Penyang jadi handung hakatawan awi Manyameí Tunggul Garing Janjahunan Laut ewen due Kameluh Putak Bulaú Janjulen Karangan janjaruman awi Ranying Hatala. **5** Yē Manyameí Tunggul Garing Janjahunan Laut ewen due Kameluh Putak Bulaú Janjulen Karangan malawu raweí umba garing tarantangà sintung telu:

*Umbet lalaú ketun sintung telu batanjung panjang mambuung lawang parintaran tingang, mengan kare burung metu hakaliling Bukit Batu Nindan Tarung, Kereng Liang Nunyang Hapalangka Langit tuh. **6** Hayak je puna mahatengkangkù akan ketun sintung telu, ela nanturung Bukit Engkan Penyang awi hete tege hatuen nyaring je gila-gila enteng, busun sahakung je saru-saruí hanyi, tau entā ketun*

sintung telu manta-manta dia hanyeren belai, nelē bula-bulat dia hagarut balengkung.

7 Raweí garing tarantangà sintung telu:

Iyoh tingang apang. Akan naraí kea gawin ikeí sintung telu nanturung Bukit Engkan Penyang, amun puna tege hatuen nyaring je gila-gila enteng, busun sahakung je saru-saruí hanyi, baka ike-ikeh mateí. Are beweí bukit je beken eka ikeí sintung telu mengan mambuung lawang.

8 Kilen kea sinde andaú, ewen sintung telu tulak tinaí mengan mambuung lawang, ngumbang ngaliling Bukit Batu Nindan Tarung, ngalingkang Kereng Liang Nunyang Hapalangka Langit, leka eleh tunis nyalantinaú buang, jatun kare metu burung. **9** Kuan Raja Sangen:

Mateí indang tasang bunu bilin banama, itah sintung telu karuhung aring, bilang jatun nuntun garisik sarahempun kare tupaí mandiwuí.

10 Yē Raja Sangen tinaí malawu raweí:

Kilen jakā itah sintung telu karuhung aring nanturung Bukit Engkan Penyang ambun andaú jetuh, awi puna dia puji itah sintung telu nanturung hete.

11 Kuan raweí Raja Sangiang:

Ela gilang tingang karuhung aring, basa uluh tingang apang jadi nahatengkang itah sintung telu nanturung Bukit Engkan Penyang.

12 Raweí Raja Bunu:

Akan naraí kea duhung papan

benteng, ranying pandereh bunu, tuntang sipet lumpung nanjemen penyang tuh amun dia hapan itah ngabanting hatuen nyaring je gila-gila enteng, busun sahakung je saru-saruí hanyi, ela itah sintung telu nunjung ikeh tingang.

13 Kuan riwut rawéi tambun paharī Raja Sangen tuntang Raja Sangiang:

Iyoh, pajing itah sintung telu nanturung Bukit Engkan Penyang te.

14 Yē ewen sintung telu mangkin nangkaruan tambang nanturung Bukit Engkan Penyang, kueh balandung tahi ewen sintung telu sembang Bukit Engkan Penyang.

15 Bara keja-kejaú eleh taratuntun awi ewen sintung telu pahalendang gajah bakapek bulaú unta hajaran tandang barikur hintan, puna lenda-lendang, linge-lingeí sinde. **16** Manting nangkaruan tambang ewen sintung telu hasanselu nanturung gajah bakapek bulaú unta hajaran tandang barikur hintan, haya-hayak sembang palus nekapà. **17** Ewen sintung telu sama njijit nyaratunda, nyaratunda ngaju nyarantunda ngawa hayak malawu rawéi kuan Raja Sangen: “*Aku tempū!*” Kuan Raja Sangiang: “*Aku tempū!*” Kuan Raja Bunu: “*Aku tempū!*” Hai lalentun tingang ewen sintung telu hatakia.

18 Nahingan lalentun tingang garing tarantangà je hatakian gajah bakapek bulaú unta hajaran tandang barikur hintan, Manyameí Tunggul Garing Janjahunan Laut ewen due Kameluh Putak Bulaú Janjulen Karangan palus manting nangkaruan tambang

nyembang Bukit Engkan Penyang. **19** Sembang Bukit Engkan Penyang, Manyameí Tunggul Garing Janjahunan Laut palus malawu rawéi:

Iyo-iyoh garing tarantangkù ketun sintung telu, ela gilang tingang manakian gajah bakapek bulaú unta hajaran tandang barikur hintan. Keleh ketun sintung telu sama-sama tempū, sama-sama kea mahagā.

20 Kuan rawéi Raja Sangen nyulang auh rawéi tingang apangà:

Aku je tempū awi aku je helu nuntū.

21 Kuan rawéi Raja Sangiang nyulang rawéi tambun paharī Raja Sangen:

Dia! Aku tuh je tempū awi aku je helu nuntū tuntang aku je helu sembangà.

22 Kuan rawéi Raja Bunu nyulang rawéi tambun paharī sintung due:

Aku je tempū awi aku je helu nuntū tuntang aku kea je helu nekapà.

23 Ulih giri gagariten Raja Sangen nahingan riwut rawéi tambun paharī ewen sintung due, hayak nyilak nyahumpak duhung papan benteng palus nambekā gajah bakapek bulaú unta hajaran tandang barikur hintan. **24** Eleh pajanjuri dahan gajah bakapek bulaú unta hajaran tandang barikur hintan nyua-nyuang panalusung lawung, menu-menu sangku raja, palus basaluh manjadi rangkan panataú simpan, iran panyambungan sukup. **25** Magun pajanjuri tinaí daha gajah bakapek bulaú unta hajaran tandang barikur hintan manjadi baras bulaú,

busung hintan, karangan lamiang, jadi bangkang balanga tingang, tambun repang garantung. **26** Yē nekap marut awi uluh tingang apangà Manyameí Tunggul Garing Janjahunan Laut awan tambekan duhung papan benteng Raja Sangen je intu gajah bakapek bulaú unta hajaran tandang barikur hintan, yē palus halit.

27 Kilen kea Raja Sangiang nuntun gawin tambun paharī Raja Sangen je kalute ampī, palus giri gagariten kea tanteng, hayak nyilak nyahumpak duhung papan benteng nambekan gajah bakapek bulaú unta hajaran tandang barikur hintan. **28** Hemben te kea pajanjuri dahan gajah bakapek bulaú unta hajaran tandang barikur hintan manjadi rangkan panataú simpan, baras bulaú, busung hintan, karangan lamiang, bangkang balanga tingang, tuntang tambun repang garantung. **30** Nekap marut tinaí awi uluh tingang apangà Manyameí Tunggul Garing Janjahunan Laut awan tambekan duhung papan benteng Raja Sangiang, palus halit haluli.

31 Kilen kea tambun paharī Raja Bunu ngumpang ngabehu huang, eleh giri gagariten tanteng, nuntun panataú panuhan ain uluh tambun paharī sintung due, je kajadian bara dahan gajah bakapek bulaú unta hajaran tandang barikur hintan. **32** Yē palus nyilak nyahumpak duhung papan benteng hayak nambekā kea gajah bakapek bulaú unta hajaran tandang barikur hintan. **33** Pajanjuri dahan gajah bakapek bulaú unta hajaran tandang

barikur hintan nata petak sintel habalambang tambun, liang deret habangkalan karangan. **34** Hayak auh nyahu batengkung ngaruntung langit hombob malentar kilat basiring hawun, dahan gajah bakapek bulaú unta hajaran tandang barikur hintan je manata petak sintel habalambang tambun, liang deret habangkalan karangan te basaluh manjadi rangkan panataú simpan.

35 Sukup jadi dahan gajah bakapek bulaú unta hajaran tandang barikur hintan pajanjuri. Yē uluh tingang apangà Manyameí Tunggul Garing Janjahunan Laut nekap marut awan tambekan duhung papan benteng Raja Bunu, kueh tau halit haluli. **36** Nyuhunyuhan pajanjuri dahan gajah bakapek bulaú unta hajaran tandang barikur hintan manata petak sintel habalambang tambung, liang deret habangkalan karangan, hayak te kea nunjung tambangà masuh pamahimping langit nyamah sembang Tumbang Panjungan Manjung.

37 Gajah bakapek bulaú unta hajaran tandang barikur hintan, palus menter intu Tumbang Panjungan Manjung, hayak pajanjuri dahā mujan hila pantai kalunen nata hulu batang danum, sungeí saka, bukit gantung, puruk batu ambu. Yē bukū Pantai Danum Kalunen are batang danum, sungeí saka, uras bakandung bulaú tuntang hintan. **38** Dahan gajah bakapek bulaú unta hajaran tandang barikur hintan je manata hunjun petak te basaluh manjadi sambarana kare gita kayu, tuntang gitan kayu te uras tau hapa manuwe bulaú pungal raja tuntang tuwen peres baratus karē. **39** Bara hete nunjung tambangà gajah bakapek bulaú

unta hajaran tandang barikur hintan haratean pamahimping langit ngumbang hila Pantaí Danum Sangiang, hayak pajanjuri dahā manata Pantaí Danum Sangiang uras basaluh manjadi baras bulaú, busung hintan, tuntang karangan lamiang. ⁴⁰ Awi te bukū Pantaí Danum Sangiang uras hapanataú baras bulaú, busung hintan, tuntang karangan lamiang, kajarian dahan gajah bakapek bulaú unta hajaran tandang barikur hintan. ⁴¹ Limbah te tinaí gajah bakapek bulaú unta hajaran tandang barikur hintan nunjung tambangà huang hulu Batang Danum Tiawu Bulaú. Iē palus mateí hete. Awi te bukū Batang Danum Tiawu Bulaú habusung hintan, hakarangan lamiang, eka je tatau dia rumpang tulang, isen bakalesu uhat, tuntang hetuh eka je inyewut awi Ranying Hatala bagare Lewu Tataú. ⁴² Tinaí hantun gajah bakapek bulaú unta hajaran tandang barikur hintan basaluh manjadi kayu nyaraka alam je ngambang bulaú gagenep andaú, malelak hintan gagenep bulan, mandawen timpung bembang gawang, mamotok garanuhing kurik, mamua lamiang bua garing belum, mamating suling ringun tingang, babuku tisin pangarikir bintang, mujan Nyalung Kaharingan Belum, mijen Lewu Tataú Dia Rumpang Tulang, Rundung Raja Isen Kamalesu Uhat.

⁴³ Kalute ampin taluh handiaí je jadi kajadian itu Bukit Batu Nindan Tarung, Kereng Liang Bantilung Nyaring hemben te.

25 Raja Sangen nanturung Bukit Bulaú Kangantung Gandang, Kereng Rabia Nunyang Hapalangka Langit

¹ Limbah Raja Sangen, Raja Sangiang, tuntang Raja Bunu kanuah gajah bakapek bulaú unta hajaran tandang barikur hintan, ewen gandang halalian buli Bukit Batu Nindan Tarung, Kereng Liang Bantilung Nyaring.

² Jadi pire-pire katahī, ewen sintung telu sama nunjung kanumpuh bujang. Yē uluh tingang apangà maatuh karangkan lingū madu manyahuan garing tarantangà nanturung Bukit Bulaú Kangantung Gandang, Kereng Rabia Nunyang Hapalangka Langit. Kuan uluh tingang apangà Manyameí Tunggul Garing Janjahunan Laut:

³ Ikaú garing tarantangkù Raja Sangen batulak nanturung Bukit Bulaú Kangantung Gandang, Kereng Rabia Nunyang Hapalangka Langit, janjaruman panalataí ketun haring sintung telu je jadi kanuah gajah bakapek bulaú unta hajaran tandang barikur hintan umba Ranying Hatala.

⁴ Kueh balandung tahi, Raja Sangen palus tingang lunuk nanturung Bukit Bulaú Kangantung Gandang, Kereng Rabia Nunyang Hapalangka Langit. Huang kabentengan Raja Sangen batanjung panjang, iē salenga atun kanuah ije biti bawi kangumban sinjang, habineí kamangkang luyang. ⁵ Ampī Ranying Hatala jadi atun malaluhan ije biti bawi kangumban sinjang akan Raja Sangen, hayak Ranying Hatala manyewut gangguraran aran bawi te bagare Kameluh Kambang Garing. ⁶ Hanjak

rantang pahalawang huang Raja Sangen jadi atun kanuah ije biti bawi kangumban sinjang puna bahalap dia lalangena. Yē palus imbità gandang halalian buli nanturing Bukit Batu Nindan Tarung, Nyahendeng Kereng Liang Bantilung Nyaring. **7** Sembang Bukit Batu Nindan Tarung, Nyahendeng Kereng Liang Bantilung Nyaring, Raja Sangen tuntang bawi kangumban sinjang je inuah awi Ranying Hatala akā palus iē janjaruman panalatai akan uluh tingang apangā ewen due burung indangā, tuntang tambun paharī sintung due. Kuan Raja Sangen:

***8** Tuh aku atun kanuah ije biti bawi kangumban sinjang bara Ranying Hatala, tuntang bawi jetuh bagare arā Kameluh Kambang Garing.*

9 Tambah uluh tingang apangā Manyamei Tunggul Garing Janjahunan Laut kuā:

*Hakarang garing tarantangkū Raja Sangen, bawi kangumban sinjang jetuh puna inuah awi Ranying Hatala akan bulan bawi bambaīmū. **10** Pajing itah malalus akam gawi lunuk hakaja pating, baringen hatamuei bumbung, tumun peteh Ranying Hatala hajamban Raja Uju Hakanduang hemben helu akan burung indangmū.*

11 Hemben ewen malalus gawi lunuk hakaja pating, baringen hatamuei bumbung akan Raja Sangen tuntang hemben te Raja Uju Hakanduang atun hadurut umba mameteng lilis lamiang bua garing belum, hayak manyaki Raja Sangen ewen due bulan bawi bambaia

mahapan dahan manuk bawui. **12** Limbah te Raja Sangen ewen due bulan bawi bambaia Kameluh Kambang Garing maatuh kabalumā belum jadi batang panjang huma hai parantaran lumbah.

13 Sama jadi are katahi, Raja Sangen ewen due bulan bawi bambaia maatuh kabalumā belum, ewen due narantang Raja Rahanjang Garing. Raja Rahanjang Garing narantang Raja Rarusir Kilat; Raja Rarusir Kilat narantang Raja Patunggul Nyahu; Raja Patunggul Nyahu narantang Raja Uhat Malatar Langit; Raja Uhat Malatar Langit narantang Raja Bungking Kalipapa Tanduk; Raja Bungking Kalipapa Tanduk narantang Raja Lalunjung Duhung; Raja Lalunjung Duhung narantang Raja Lalunjung Penyang. **14** Tinai Raja Lalunjung Penyang narantang Tantaulang Bulaú. Raja Tantaulang Bulaú narantang epat walas biti iete Raja Pantap Nyahu, Raja Hanggulan Bunu, Raja Garing Harenteng, Raja Garing Haleuh, Raja Garing Halembai, Raja Garing Harenayau, Raja Garing Haresap, Raja Garing Penyang Tantahila, Raja Nampuí Bungaí, Raja Pampulaú Hawun, Raja Panyarawan Katingan, Kameluh Endas Bulaú Lisan Tingang, Kambang Garing Lelak Lamiang Manas Kaput Pisi Tehang, Kameluh Mandalan Bulan, tuntang Raja Punduk Nyahu.

15 Kalute ampin kajadian awi Ranying Hatala huang pabelum Raja Sangen, bara gantung Bukit Batu Nindan Tarung, Kereng Liang Bantilung Nyaring.

26 Raja Sangiang nanturung Bukit Bulaú Kangantung Gandang, nyahendeng Kereng Rabia Nunyang Hapalangka Langit

1 Limbah kajadian je atun akan garing tarantangà Raja Sangen, te uluh tingang apangà Manyameí Tunggul Garing Janjahunan Laut ewen due bulan bawi bambaíà hamauh tinaí umba garing tarantangà Raja Sangiang. **2** Kuan pahalawu raweíà:

Ikaú garing tarantangkù Raja Sangiang, batulak kea nanturung Bukit Bulaú Kangantung Gandang, nyahendeng Kereng Rabia Nunyang Hapalangka Langit kilaú tambun paharim Raja Sangen.

3 Nahingan riwut raweí uluh tingang apangà kalute, yē Raja Sangiang tingang nulak lunuk nanturung Bukit Bulaú Kangantung Gandang, nyahendeng Kereng Rabia Nunyang Hapalangka Langit. **4** Kueh balandung tahi janjulanā, yē Raja Sangiang sembang Bukit Bulaú Kangantung Gandang, nyahendeng Kereng Rabia Nunyang Hapalangka Langit. **5** Kabentengan Raja Sangiang nyapende kayu erang tingang, luhung kayu andung nyahu, tahanjungan Bukit Bulaú Kangantung Gandang, yē Ranying Hatala tinaí malaluhan ije biti bawi kangumban sinjang akan Raja Sangiang. **6** Bawi kangumban sinjang te inanggare awi Ranying Hatala gangguranaan arā bagare Kameluh Kambang Runjan, bawi bahalap kilaú bulan babangkang langit. **7** Hanjak rantang pahalawang huang Raja Sangiang mite kahalap bawi te je jadi inuah awi Ranying Hatala akā. **8**

Hemben te kea Raja Sangiang mimbit bawi te gandang halalian buli nanturung Bukit Batu Nindan Tarung, Kereng Liang Bantilung Nyaring. **9** Sembang Bukit Batu Nindan Tarung, Kereng Liang Bantilung Nyaring, Raja Sangiang janjaruman panalataíà akan uluh tingang apangà, iē jadi atun kanuah ije biti bawi kangumban sinjang sama kilaú akan tambun paharī Raja Sangen. **10** Hanjak rantang pahalawang huang uluh tingang apangà umba garing tarantangà Raja Sangiang je jadi kanuah ije biti bawi kangumban sinjang, hayak iē malawu raweí:

Jetuh garing tarantangkù Raja Sangiang puna jadi injadian awi Ranying Hatala akan ndu bulan bawi bambaímù.

11 Raweí Raja Sangiang:

Amun kilaú te, kilen ampin panalataí lingun itah tinaí umba bawi tuh tingang apang?

12 Tambah Manyameí Tunggul Garing Janjahunan Laut ewen due bulan bawi bambaíà Kameluh Putak Bulaú Janjulen Karangan:

Amun kilaú etuh panalataí, itah mawi gawi lunuk hakaja pating, baringen hatamueí bumbung akan garing tarantang itah Raja Sangiang.

13 Limbah te, yē uluh tingang apangà ewen due burung indangà malalus gawi hakaja pating, baringen hatamueí bumbung akan uluh garing tarantangà Raja Sangiang, hayak huang katika te atun hadurut kea Raja Uju Hakanduang. **14** Ewen mameteng lamiang bua garing belum hayak manyaki duhung turus tungkup, pulang

kalangkang ruang, Raja Sangiang ewen due Kameluh Kambang Runjan je nampara mangun kabalumā belum jadi batang panjang huma hai parantaran lumbah.

15 Are kea katahī jadi Raja Sangiang ewen due Kameluh Kambang Runjan maatuh kabalumā belum, yē palus atun kanuah garing tarantang. **16** Ewen sintung due narantang Nyalung Tatu Sangiang. Nyalung Tatu Sangiang narantang Gambalang Rajan Sangiang; Gambalang Rajan Sangiang narantang Garing Tanduh Nyahu; Garing Tanduh Nyahu narantang Sawang Tanduh Nyahu; **17** Sawang Tanduh Nyahu narantang Raja Sariantang Penyang; Raja Sariantang Penyang narantang Raja Samatian Tingang; Raja Samatian Tingang narantang Raja Tanduh Bulaú Tangkurajan Sangiang. **18** Raja Tanduh Bulaú Tangkurajan Sangiang narantang hanya biti iete Raja Duhung Mama Tandang Langkah Sawang Apang Bungaí Sangiang, Raja Sawang Bapa Bungaí Sangiang, Raja Antang Tempun Mihing, Raja Duhung Kiting Tambun, Raja Dahiang Mantung Bulaú, Raja Mantir Mama Luhing Bungaí Salutan Raja Nalawung Bulaú, Raja Mama Rahuí Bungaí, tuntang Kameluh Rangkang Sangiang.

19 Kalute ampin kajadian je jadi iatuh awi Ranying Hatala akan Raja Sangen ewen due bulan bawi bambaià Kameluh Kambang Runjan.

27 Raja Bunu nanturung Bukit Bulaú Kangantung Gandang, nyahendeng Kereng Rabia Nunyang Hapalangka Langit

1 Kilen kea limbah kakare taluh je jadi

injadian awi Ranying Hatala akan Raja Sangen ewen due Raja Sangiang kalute ampī, te tambun paharī Raja Bunu paham ngumpang ngabehu huang. **2** Yē Raja Bunu malawu raweí umba uluh tingang apangà ewen due burung indangà:

Tambun paharingkù sintung due uras atun dinun bulan bawi bambaià. Hamparea aku tuh tau nanturung Bukit Bulaú Kangantung Gandang?

3 Hayak tinaí pahalawu raweíà:

Mbuhen aku hindaí atun Ranying Hatala manuah aku kilaú manuah tambun paharingkù sintung due?

4 Yē tumbah uluh tingang apangà ewen due burung indangà:

Iyoh tingang garing tarantangkù Raja Bunu, tutu kea pahalawu raweímù. Amun kalute pajing bitim batulak nanturung Bukit Bulaú Kangantung Gandang, nyahendeng Kereng Rabia Nunyang Hapalangka Langit.

5 Kueh balandung tahi Raja Bunu palus tingang nulak lunuk nanturung Bukit Bulaú Kangantung Gandang, nyahendeng Kereng Rabia Nunyang Hapalangka Langit. **6** Kabentengan Raja Bunu batanjung panjang nyembang Bukit Bulaú Kangantung Gandang, Ranying Hatala usa-usang jadi handung hakatawan panalataià. **7** Yē Ranying Hatala palus malaluhan ije biti hampatung bawi kangumban sinjang intu kabentengan Raja Bunu nanturung Bukit Bulaú Kangantung Gandang, nyahendeng Kereng Rabia Nunyang Hapalangka Langit. **8** Hampatung bawi kangumban sinjang te

bahalap tutu sama bulan babangkang langit, hayak Ranying Hatala nanggare gangguranan arā bagare Kameluh Tanteluh Petak, tuntang hindaí atun aseng ngangkanā. **9** Kilen kea Raja Bunu puna surung janjulana, palus iē hasembang umba hampatung Kameluh Tanteluh Petak, tutu bahalap sama bulan babangkang langit, baya ije ih bulan kasalā hampatung bawi te jatun aseng ngangkanā. **10** Kuan raweí Raja Bunu:

Mateí indang tasang bunu bilin banama, leha-lehan kasial lingungkū lalaú kanuah Ranying Hatala aku lalangena, nyambung Jata Balawang Bulaú aku salampangen.

11 Mite taluh je kalute ampī, yē Raja Bunu palus gandang halalian buli nanturung Bukit Bulaú Kangantung Gandang, nyahendeng Kereng Rabia Nunyang Hapalangka Langit. **12** Hampatung bawi kangumban sinjang te, awi jatun aseng ngangkanā, ilih ekā ih, dia mimbitā gandang halalian buli.

13 Sembang iē Bukit Bulaú Kangantung Gandang, nyahendeng Kereng Rabia Nunyang Hapalangka Langit, te Raja Bunu janjaruman panalataíà akan uluh tingang apangā tuntang burung indangā, bau iē atun kanuah hampatung bawi kangumban sinjang jatun aseng ngangkanā. **14** Kuan raweí uluh tingang apangā ewen due burung indangā:

Amun kilaú te panalataíà, ikaú garing tarantang Raja Bunu haquet nyembang Ranying Hatala balaku asi belum, palakuan awat maharing umba Iē.

15 Nahingan auh pahariwut raweí uluh tingang apangā kalute, yē Raja Bunu tingang tulak lunuk nyembang Ranying Hatala balaku asi belum, palakuan awat maharing. **16** Sana jadi hasembang tanduk, Raja Bunu palus janjaruman panalataíà umba Ranying Hatala, bau iē atun kanuah hampatung Kameluh Tanteluh Petak jatun aseng ngangkanā. **17** Malawu raweí Raja Bunu kuā:

Pasi aku Ranying Hatala, ujan akangkū Nyalung Kaharingan, uka hampatung je atun sembangkū kabentengan jalan tau belum tuntang atun aseng ngangkanā kilaú uluh bawi je manjadi kabalin paharingkū ewen due.

18 Kuan Ranying Hatala nyulang raweí Raja Bunu:

Hetuh Aku masi bitim. Pajing ikaú haduanan Nyalung Kaharingan Belum jetuh.

19 Yē Raja Bunu palus malusut luhing pantung tingang hapā nantalaí Nyalung Kaharingan Belum, guhung panaling aseng, bara Ranying Hatala. **20** Limbah jadi luhing pantung tingang basuang Nyalung Kaharingan Belum, guhung panaling aseng, kilen kea luhing pantung tingang palus nganderang hayak nunjung taribang. **21** Hayak auh nyahu batengkung ngaruntung langit homboh malentar kilat basiring hawun, luhing pantung tingang basaluh manjadi tingang rangga bapantung nyahu. **22** Tingang rangga bapantung nyahu palus mijen lunuk jayang tingang baringen sempang tulang tambarirang intu Pantaí Danum Sangiang, jete je tau nganderang nambang tamueí banama tingang

mandulang bulaú untung panjang akan pambelum kalunen.

23 Yē nantalaí tinaí awi Raja Bunu mahapan lumpang bulaú tanduk tambun. Sana basuang Nyalung Kaharingan Belum, lumpang bulaú tanduk tambun palus hajanjeluí hayak naseran kalang labehu handalem. **24** Lumpang bulaú tanduk tambun te, hayak auh nyahu batengkung ngaruntung langit homboh malentar kilat basiring hawun basaluh manjadi tambun baputi ihing bajaleang, palus naseran kalang labehu handalem, mijen labehu Tumbang Ulang Haganjen, labehu Tumbang Ulang Hagandang, Petuk Kanarewung Antang, badaha Nyalung Kaharingan Belum, nambang tamueí banama tingang, mandulang bulaú untung aseng panjang akan pambelum kalunen.

28 Raja Bunu inyundaú awi Anguí Bungaí Mama Lengai Tingang

1 Mite ampin kakare kajadian je kalute, Raja Bunu buli mimbit kapehen ateíà, mite hampatung bawi je ilaluhan awi Ranying Hatala akā palus jatun aseng ngangkanā, awi Nyalung Kaharingan Belum je inenga Ranying Hatala akā dia sampet iē mimbit nanturung hampatung uluh bawi te. **2** Raja Bunu gandang halalian buli nanturung Bukit Batu Nindan Tarung, janjaruman panalataíà kakare ampin kajadian huang janjulana, akan uluh tingang apangà Manyameí Tunggul Garing Janjahunan Laut ewen due indangà Kameluh Putak Bulaú Janjulen Karangan, hayak iē hamauh:

Lalaú kasial lingungkù. Ampī jatun ati pasin Ranying Hatala

akangkù, uras mambalang karangkan huangkù.

3 Tambah uluh tingang apangà Manyameí Tunggul Garing Janjahunan Laut ewen due burung indangà Kameluh Putak Bulaú Janjulen Karangan:

Pajing bitim tinaí anakkù Raja Bunu haquet nyembang Ranying Hatala. Hete bitim nambangà hapan lamiang bua garing belum. Itah tatap balaku asi belum, palakuan awat maharing tinaí umba Ranying Hatala. Jetuh pea bitim tau rise raweīmù, awi Ranying Hatala jadi maatuh kakare taluh handiaí manumun je ingahandak awī.

4 Yē Raja Bunu haguét tinaí nanturung Bukit Bulaú Kangantung Gandang, palus iē hasembang tanduk umba Ranying Hatala. Raja Bunu malawu raweí kuā:

Iyoh Ranying Hatala, tuh aku atun karamahan dumah tinaí balaku asi belum. Uka Ranying Hatala mambelum akangkù hampatung uluh bawi je jadi ilaluhan Ranying Hatala akangkù. Awi nyamah ambun andaú jetuh palus hindaí atun aseng ngangkanā.

5 Ranying Hatala masi Raja Bunu. Palus iē nanjuri Nyalung Kaharingan Belum je inantalaí awi Raja Bunu mahapan lamiang bua garing belum. Harū ulih mijen luwangà hayak kea Ranying Hatala hapeteh raweí umba Raja Bunu kuā:

Bitim Raja Bunu bajeleng ih mimbit Nyalung Kaharingan

*Belum jatuh buah-buah hapam
mabelum hampatung uluh bawi
je katamparā bara petak kalabien
bulan, bayan intan Nyalung
Kaharingan je bara Aku.*

6 Hayak huang katika jete kea Ranying Hatala tinaí magun hapeteh raweí umba Raja Bunu:

*Tuh bitim rende-rendeng mimbit
Nyalung Kaharingan Belum jatuh
je hapam mabelum hampatung
uluh bawi te, tuntang keleh bitim
bingat auhkù. Jatun Ranying
Hatala je beken, malengkan tikas
Aku kabuat. 7 Tuntang ela ikaú
tende-tendea huang kabentengan
janjalunan, aluh atun uluh
nahuang pander sarita umba
bitim, ela bitim bapander umba
iē, manih tinaí amun iē manyewut
arepā ranying hatala, ela bitim
nahingan auhà, basa tikas Aku
Ranying Hatala je masi mawat
bitim. 8 Tinaí kareh amun bitim
jadi hasembang tanduk umba
hampatung uluh bawi te, bitim
nantisan Nyalung Kaharingan
Belum mijen junjun karepurū,
hayak amun iē jadi belum, pajing
ih bitim mimbità gandang
halalian buli nanturung Bukit
Batu Nindan Tarung, palus
janjaruman akan uluh tingang
apangmù Manyameí Tunggul
Garing Janjahunan Laut ewen
due tingang indangmù Kameluh
Putak Bulaú Janjulen Karangan,
uka ketun due bajeleng malalus
gawi lunuk hakaja pating,
baringen hatamueí bumbung.*

9 Nahingan pahariwut raweí Ranying Hatala kalute, hanjak rantang

pahalawang huang Raja Bunu kuā:

*Puna tutu kea Ranying Hatala tuh
masi uluh aku.*

Limbah hapeteh raweí te Ranying Hatala palus lilap dia gitan hindai. Raja Bunu palus mananjung nanturung hampatung bawi je jadi ilaluhan awi Ranying Hatala akā.

10 Kabentengan Raja Bunu batanjung mimbit lamiang buah garing belum je ihajipā mahapan nyamā, hayak iatepā mahapan lukapā hapamuntung, te salenga tege ih uluh ije bitim manyewut arepā:

*Aku tuh ranying hatala
manyembang bitim Raja Bunu.*

11 Tinaí auh uluh te hamauh:

*Aku tuh je puna ranying hatala
aim Raja Bunu. Keleh ikaú
tambah auhkù tuh!*

Raja Bunu mingat peteh Ranying Hatala umba iē. Puna giri gagariten tanteng nahingan pahalawu uluh je kalute auhà, palus kilen kuā huang ateíā:

*Mbuhen salenga tege uluh je
manyewut arepā ranying hatala?*

12 Kalute laju-lajur auh pander uluh te umba iē nyamah manyewut Raja Bunu je dia maku tambah bapander umba iē te badengen, hayak Raja Bunu rangkarakah mananjung marak nyarenan angkat kasingī umba uluh je jatun hakalayan misek janjulanā te, tuntang je sapuna jatuh panarantang Manyameí Tempun Telun Tingang je bagare Anguí Bungaí Mama Lengai Tingang. **13** Kilaú bulan kanahuangā Raja Bunu nyulang raweí Anguí Bungaí Mama

Lengai Tingang je halajur nasekan iē huang benteng janjulanā te pama iē laju-lajur sinde hamauh umba Raja Bunu kuā:

Narai haweh taluh je imbitmū nyamah tanjungmū rangkah-rangkah kalute ampī, kilau uluh batimpang Raja Bunu?

14 Hindaí Raja Bunu tumbah auhà, hamauh tinaí Anguí Bungaí Mama Lengai Tingang kuā:

Akan duem kea Nyalung Kaharingan Belum jikaú nah Raja Bunu? Amun uluh bawi je akan ingguangmū nah jadi usang ih aku mambelumà, usa-usang jadi atun aseng ngangkanā.

15 Nahingan pahariwut rawei Anguí Bungaí Mama Lengai Tingang manyewut arepà ranying hatala, te palus tumbah Raja Bunu:

Kai iē jadi bitim mambelumà?

16 Awi Raja Bunu tumbah auh Anguí Bungaí Mama Lengai Tingang je halajur manderoh iē, te salenga kalagahan ih supu lamiang bua garing belum akan petak, palus bapuntung due. **17** Kuan Raja Bunu:

Ceh ah! Leha-lehā kapurum. Amun puna ikaú ranying hatala, akan narai kea ikaú nyamah manderoh aku, nyamah supu lamiang bua garing belum kalagahan bapuntung due kalutuh ampī.

18 Yē kuan Anguí Bungaí Mama Lengai Tingang je manyewut arepà ranying hatala:

Akan duem kea taluh te nah, basa

bawi je akan kabalim te usa-usang ih iē jadi belum atun aseng ngangkanā.

19 Kilen kea supu lamiang bua garing belum je bapuntung pelek due, puntungà palus basaluh manjadi gusi renteng bapampang pulu, je bakandung Nyalung Kaharingan Belum, sundaú awi katungaú rajan bawuí. Jetuh je narantang bawuí himba akan Pantaí Danum Kalunen. **20** Ije puntungà tinaí basaluh manjadi bakam batu sariampung tuhan, je bakandung Nyalung Kaharingan Belum kea, jete inyundaú awi tekaí tingang tenjeh tambun arā. **21** Tinaí Nyalung Kaharingan Belum je manata hunjun petak sintel jete basaluh manjadi Bukit Bulaú Tampung Tahaseng intu upun garing tungket langit, je halajur manahasak Nyalung Kaharingan Belum, je manjadi Tasik Kaharingan, tuntang hete atun garing nganderang sukah lumpung matan andaú.

22 Puna giri gagariten tanteng Raja Bunu umba ampin kakare taluh je kajadian akā huang katika te, hayak iē kuta-kutak kuā:

Lalaú kajawah lingum nyamah nantipaí supu lamiang bua garing belum, kapadahal Nyalung Kaharingan Belum jete puna jadi imeteh awi Ranying Hatala akangkù, hapangkù mambelum hampatung bawi je jadi inuah akangkù.

23 Kuan rawei Anguí Bungaí Mama Lengai Tingang:

Narai je usah bitim mambelumà, usa-usang ih jadi aku mambelumà, puna bara endaú

*jadi aku janjaruman akam,
nambangkù riwut akan tahasengà,
lakukù danum akan ndahang
dahā, tuntang lakukù petak akan
ndahang isi.*

24 Kuan raweí Raja Bunu:

*Ikaú dia handung hakatawan je
puna manjadi kahandak aingkù,
aku balaku ulun kalunen kareh
bara panakan aingkù je dia tau
mateí.*

25 Nyulang raweí Anguí Bungaí Mama
Lengai Tingang kuā:

*Amun ulun kalunen te dia tau
mateí, dia balang kuntep petak
danum eka ewen mijen.*

26 Nyulang raweí tinaí Raja Bunu kuā:

*Aku balaku batang danum murik
sila, masuh sila dehesà, mangat
esungkù dapit jeha, amun ewen
manampa jalanā murik masuh,
dia heka tulang uhatà.*

27 Kuan Anguí Bungaí Mama Lengai
Tingang nyulang raweí Raja Bunu:

*Kueh tau kalute. Basa taluh je
bagare batang danum, puna tege
hulū tege kea tumbangà. Rimā dia
puji danum te murik nyamah
sembang hulū.*

28 Limbah te tinaí, kuan raweí Raja
Bunu:

*Aku balaku batang danum bujur-
kabajuran.*

Tambah tinaí Anguí Bungaí Mama
Lengai Tingang kuā:

*Amun tau sikungkù tuh bujur, tau
kea batang danum te bujur-
kabajuran. Amun sikungkù tuh*

kalok, kalok kea batang danum.

29 Sua-sual, jawa-jawab tanteng ewen
sintung due, hayak puna atun giri
gagariten Raja Bunu palus nyilak
nyahumpakà duhung papan benteng,
hayak mambiwi Anguí Bungaí Mama
Lengai Tingang. **30** Kabentengan ewen
sintung due je sua-sual jawa-jawab te,
te salenga dumah Ranying Hatala
hayak Iē malawu raweí kuā:

*Ela gilang tingang ketun sintung
due, basa bitim Raja Bunu uka
ikaú handung hakatawan,
panakan ayum dapit jeha puna
akan bagin mateí. Te nah bukū
Aku malaluhan akam bawé je
jatun bara aseng ngangkanā. **31**
Hayak je mambagang tutu, awi
bara ketun haring sintung telu,
ikaú je jadi iatuhkù mahaga
sanaman leteng tuntang ikaú kea
je nambekan gajah bakapek
bulaú, unta harajan tandang
barikur hintan nyamah kabanting
mateí. **32** Tinaí bitim Anguí
Bungaí Mama Lengai Tingang je
sapuna bitim tuh iete bagare Nyai
Erang Matan Andaú Kilat
Panjang Dimpah Ruang Langit,
awi bitim jadi manambang riwut
akan tahasengà, lakum danum
akan dahā, lakum petak akan
ndahang isi, hapam mambelum
hampatung Kameluh Tanteluh
Petak, hete kareh panakan ayum
bagare Tinggi Tingang Mama
Hanyi Bungaí Sawang Bengkuí
Pangganti Balu je mijen Batang
Danum Rutas Mateí, hete iē
mentaí pandumah kakare liaú isi
daha je nabasan awim te palus iē
mahagā. **33** Tuh bitim Raja Bunu
pajing haduanan bawé*

kangumban sinjang jetuh mimbità gandang halalian buli nanturung Bukit Batu Nindan Tarung, Kereng Liang Bantilung Nyaring. 34 Tinaí amun bitim Raja Bunu jadi hasembang tanduk umba uluh tingang apangmù ewen due burung indangmù, te bitim janjaruman petehkù, uka ketun sintung due bajeleng ilalus gawi lunuk hakaja pating, baringen hatamueí bumbung.

35 Limbah jadi hapeteh raweí kalute, Ranying Hatala ewen due Jata Balawang Bulaú gandang halalian buli nanturung balaíà intu Batang Danum Banyahu Bulaú, Guhung Mangkilat Hintan. Kalute kea Nyahu Erang Matan Andaú Kilat Panjang Dimpah Ruang Langit gandang halalian buli nanturung balaíà intu Batang Danum Nyarakungkuí Nyahu. **36** Kalute kea Raja Bunu haduanan bawi kangumban sinjang Kameluh Tanteluh Petak, palus mimbità gandang halalian buli nanturung Bukit Batu Nindan Tarung, Kereng Liang Bantilung Nyaring.

37 Sana ië sembang parung mahawang intu Bukit Batu Nindan Tarung, hayak jadi hasembang tanduk umba uluh tingang apangà tuntang burung indangà, tambun paharì, yë Raja Bunu janjaruman panalataíà kilaú bulan mating malawit dare. **38** Uluh tingang apangà Manyameí Tunggul Garing Janjahunan Laut ewen due burung indangà Kameluh Putak Bulaú Janjulen Karangan nahingan panalataí garing tarantangà Raja Bunu tuntang atun peteh Ranying Hatala, te ewen sintung due malalus gawi lunuk hakaja pating, baringen hatamueí bumbung akan garing tarantangà Raja Bunu ewen due

Kameluh Tanteluh Petak. **39** Huang katika ewen malalus lunuk hakaja pating, baringen hatamueí bumbung akan garing tarantangà Raja Bunu, hete atun hadurut Raja Uju Hakanduang Kanaruhan Hanya Basakati, umba manyaki hayak mameteng lamiang bua garing belum. Ewen due malalus manumun peteh Ranying Hatala. **40** Limbah jadi malalus kakare gawi akan Raja Bunu, Raja Bunu ewen due Kameluh Tanteluh Petak maatuh kabalumā belum mangun batang panjang, huma hai parataran lumbah. **41** Bara hete tamparā Bukit Batu Nindan Tarung, Kereng Liang Bantilung Nyaring inyewut Lewu Bukit Batu Nindan Tarung, Rundung Kereng Liang Bantilung Nyaring.

42 Tinaí Raja Bunu ewen due Kameluh Tanteluh Petak manak manarantang epat walas biti iete Raja Manurun Bunu, Raja Kamenduh Bunu, Raja Maliambung Bunu, Raja Manyimpeí Penyang, Raja Pamahimping Langit, Raja Mandurut Bunu, Raja Jangkarung Tingang, Busu Dandan Kahayan, Manyameí Sunsunan, Tiung Malianā, Raja Mandurut Bulaú, Hawun Baru Barun, Sabuyung Nyaring Uhing, tuntang Sabira Nangguí Garantung.

43 Kalute ampin kakare kajadian je jadi manjadi tumun kahandak Ranying Hatala ewen due Jata Balawang Bulaú, je manjadi tamparan pambelum Pantai Danum Kalunen.

29 Ranying Hatala maningak mameteh Raja Bunu

1 Intu Lewu Bukit Batu Nindan Tarung, Rundung Kereng Liang Bantilung Nyaring, jadi are kare raja-raja tuntang

kameluh-kameluh mijen hete bara kakaren panarantang Manyamei Tunggul Garing Janjahunan Laut ewen due Kameluh Putak Bulaú Janjulen Karangan.

2 Huang ije katika Ranying Hatala hadurut nanturung Lewu Bukit Batu Nindan Tarung. Iē mameteh nantuajar Raja Bunu. **3** Katika jete uluh are hakampeleng renteng nahingan pahalawu rawei Ranying Hatala mameteh nantuajar Raja Bunu palus kakare garing tarantangà. **4** Hete Ranying Hatala bapander panjang umba Raja Bunu:

Tuh bitim palus panarantang aim, akan ilaluhan kareh manyuang batang petak je jadi injapa'kù hayak inyewutkù jete Pantai Danum Kalunen tuntang panarantang aim te dapit jeha puna bagin matei.

5 Tinaí kuan Ranying Hatala:

*Ela bitim ngumpang basule huang nahingan pahariwut rawei'kù, tarantang aim dia memen bewei, aluh ewen te puna bagin matei, te kareh tege panarantang tambun paharim je dia tau matei je akan haduanan ewen te kareh buli Aku. **6** Mbuhen tau kalute? Awi puna Aku tuh tamparan taluh handiaí, kalute kea Aku tuh je kahapusà.*

7 Limbah mahining auh Ranying Hatala mameteh nantuajar iē, te Raja Bunu ewen due bulan bawi bambaia Kameluh Tanteluh Petak paham hanjak rantang pahalawang huangà, palus kea kakare garing tarantangà. **8** Kuan Ranying Hatala tinaí:

Pama ketun handiaí te Raja Bunu

palus kakare garing tarantangmù ilaluhan manyuang Pantai Danum Kalunen, amun jadi umbet katika je inukas awi'kù akan harian andaú, ikaú induangkù haluli hinje Aku, hayak dia mahalaú pampatei.

9 Nampara bara katika jete, ampin Lewu Bukit Batu Nindan Tarung, Rundung Kereng Liang Bantilung Nyaring, puna lewu hai kanyamben lumbah, rundung datuh nyantagi miring, uluh are kilaú bitik rimpung nantelaí ruhung, tingkah salagate mirang, sahempun pasang, hila hulu nambing jalayan hulu danum, hila tumbang nambing panyaran pasang.

10 Kalute ampin kakare taluh je iatuh awi Ranying Hatala hemben huran, bara gantung Lewu Bukit Batu Nindan Tarung, Rundung Kereng Liang Bantilung Nyaring.

30 Nyai Endas Bulaú Lisan Tingang maatuh kabalumā belum

1 Garing tarantang Raja Tantauang Bulaú, bagare Nyai Endas Bulaú Lisan Tingang puna bahalap dia lalangena, bawi bahalap kilaú bulan babangkang langit. **2** Sana jadi tanggar kabujangà, kahalap Nyai Endas Bulaú Lisan Tingang paham batarung tutu intu Lewu Bukit Batu Nindan Tarung, Rundung Kereng Liang Bantilung Nyaring, huang Pantaí Danum Sangiang. **3** Are kea uluh je misek balaku iē, uras dia ulih manyarupu palaku je ilaku awi Nyai Endas Bulaú Lisan Tingang, awi puna kabeken tutu auh kambang palakū te.

4 Ampī kahalap uluh bawi bagare Nyai

Endas Bulaú Lisan Tingang te batarung nyamah sembang Raja Uju Hakanduang Kanaruhan Hanya Basakati. **5** Nahingan riwut tarung Nyai Endas Bulaú Lisan Tingang puna dia lue-luen, te ewen Raja Uju Hakanduang hampung hapakat madu haguét mamupuh misek Nyai Endas Bulaú Lisan Tingang akan ije bití bara ewen Raja Uju Hakanduang. **6** Kabulat pakat ewen je patut imatuh tuntang ulih manggau kambang palakun Nyai Endas Bulaú Lisan Tingang iete Raja Garing Hatungku. **7** Raja Garing Hatungku puna Raja Uju Hakanduang, uluh hatue bakena, linga batanjung pulu, hayak bunu menteng dia lalangena hai kuasā belum, datuh japa jimat maharing. **8** Kuan Raja Garing Hatungku:

Buah ih, awi puna aku kabuat je bakahandak tuntang palaku je inggau awi Nyai Endas Bulaú Lisan Tingang te ulih itah manggaū tuntang puna je iatuh awi Ranying Hatala.

9 Limbah ewen uras jadi bulat pakat, ewen Raja Uju Hakanduang hadurut nanturung Lewu Bukit Batu Nindan Tarung, manyarah paramun hakumbang auh. **10** Ewen jadi sembang Lewu Bukit Batu Nindan Tarung, hanjak rantang pahalawang huang Raja Tantauang Bulaú mite pandumah Raja Uju Hakanduang. **11** Malawu rawéi Raja Tantauang Bulaú kuā:

Naraí janjulanan ketun sintung uju jadi karamahan dumah nanturung Lewu Bukit Batu Nindan Tarung, lala-lalaū kahain lalentun tingang.

12 Tambah Raja Mandurut Untung kuā:

*Ikeí sintung uju karamahan dumah misek kamelaí Nyai Endas Bulaú Lisan Tingang. En garing tarantangmū hindaí atun uluh balakū? Tuntang ikeí tuh handak balaku garing tarantangmū Nyai Endas Bulaú Lisan Tingang te akan Raja Garing Hatungku. **13** Tuntang jetuh atun paramun hakumbang auh bara ikeí sintung uju je madu akan Raja Garing Hatungku tuh umba Nyai Endas Bulaú Lisan Tingang.*

14 Tambah Raja Tantauang Bulaú kuā:

*Naraí bulan salā amun kilaú etuh panalataí, baya garing tarantangkū Nyai Endas Bulaú Lisan Tingang puna hakabeken kambang palakū. **15** Amun ketun sintung uju ulih manggau kambang palakuan Nyai Endas Bulaú Lisan Tingang hambekan katun, kanahuang ketun sintung uju andaú etuh ikeí manarimā.*

16 Yē palus nyulang rawéi tinaí Raja Mandurut Untung kuā:

Naraí je ilaku awi Nyai Endas Bulaú Lisan Tingang akan kambang palaku, ikeí ulih manyadiā tuntang Raja Garing Hatungku akan haguét manggaū.

17 Limbah sama jadi bulat pakat tuntang katukas akan Raja Uju Hakanduang haguét misek, ewen Raja Uju Hakanduang gandang halalian buli tinaí manalih balaíà.

18 Umbet jadi katikā je jadi inukas akan ewen, Raja Uju Hakanduang hadurut tinaí nanturung Lewu Bukit Batu Nindan Tarung. **19** Ewen sembang Lewu Bukit Batu Nindan Tarung, lewu

hai usa-usang jadi rami tutu uluh manambang ewen dumah misek. **20** Uluh baka-bakas uras jadi hapumpung, akan mamander auh jalan hadat ain Nyai Endas Bulaú Lisan Tingang je inggaü, tuntang akan inyarah awi Raja Garing Hatungku huang katika maatuh gawi lunuk hakaja pating, baringen hatamueí bumbung. **21** Sama jadi rantep garing kapandukā munduk, te uluh are mamander jalan hadat je akan kambang palakun Nyai Endas Bulaú Lisan Tingang tuntang manukas katika lunuk hakaja pating, baringen hatamueí bumbung. **22** Kapakat ewen handiaí sama jadi bulat tuntang katika malalus gawi sama jadi atun inukas, yē Raja Uju Hakanduang gandang halalian buli balaiá tinai.

23 Tukep jadi katika je imakat awi ewen intu Lewu Bukit Batu Nindan Tarung metuh misek, te Raja Uju Hakanduang hadurut mananggar janji katika malalus gawi lunuk hakaja pating. **24** Katanggar janji katukas malalus lunuk hakaja pating, baringen hatamueí bumbung uras jadi. Ewen Raja Uju Hakanduang gandang halalian buli, hayak nampara manatap karen jalan hadat je akan inyarah huang katika malalus gawi lunuk hakaja pating. **25** Jadi umbet katika ewen malalus gawi lunuk hakaja pating akan Raja Garing Hatungku ewen due Nyai Endas Bulaú Lisan Tingang, te Raja Uju Hakanduang janjaruman akan Ranying Hatala auh janjulanen ewen sahelu bara haguēt. **26** Ranying Hatala hemben te mameteh:

Lalus awi ketun gawi akan Raja Garing Hatungku, hete ketun mamelek sinde uju tuntang Aku kareh atun hadurut manalih gawi

te, awi iē hajanji taharep Aku.

27 Limbah te ewen Raja Uju Hakanduang hadurut nanturung Lewu Bukit Batu Nindan Tarung, malalus gawi lunuk hakaja pating akan Raja Garing Hatungku maatuh kabalumā belum. **28** Ewen sembang Lewu Bukit Batu Nindan Tarung uras atun hakampeleng renteng, rami tutu manambang hatuen tingang karamahan dumah makungan lunuk. **29** Hanjak rantang pahalawang huang Raja Tantaulang Bulaú nambang Raja Garing Hatungku akan tingang manantū, ewen palus malalus haluang pelek akan lunuk hakaja pating, baringen hatamueí bumbung je inyewut kea pelek rujin pangawin. **30** Katika ewen malalus pelek rujin pangawin, hete kare raja-raja je jadi ingatah awi Raja Tantaulang Bulaú akan manyewut auh kakare jalan hadat garing tarantangā Nyai Endas Bulaú Lisan Tingang uras jadi atun munduk hatingang tambangā. **31** Kakaren jalan hadat je imander huang katika ewen haluang hapelek jetuh je taratambang jarin Raja Tantaulang Bulaú akan garing tarantangā Nyai Endas Bulaú Lisan Tingang kilaú iatuh tumun peteh Ranying Hatala iete pelek rujin pangawin Raja Garing Hatungku ewen due Nyai Endas Bulaú Lisan Tingang. **32** Karen pelek rujin pangawin kilaú je atun inyewut katika ewen Raja Uju Hakanduang malalus gawi haluang hapelek sinde uju iete kalata padadukan, duhung tajepan pandung, rabayang kawit kalakaí, gundi lumpang tusu, gahuri nutup sangku, tabasah sinjang entang, ehēt peteng sabangkang, tuntang pisaú pantung

sabangkang. **33** Pelek rujin pangawin jetuh je manjadi suntu awi Ranying Hatala hajamban Raja Uju Hakanduang intu Lewu Bukit Batu Nindan Tarung akan ulun kalunen panakan Maharaja Bunu dapit jeha, tuntang jetuh kea je manjadi tamparā bukun uluh bawī atun palaku tuntang jalan hadat. **34** Limbah ewen due jadi inyaki malas awi mantir luang, ewen due nanturung bahat ambu parung, iete baun tunggang huma ain Raja Tantaulang Bulaú je eka malalus gawi te. Ewen due bawī hatue mandehen janji taharep Ranying Hatala, hayak nunjung tukiú tingang hangka uju nuking lawang langit. **35** Jadi barasih gawi lunuk hakaja pating, baringen hatamueí bumbung, Raja Uju Hakanduang tinaí mameteh Raja Garing Hatungku uka iē mamali kauju andaú kauju alem. **36** Sana sama lepah kakare gawin ewen, te ewen Raja Uju Hakanduang gandang halalian buli, baya Raja Garing Hatungku je netep mijen Lewu Bukit Batu Nindan Tarung hinje bulan bawī bambaíà Nyai Endas Bulaú Lisan Tingang.

37 Kilen kea huang kahapus pali kauju andaú kauju alem, ewen sintung due jadi mangun kabalumā belum, te Nyai Endas Bulaú Lisan Tingang salenga ngantung bulan bele umba tingang sinaúà manggau kalabien kambang palakū, basa je iatuh tumun peteh Ranying Hatala huang pelek sinde uju hindaí sukup intu Nyai Endas Bulaú Lisan Tingang. **38** Nampayah kilaú te, Raja Garing Hatungku paham angkat kapehen ateià, hayak iē kuta-kutak:

Naraí ingahandak awi bulan bawī bambaíkù nyamah ngumpang ngabele huangà?

39 Yē Raja Garing Hatungku nasekan uluh bulan bawī bambaíà:

Naraí bukū bitim je kilaú etuh panalataí? Sanan ih akangkù naraí bewéí je ilakum bara aku, aku ulih manggau akam.

40 Yē tumbah uluh bulan bawī bambaíà Nyai Endas Bulaú Lisan Tingang kuā:

Naraí je isek nasekam tingang sinaú. Sapunā taluh je inggaukù bara ikaú paham bahali tutu gaū. Mikeh dia ulih bitim manyarurúí hayak mahagā amun taluh te atun.

41 Kuan rawéí Nyai Endas Bulaú Lisan Tingang tinaí:

*Handung tawangkù bitim hatue balinga pulu menteng dia lalangena, hai kuasam mait kajayam. Dia badai bitim dia handung hakatawan kambang palakungkù. **42** Tuntang tinaí tingang sinaú Raja Garing Hatungku, amun puna bitim hai kuasam, mait kajayam, tawan tambang riwut lawu, haratim takep salatan muhun, balaku bitim ela manulak kambang palakungkù. **43** Manih bitim puna Raja Uju Hakanduang Kanaruhan Hanya Basakati, aluh aku bulan bawī bambaímù dia janjaruman kambang palakungkù umba bitim, usa-usang bitim jadi handung hakatawan.*

44 Tumbah Raja Garing Hatungkù:

Iyoh bulan bawī bambaíkù. Amun je kahalapà keleh bitim janjaruman akangkù, mangat jetuh kareh je manjadi suntu akan

*ulun kalunen, hayak iē tau
mahaga jete huang pambelumà.*

45 Kuan Nyai Endas Bulaú Lisan
Tingang:

*Iyoh tingang sinaú Raja Garing
Hatungku. Naraí bulan salā amun
kalute panalataí. Taluh je manjadi
kalabien kambang palakungkù
iete banama bulaú pahalendang
tanjung ajung rabia pahalingeí
luwuk tuntang Bukit Bulaú
Lampayung Nyahu.*

46 Hamauh tinaí Nyai Endas Bulaú
Lisan Tingang kuā:

*Amun bitim tingang sinaúkù ulih
mandinu kalabien kambang
palakungkù te, tuntang ulih ulun
kalunen dapit jeha mahagā kilaú
ampin kue mahagā tuh, ewen
belum sanang palus katatahī.*

47 Limbah manyeneh auh uluh bulan
bawi bambaíà Nyai Endas Bulaú Lisan
Tingang, yē Raja Garing Hatungku
manyiap arepà palus batulak mawi
jalanā manggau kalabien bulaú
kambang palakun bulan bawi bambaíà
te. **48** Raja Garing Hatungku batulak
batanjung panjang, hayak atun inyadia
awi bulan bawi bambaíà Nyai Endas
Bulaú Lisan Tingang akan bambuhatā
uju kalawas pulut nyiring, hayak
mumah ije rambat behong uang aeng
sirat tataí hatuen nyaring. **49** Sama
sadang kea katahin Raja Garing
Hatungku batanjung panjang
ngumbang bukit nyarandai puruk batu
ambu, palus jatun iē sundaú bulaú
kambang palakun bulan bawi bambaíà
Nyai Endas Bulaú Lisan Tingang. **50**
Bilak ngantung kapehen huangà Raja
Garing Hatungku. Kuan Raja Garing

Hatungku:

*Amun kilaú etuh panalataí, dia
salan baling aku buli mupang
nantawa buang.*

51 Hayak kuta-kutak Raja Garing
Hatungku batanjung panjang, hayak
kea kambang kayun penyang karuheí
tataú, hapa muat rambat behong uang
aeng tuntang kilen haweh sembang iē
ije bukit gantu-gantung, kereng tuya-
tuyang. **52** Huang tantan bukit je gantu-
gantung, kereng je tuya-tuyang te, atun
ije kayu belum mijen tahanjungà.

53 Raja Garing Hatungku sembang
upun kayu jete, eleh iē silik bakalati
tanduk nuntun kahalap batang kayu
jete. Yē palus malawu raweí kuā:

*Leha-lehan kahalap batang kayu
jetuh, bilang bujur-kabajuran
kilaú ranying pandereh bunu.*

54 Kuan riwut raweíà tinaí:

*Teraí, aku nalanjung akā kayu
jetuh. Mikeh bara tahanjungan
kayu jetuh hirahà tau
taratuntungkù taluh je jadi
kalabien kambang palakun uluh
bulan bawi bambaíkù Nyai Endas
Bulaú Lisan Tingang.*

55 Yē palus lekakà rambat behong uang
aeng je jadi muat kayun penyang
karuheí tataú, tuntang atun ije kalawas
tisan pulut nyiring intu huangà. **56** Sana
jadi iē malekak rambat behong uang
aeng, palus manting nangkaruan
tambang Raja Garing Hatungku
nalanjung batang kayu jete, tuntang
sapunā kayu jete je inyewut arā bagare
kayu erang tingang, bulus andung
nyahu. **57** Kayu erang tingang, bulus
andung nyahu te puna jadi injadian helu

tuntang inyadia awi Ranying Hatala
 intu tantan bukit je gantu-gantung,
 tahanjungan kereng je tuya-tuyang. **58**
 Tangkerun tupai jaha-jahai, sangkiat
 mengkas lia-lia, Raja Garing
 Hatungku nalanjung kayu erang
 tingang, bulus andung nyahu, dia pire-
 pire sembang iē tahanjungan kayu
 erang tingang te. **59** Huang tahanjungan
 kayu erang tingang, bulus andung
 nyahu, tampajahan ngaju tampajahan
 ngawa Raja Garing Hatungku, eleh
 taratuntū Bukit Bulaū Lampayung
 Nyahu tuntang banama bulaū
 pahalendang tanjung, ajung rabia
 pahalingeī luwuk, hayak atun Bukit
 Barantai Bulaū, Bukit Uju
 Hatalumbang. **60** Kai riwut raweī Raja
 Garing Hatungku hayak mukeī kuasā
 belum, muraī japa jimat maharing,
 mangampeleng ruġin pelek palakun
 Nyai Endas Bulaū Lisan Tingang palus
 nameā mijen marung supu bulaū, supu
 hintan, bakandung Nyalung Kaharingan
 Belum, hayak iē nunjung tukiū tingang,
 mangkat lahap rawing. **61** Kilen kea
 panalataīā, kabentengan iē nunjung
 tukiū tingang, salenga parariup luhing
 salingkat lawungā. Hayak auh nyahu
 batengkung ngaruntung langit homboh
 malentar kilat basiring hawun, luhing
 salingkat lawung basaluh manjadi
 kuwung bulaū sangkalemu. **62** Limbah
 te kabentengan iē ngasuhan kayu erang
 tingang, leka batetes ulai telun
 penyangā. Hayak auh nyahu
 batengkung ngaruntung langit homboh
 malentar kilat basiring hawun, ulai
 telun penyang basaluh manjadi darung
 hanjaliwan. **63** Dia pire tinaī limbah te
 leka tambalang panataū penyang
 pangaruhā. Hayak auh nyahu
 batengkung ngaruntung langit homboh
 malentar kilat basiring hawun, penyang

pangaruh basaluh manjadi burung
 kangkang sangkalemu. **64** Kilen kea
 tinaī sahindaī iē sembang upun kayu
 erang tingang, hayak auh nyahu
 batengkung ngaruntung langit homboh
 malentar kilat basiring hawun, tisan
 huang rambat behong uang aeng
 basaluh manjadi depung bulaū
 sangkalemu. **65** Limbah te rambat
 behong uang aeng basaluh manjadi
 bajang kalingkang lawung. Hayak gite
 kilaū te Raja Garing Hatungku
 nangkaruang tambangā mangguang
 bajang kalingkaī lawung, yē palus
 basaluh manjadi karangking penyang
 karuheī tataū intu Bukit Simpei
 Karuheī, hulu Batang Danum Simpei
 Karuheī. **66** Je akan mahaga karangking
 penyang karuheī tataū intu Bukit
 Simpei Karuheī te, Ranying Hatala jadi
 maatuh jete, iete tarantang Raja
 Tunggal Sangumang, bagare Raja
 Sagagaling Langit ewen due bulan
 bawi bambaīā Putir Kamasarin Garing.
67 Intu kajadian jetuh bukū ulun
 kalunen dapit jeha amun iē malan
 manana, mananjung neteī, atawā
 malalus lunuk hakaja pating, baringen
 hatamueī bumbung, atun dahiang
 bajang, kuwung, hanjaliwan, depung,
 bangkang, te uluh pakanan dahiang
 nanturung Raja Garing Hatungku. **68**
 Limbah te tinaī Raja Garing Hatungku
 palus gandang halalian buli nanturung
 Lewu Bukit Batu Nindan Tarung,
 Rundung Kereng Bantilung Nyaring. **69**
 Sana sembang parung mahawang, eleh
 hanjak rantang pahalawang huang ulun
 bulan bawi bambaīā Nyai Endas Bulaū
 Lisan Tingang, jadi usa-usang iē
 handung hakatawan kambang palakū
 jadi atun dinun awi tingang sinaūā Raja
 Garing Hatungku. **70** Raja Garing
 Hatungku palus mamparahan supu

bulaú, supu hintan, je bakandung Nyalung Kaharingan Belum, akan uluh bulan bawi bambaia Nyai Endas Bulaú Lisan Tingang. **71** Bara hete ampi Nyai Endas Bulaú Lisan Tingang tau tutu umba uluh tingang sinaúa, sana ië mandinun kalabien bulaú kambang palakū tuntang ewen due mahaga jete palus katatahi. **72** Miar andaú miar kea katahin ewen due mangkang kabalumā belum. Yē Nyai Endas Bulaú Lisan Tingang handiwung kanyurung pusū, pandung bapakku anak.

73 Hemben Nyai Endas Bulaú Lisan Tingang handiwung kanyurung pusū, uluh tingang sinaúa Raja Garing Hatungku sukup manggau akā taluh je kahandak belaiā. **74** Huang katahin telu bulan tanggar langit, palus uju bulan kea tanggar langit, Raja Garing Hatungku ewen due tingang empū Raja Tantaulang Bulaú, malalus gagenep gawi akan Nyai Endas Bulaú Lisan Tingang, tumun kilaú je jadi iatuh awi tingang tatū Manyamei Tunggul Garing Janjahunan Laut akan Kameluh Putak Bulaú Janjulen Karangan. **75** Tanggar jadi jalatien bulan jalatien andaú, te banama baungkar puas, ajung lius baurai suanga, Nyai Endas Bulaú Lisan Tingang luas hatue. **76** Sana anak jadi atun, Raja Garing Hatungku paham tutu angkat kahanjak pahalawang huang, indahang tinaí anakā hatue, hayak bakena balinga batanjung pulu jatun suntu manumū. **77** Te ewen sintung due mangantung miat umba Ranying Hatala tuntang Jata Balawang Bulaú uka umba mahaga palus manuah manenga rajaki tuah akan anakā. **78** Amun anak te jadi hai, te Raja Garing Hatungku ewen due bulan bawi bambaia Nyai Endas Bulaú Lisan Tingang madu nahunan manampa

gangguranan aran anakā, hayak maluput miat umba Ranying Hatala ewen due Jata Balawang Bulaú. **79** Raja Garing Hatungku manatap manyadia paramun nahunan akā palus manehaú maraweí kare kula biti uka dumah nanturung Lewu Bukit Batu Nindan Tarung huang katika ië malalus gawi.

80 Huang katika Raja Garing Hatungku malalus gawi nahunan manampa gangguranan aran anakā, hetuh atun lembut talatah nahunan je manjadi suntu akan ulun Pantaí Danum Kalunen panakan Raja Bunu. **81** Gangguranan aran anak Raja Garing Hatungku jadi inampa, iete bagare Raja Tunggal Sangumang Nyaring Emban Bakuwu Hanyi. Sasar kea miar katahi jadi, kalute kea sasar miar kabakasā, kambu kahaí, te Ranying Hatala nyahuan Raja Garing Hatungku ewen due Nyai Endas Bulaú Lisan Tingang haguét manandang manyadia eka mijen intu hulu Batang Danum Sangkalila Bulaú. Amun jadi sampai katikā, ië babungkat manalih hete.

31 Ranying Hatala janjaruman kahandakā umba Manyamei Tunggul Garing Janjahunan Laut

1 Limbah kakare kajadian je jadi ingahandak awi Ranying Hatala akan panakan Manyamei Tunggul Garing Janjahunan Laut ewen due Kameluh Putak Bulaú Janjulen Karangan, te Ranying Hatala tinaí maatuh kakare taluh handiaí je patut akan Raja Bunu ewen hanak hajarian.

2 Ranying Hatala palus mamparahan arepā akan Manyamei Tunggul Garing Janjahunan Laut, hayak Ië hamaui kuā:

Hetuh Aku handak maatuh taluh handiaí tinaí akan anakmù Raja Bunu. **3** Ketun due mahining auhkù rende-rendeng, basa Aku handak janjaruman akan ketun due salabih helu, awi anakmù Raja Bunu inyuhukù mamungkat arepà ewen hanak nanturung Bukit Tambak Raja. **4** Intu Bukit Tambak Raja te Raja Bunu ewen hanak kareh mangkalewu, sahelu bara ewen ilaluhangkù nanturung batang petak Pantaí Danum Kalunen. **5** Mangat ketun due katawā, basa huang ije katika kareh Aku akan malaluhan Raja Bunu ewen hanak hajarian bara Bukit Tambak Raja te nanturung Pantaí Danum Kalunen eka ewen mijen, hayak eka jete kareh inyewut Lewu Injam Tingang, Rundung Nasih Nampuí Burung. **6** Tinaí mangat ikaú katawā Manyameí Tunggul Garing Janjahunan Laut, bukū Aku malaluhan garing tarantangmù Raja Bunu ewen hanak hajarian te, jete puna kangakun ayū tumun kahandak aingkù akan panakā palus dapit jeha, puna bagin mateí. **7** Manyameí Tunggul Garing Janjahunan Laut, ketun due bulan bawī bambaímù, ela kapehe atē maniruk garing tarantangmù Raja Bunu palus panakan aī je bagin mateí. Ewen te kareh uras buli Aku, tumun katikā je jadi inukaskù akan ewen gagenep biti. **8** Je mandohop tuntang masi mawat ewen te kareh, aluh belum aluh mateí, iete panakan tambun paharī Raja Sangen ewen due Raja Sangiang, hayak jete puna iatuh hayak

inukas awi'kù akan ketun handiaí. **9** Tinaí mangat ketun due kea katawā, panakan ain garing tarantangmù Raja Sangen ewen due Raja Sangiang, jete puna dia tau bagin mateí, tuntang eka ewen mijen huang Pantaí Danum Sangiang tuh hayak kakare ampin taluh gawī, palus kakare batang danum je ihagā, kareh Aku maatuh jete akan ewen. **10** Huang katika jetuh, Aku hindaí manukas akan ketun due, hamparea Aku malaluhan Raja Bunu ewen hanak hajarian. Kareh ewen katawan katikā Aku malaluhan ewen te, atun tinaí Aku janjaruman akam hajamban Raja Uju Hakanduang.

11 Kuan Ranying Hatala tinaí:

Ikaú Manyameí Tunggul Garing Janjahunan Laut, pajing bitim janjaruman akan garing tarantangmù Raja Bunu, uka ewen manatap arepà, mentaí katikā je inukaskù akan ewen harian andaú. **12** Tuntang mangat garing tarantangmù Raja Bunu ewen due bulan bawī bambaia Kameluh Tanteluh Petak handung hakatawan panakan ain ewen due te kareh palus dapit jeha je akan manyuang sahapis batang petak Pantaí Danum Kalunen je jadi injapa awi'kù. **13** Ewen te kareh je akan mangkar manyiwuh manataí arepà kanih kate lakaú bukit, lakaú janah, tuntang huang saran karen tasik. **14** Janjaruman kea tinaí akan garing tarantangmù Raja Bunu ewen due bulan bawī bambaia Kameluh Tanteluh Petak, aluh iē ilaluhangkù akan Pantaí Danum Kalunen, panakan

*ai te kareh nampara bagin matei,
iete limbah panakan je kajalatién
tilap.*

15 Sana limbah auh Ranying Hatala janjaruman peteh kalute, Ranying Hatala palus lilap gandang halalian buli nanturing balaí ayū huang Batang Danum Banyahu Bulaú.

16 Limbah te Manyameí Tunggul Garing Janjahunan Laut palus mangahaú garing tarantangà Raja Bunu ewen due bulan bawi bambaià Kameluh Tanteluh Petak. Iē janjaruman auh peteh Ranying Hatala je jadi inyampaí hajamban iē. **17** Hete Raja Bunu ewen due bulan bawi bambaià Kameluh Tanteluh Petak manahingan auh peteh Ranying Hatala je inyampaí awi uluh tingang apangà umba ewen due. **18** Hanjak rantang pahalawang huang ewen due. Ewen due dia mungkir jete, basa iē kea mingat auh Ranying Hatala umba iē hemben huran, tuntang naraí taluh je iatuh awi, malengkan Raja Bunu manumū. **19** Limbah te tinaí Raja Bunu ewen hanak hajarian palus manatap arepà haguét manandang mamparasih tuntang manyadia mamangun parung mahawang, mamangun lewū intu Bukit Tambak Raja.

32 Ranying Hatala janjaruman akan panakan Raja Bunu auh jalan ewen buli haluli manalih Iē

1 Limbah kakare kajadian je jadi mahalaú, Ranying Hatala mameteh tinaí umba Manyameí Tunggul Garing Janjahunan Laut ewen due bulan bawi bambaià Kameluh Putak Bulaú Janjulen Karangan ampin taluh je ingahandakà huang pabelum panakan

Raja Bunu kareh intu Pantaí Danum Kalunen. **2** Sahelu bara Ranying Hatala malaluhan Raja Bunu ewen hanak hajarian nanturing Pantaí Danum Kalunen, hete Iē manyahuan ewen malalus tiwah suntu intu Lewu Bukit Batu Nindan Tarung, Rundung Kereng Liang Bantilung Nyaring, awi jetuh kareh je manjadi suntu akan panakan Raja Bunu, jete ampin jalan ewen te buli haluli manalih Iē. **3** Limbah te tinaí Ranying Hatala palus maatuh hayak manukas eweh-eweh je manggawī kareh akan panakan Raja Bunu te amun ewen malalus ampin jalan ewen buli manalih Iē, iete maatuh bara katamparā palus kahapus gawī. **4** Ranying Hatala mameteh umba panakan Raja Bunu:

Ketun tuh kareh je belum manataí arep ketun huang Pantaí Danum Kalunen tuntang bagin ketun je tau matei, ketun belum sama kilaú namuei. Kalute kea huang kahapusà ketun buli hinje Aku, iete eka je tataú palus katatahi. 5 Tinaí huang katika tuh Aku manukas akam Raja Bunu palus panakan aim te kareh, ampin jalan ewen te buli Aku, tege panakan paharim Raja Sangen ewen due Raja Sangiang je mimbità palus manggawī, manyarurui ampin jalan ewen tesek dumah bara Aku, kalute kea ampin ewen buli manalih Aku. 6 Panakan aim Raja Bunu, sahelu bara ewen te haluli hinje Aku, ewen malalus nantiwah pali belum, awi tagal atun barutas matei, kalute kea akan ewen je magun belum, mangat ewen belum sanang mangat, panjang umur asengà. Jetuh nah bukū Aku

tuh manyuhu ketun malalus tiwah suntu huang Lewu Bukit Batu Nindan Tarung tuh, sahelu bara Aku malaluhan ketun hanak hajarian nanturung Pantaí Danum Kalunen. ⁷ Awi puna tampan taluh handiaí te uras bara Aku, kalute kea ulun kalunen palus aseng ngangkanā, atun hambaruā, palus atun lumpuk matā, isī, dahā, pupus bulū, tulang uhatā, kareh iē tau buli Aku amun iē buli haluli manyaruruí jalā tesek dumah bara Aku. ⁸ Basa ulun kalunen belum, hambaruā jete bara kangkalingeí bitī berengā, lumpuk matā, isī, dahā, pupus bulū, tulang uhatā, jete bara nyalung bayan Hintan Kaharingan, petak kalabien bulan, liang kalambungan lumpung matan andaú. Jetuh amun iē jadi mateí, hete hambaruā inyewut liaú balawang panjang, tinaí tulang uhatā inyewut liaú karahang tulang. ⁹ Tinaí ampin kakare talatah gawi maharagu telu liaú te je bara bitī bereng ulun kalunen belum. Iē buli Aku manumun katamparā manjadi ulun kalunen. Jetuh je iatuhkū gawi akan ketun malalusā kareh huang Pantaí Danum Kalunen intu pabelum panakan aim Raja Bunu.

33 Malalus tiwah suntu

¹ Limbah Ranying Hatala manyarita ampin talatah gawi tiwah huang taharep ewen handiaí anak esun Manyameí Tunggul Garing Janjahunan Laut, Ranying Hatala manyuhu ewen malalus

tiwah suntu Raja Tantauang Bulaú Hiang Tantuenyet Nyaring. ² Hete ewen handiaí intu Lewu Bukit Batu Nindan Tarung palus baramu manatap karen paramun tiwah, sukup jatun ati je balihi tumun je jadi imeteh awi Ranying Hatala umba ewen. ³ Paramun tiwah jadi uras atun, te ewen nampara mampendeng balaí nyahu, mampendeng sangkaí raya, mampendeng pantar sangalang, tetat manamun, pendeng pandung nyahu, palus kea kare paramun je beken.

⁴ Tinaí je jadi inukas awi Ranying Hatala, huang ewen malalus gawi tiwah suntu je mangkayan arepā sukup, bandung karungkungā, sampulaú dare, hayak palus mandukan usuk garantung, nyukah duhung tuntung entengā, iē duhung pahanteran liaú, iete Raja Pampulaú Hawun Raden Talampe Batanduk Tunggal. ⁵ Tiwah suntu intu Lewu Bukit Batu Nindan Tarung tuh ilalus iete suntu akan Raja Bunu awi iē handak ilaluhan akan Pantaí Danum Kalunen, tuntang jetuh kea dapit jeha je badehen palus katatahī huang pabelum ulun kalunen, ampin jalā buli hinje Ranying Hatala mahuruí jalā iē tesek dumah. ⁶ Tumun talatah gawi tiwah, nyamah sampai katikā ewen malalus hanteran liaú, hete handiaí uras mampahaya-hayak manyeneh tutu-tutu auh gagenep kutak je inanjuri awi duhung pahanteran liaú. ⁷ Limbah duhung pahanteran liaú bagawi mangutak tumun peteh Ranying Hatala huang gawin hanteran te, sana jadi, hete ewen mite kakare kahandak Ranying Hatala uras manjadi tumun je jadi inukas awī. ⁸ Salawin gawi tiwah suntu huang Lewu Bukit Batu Nindan Tarung, hete atun ilalus tinaí gawi

patandak. Huang gawi patandak tuh je bagawi iete gawi batu bangkalan lunuk tuntang huang katika jete je mambatang tutu iete mandehen gangguranan ewen tumun je jadi inampa taharep Ranying Hatala. ⁹ Limbah te inanggare tinaí gangguranan aran ewen uka manjadi suntu kareh huang Pantaí Danum Kalunen hajamban Bawi Pekas Penyang manaruí rajaki tuah akan ewen je nalampas pali belum bara Apang Hanjung Tingang ewen due Indang Hanjung Tingang. ¹⁰ Amun ewen manarima tuah rajaki hajamban patandak, te ewen manara kuasan tuntang sintan Ranying Hatala mahapan hangka uju nunjung tukiú tingang naharep matan andaú lembut, palus meteng lilis lamiang, basaki dahan manuk darung tingang. ¹¹ Limbah tiwah suntu te jadi uras barasih, te ewen uras mamali kakaren panginan tumun je jadi imeteh awi Ranying Hatala, uka dehen uras asi tuntang kasintan Ranying Hatala umba ewen huang malalus pabelum.

¹² Umbet katahī tinaí, ewen Lewu Bukit Batu Nindan Tarung limbah tiwah suntu, hete ewen atun inuah pantar bulaú sulep ikuh tambun je basalupu Nyalung Kaharingan Belum.

34 Ewen Lewu Bukit Batu Nindan Tarung kanuah pantar bulaú sulep ikuh tambun

¹ Limbah tiwah suntu intu Lewu Bukit Batu Nindan Tarung, Kereng Liang Bantilung Nyaring, ewen sama malayan tulang rumpang, maleleng uhat lesū, sama maatuh kabalumā belum.

² Kilen haweh huang ije katika

Ranying Hatala magun bakahandak manyukup panataú Lewu Bukit Batu Nindan Tarung, Rundung Kereng Liang Bantilung Nyaring. ³ Te salenga atun lampang pantar bulaú sulep ikuh tambun basalupu Nyalung Kaharingan Belum, huang saran batang talian ewen. Amun lampang, bilang hapanyingah sinde Lewu Bukit Batu Nindan Tarung. ⁴ Ewen Lewu Bukit Batu Nindan Tarung gite panataú je kalute ampin kahalapà puna lenda-lendang, linge-lingeí sinde, ewen sama handak mandinū mimbit akan baun humā. ⁵ Yē ewen haduanan maraú bulaú palus manjaratà, namburakà hapan ueí jahanen bukit, leka bagetu-getu palus dia tau dinun. Kalute hante-hante ewen manjaratà, bilang jatun katapasan taluh hapan ewen manjaratà jatun ati je ulih mandinū. ⁶ Gagenep andaú laju-lajur panataú bulaú sulep ikuh tambun lampang huang saran batang talian ewen Lewu Bukit Batu Nindan Tarung, tuntang puna jatun ati je katapasan. ⁷ Bilak tuja-tujuh pahalawang huang ewen je mijen Lewu Bukit Batu Nindan Tarung madu padinun panataú bulaú sulep ikuh tambun, andaú kueh iē tau dinun, manahiu ampin ewen puna sama nahuang tempū, akan ndu turus panataúa. ⁸ Are kea ewen je bahimat angkat pahalawang huangà, kilaú Raja Rawing Tempun Telun, Raja Duhung Bulaú Tempun Lamandung Bunu, Sahawung Bulaú Tempun Buang Penyang Tempun Kanarean, Raja Ngalang Bulaú, Raja Hatangan Tingang, ura-uras kueh ewen ulih padinū.

⁹ Yē Raja Garing Hatungku ewen due Kameluh Endas Bulaú Lisan Tingang kangkaraú lingu nalataí. Kilen kuā:

*Naraí bukū ganā pantar bulaú
sulep ikuh tambun je nyamah tuh
jatun ulih itah padinū?*

Kuan tirukà:

*Teraí, aku haquet nyembang
Ranying Hatala, balaku asi belum
palakuan awat maharing.*

10 Raja Garing Hatungku palus tingang
nulak lunuk. Sembang iē umba
Ranying Hatala. Usa-usang Ranying
Hatala handung katawan panalataiā,
hayak Iē malawu rawéi kuā:

*Handung tawangkū janjulanam
Raja Garing Hatungku, kilen
ketun dia ulih padinun panataú
pantar bulaú sulep ikuh tambun,
kutu-kutuh karen bitin ketun.*

11 Kuan rawéi Raja Garing Hatungku:

*Iyoh, hetuh aku karamahan
nyembang Ranying Hatala,
balaku asi belum akan ikeí Lewu
Bukit Batu Nindan Tarung, kilen
ampin ikeí padinun pantar bulaú
sulep ikuh tambun te.*

12 Kuan Ranying Hatala mameteh
umba Raja Garing Hatungku:

*Amun ketun dia balaku dohop
umba Aku, kueh tau ketun dinun
pantar bulaú sulep ikuh tambun
akan ketun Lewu Bukit Batu
Nindan Tarung, pajing ketun
malahap hangka uju lulang-luli.
Te Aku umba masi ketun
ngalampangan pantar bulaú sulep
ikhuh tambun.*

13 Limbah te Raja Garing Hatungku
gandang halalian buli, palus janjaruman
akan uluh bulan bawi bambaiā Nyai
Endas Bulaú Lisan Tingang, awi iē atun

mandinun peteh bara Ranying Hatala.
Metuh te kea leka lampang ih pantar
bulaú sulep ikuh tambun huang saran
batang talian Raja Garing Hatungku. **14**
Sana mite pantar bulaú sulep ikuh
tambun atun kalampangan mijen sare
batang taliā, Raja Garing Hatungku
palus manting nangkaruan tambang
nanturung pantar bulaú sulep ikuh
tambun, palus nekap hatabanā. **15**
Hangka uju lulang-luli Raja Garing
Hatungku nunjung lahap rawing,
mangkat sarayung jelā, eleh hian
tingang, pantar bulaú sulep ikuh
tambun palus etun awi Raja Garing
Hatungku nanturung baun parung
mahawang hayak nampahendengā
pantar bulaú sulep ikuh tambun intu
baun humā.

16 Limbah jadi mendeng pantar bulaú
sulep ikuh tambun mijen lumpung
nyarabentuk Lewu Bukit Batu Nindan
Tarung, hete lewu paham hai
pahalendangā. Lewu hamalem kilau
handau, mani-manih je puna handau. **17**
Pantar bulaú sulep ikuh tambun halajur
mamantis Nyalung Kaharingan Belum,
nahutu guhung panaling aseng, sukup
untung panjang, nyame ambu, batarung
tutu akan ngaju-ngawa Pantaí Danum
Sangiang, nyamah lumpat lawang
labehun langit, sembang kalang labehu
handalem. **18** Uluh are dumah-dumaha
najahan tarung pantar bulaú sulep ikuh
tambun, nyama-nyamah nyapenda
Nyalung Kaharingan Belum, awang
ongko jadi tabela, awang papa ampi
jadi bakena, nyamah lepa halamaung
balangan ewen uras akan Raja Garing
Hatungku ewen due Nyai Endas Bulaú
Lisan Tingang.

19 Kilen kea leka ngempang ngabehu
huang ewen Raja Linga Rawing

Tempun Telun, Raja Duhung Bulaú, tuntang Sahawung Bulaú Tempun Buang Penyang. Hapunu-punu ewen kā uluh je najahan kamait pantar bulaú sulep ikuh tambun. **20** Yē uluh ngaju-ngawa Lewu Bukit Batu Nindan Tarung hapakat maasang ewen Lewu Bukit Batu Nindan Tarung, Rundung Kereng Liang Bantilung Nyaring. Je nambakas asang iete Raja Rangkang Rangas Batakuluk Batu Kanaruhan Parukat Bijai Bauntek Tambaga ewen due Raja Awu-awu Tasik. **21** Kakarengan ewen kalah awi asang, jakaí dia Raja Garing Hatungku nyadawa mariam hai sapolak mendeng palus hatemba-tembak akā asang jete, nyamah bagetu-getu hurung pulu, basampi-samping nusa lime was katahanan paluru mariam hai. **22** Yē kakaren asang te kalah palus bundur. Kuan ewen:

Dia ulih itah hakalawan umba ewen Lewu Bukit Batu Nindan Tarung. Ewen puna menteng barigas tambang.

Tuntang katahanan awan tembak paluru mariam Raja Garing Hatungku palus manjadi Tarusan Paluru Barantai Lapetan Dandang Dauh. **23** Panjanjangan enteng Raja Rangkang Rangas Batakuluk Batu Kanaruhan Parukat Binjai Bauntek Tambaga ewen due Raja Awu-awu Tasik, pea bahanyi ewen nukap Lewu Bukit Batu Nindan Tarung. Palus ewen gandang halalian buli, garantung kamalesan mulang nanturung pahatewang lewu, mulang sarapangkat rundungà. **24** Limbah te tinaí Lewu Bukit Batu Nindan Tarung jatun kaderoh je mandaur ewen bara kanih kate, tuntang pantar bulaú sulep ikuh tambun kilaú ampī junjun helu bilak hapanyingah, lewu hamalem kilaú

handau, mani-manih je puna handau.

25 Kalute ampin kahandak Ranying Hatala manjadian kakare taluh handiaí akan panataú ewen Pantai Danum Sangiang, je kareh akan manjadi panataú akan panakan Raja Bunu intu Pantai Danum Kalunen amun iē mambang karuheí umba panamueí banama tingang, palakuan untung aseng panjang.

35 Raja Bunu ewen hanak hajarian mamungkat arepà bara Lewu Bukit Batu Nindan Tarung, mangkalewu intu Lewu Bukit Tambak Raja

1 Amun limbah kakare kajadian kalute, Manyameí Tunggul Garing Janjahunan Laut ewen hanak hajarian palus batuluk bara Lewu Bukit Batu Nindan Tarung manukep tumbang lawang langit nanturung ije bukit bagare Bukit Tambak Raja. **2** Ewen sembang tumbang lawang langit intu Bukit Tambak Raja, te ewen hajarian palus manandang mamparasih petak mampar buang ije kabaluhur eka ewen mampendeng huma hai, parantaran lumbah je akan eka Raja Bunu ewen hanak hajarian mijen kareh. **3** Dia pire-pire katahī, Manyameí Tunggul Garing Janjahunan Laut ewen hanak hajarian, Raja Sangen, Raja Sangiang, tuntang Raja Bunu mampendeng huma hai hayak bahalap tutu ampī, hasapaú tambaga uras ije kabaliwit, bulaú uras ije kabaliwit, tuntang hintan uras ije kabaliwit. **4** Uras jadi sadia ampin tampan huma te, yē Manyameí Tunggul Garing Janjahunan Laut ewen hanak gandang halalian buli Lewu Bukit Batu Nindan Tarung.

5 Tanggar jadi katahī, nduan katelu

bulan lembut, kare raja-raja intu Lewu Bukit Batu Nindan Tarung, ewen tingang hakampeleng renteng manampara mamungkat ramu-ramuan, panataú panuhan Raja Bunu ewen hanak hajarian nanturung huma hai parantaran lumbah intu tumbang lawang langit je jadi sadia imangun. **6** Hayak te kea Raja Bunu ewen hanak hajarian babungkat manalih huma hai intu Bukit Tambak Raja, tumbang lawang langit, palus ewen mijen intu hete. **7** Kalute kea kare jalahan ewen hanak, kalute kea Raja Sangiang ewen hanak, uras umba magah Raja Bunu ewen hanak babungkat bara Lewu Bukit Batu Nindan Tarung manalih Bukit Tambak Raja, tumbang lawang langit. **8** Amun ewen uras jadi sembang tumbang lawang langit, hete bapā Manyameí Tunggul Garing Janjahunan Laut janjaruman umba garing tarantangà Raja Bunu palus kakare sihung lalundungà, dia tahi hindaí Ranying Hatala akan malaluhan ewen hanak hajarian nanturung Pantai Danum Kalunen, lewu injam tingang. **9** Limbah mameteh mandehen garing tarantangà Raja Bunu, Manyameí Tunggul Garing Janjahunan Laut palus kea handiaí uras gandang halalian buli Lewu Bukit Batu Nindan Tarung. **10** Pandehan te, ampī Ranying Hatala hamauih tinai umba Raja Uju Hakanduang kuā:

Awi ketun Raja Uju Hakanduang hadurut manalih Bukit Tambak Raja, tumbang lawang langit, nyembang Raja Bunu ewen hanak hajarian. Ketun mite ampin kare taluh gawin ewen hayak janjaruman akan ewen gangguranan aran eka ewen je

mijen metuh tuh iete bagare Lewu Bukit Tambak Raja.

11 Limbah hapeteh raweí, Raja Uju Hakanduang palus tingang nusang hadurut lunuk nanturung Bukit Tambak Raja, tumbang lawang langit. **12** Ewen sama jadi hasembang tanduk bara gantung huma hai parantaran lumbah, te Raja Uju Hakanduang janjaruman peteh Ranying Hatala umba Raja Bunu:

Eka jetuh Raja Bunu inanggare bagare Lewu Bukit Tambak Raja intu tumbang lawang langit.

13 Kuan Raja Uju Hakanduang:

*Tinai amun atun katapas atawā kakurang ketun hanak hajarian kareh Raja Bunu, te ikaú balaku umba uluh tingang apangmū Manyameí Tunggul Garing Janjahunan Laut intu Lewu Bukit Batu Nindan Tarung. **14** Awi intu Lewu Bukit Batu Nindan Tarung te sukup karen panataú panuhan, jawet ramu, tuntang intu Lewu Bukit Batu Nindan Tarung atun behas manyangen tingang, pundang lauk ila-ilai langit, mijen lalang tambangap langit je dia tau rugi tuntang dia kea tau una.*

15 Limbah te Raja Uju Hakanduang gandang halalian buli, garantung kamalesan mulang, buli balaíà Batang Danum Banyahu Bulaú.

16 Nduan pire-pire bulan nyelu katahī jadi Raja Bunu ewen hanak hajarian mijen Lewu Bukit Tambak Raja intu tumbang lawang langit, ewen belum sanang mangat awi atun halajur Ranying Hatala manganggulu ewen. **17** Raja Bunu mijen Lewu Bukit Batu Nindan Tarung, iē atun kanuah garing

tarantang hanya biti, metuh ewen due Kameluh Tanteluh Petak mijen Lewu Bukit Tambak Raja, atun kanuah tinaí garing tarantang jahawen biti iete bagare Manyameí Sunsunan, Tiung Malianā, Raja Mandurut Bulaú, Hawun Baru Barun, Sabuyung Nyaring Uhing, tuntang Sabira Nangguí Garantung. **18** Tinaí garing tarantangà je hanya biti junjun helu metuh iē mijen Lewu Bukit Batu Nindan Tarung, jete uras mijen umba uluh tingang tatu Manyameí Tunggul Garing Janjahunan Laut netep intu Lewu Bukit Batu Nindan Tarung.

19 Limbah te, umba katahī tinaí, Ranying Hatala nyahuan Raja Uju Hakanduang hadurut nanturung Lewu Bukit Batu Nindan Tarung, awi jadi tukep katikā Ranying Hatala akan malaluhan Raja Bunu ewen hanak hajarian nanturung tantan ije bukit intu Pantaí Danum Kalunen. **20** Raja Uju Hakanduang sembang Lewu Bukit Batu Nindan Tarung, palus ewen janjaruman peteh Ranying Hatala umba Manyameí Tunggul Garing Janjahunan Laut, tahu katika Raja Bunu ewen hanak hajarian akan ilaluhan nanturung Pantaí Danum Kalunen. **21** Limbah hapeteh raweí, Raja Uju Hakanduang tinaí tingang nulak lunuk nanturung Lewu Bukit Tambak Raja intu tumbang lawang langit, nyembang Raja Bunu janjaruman akā, uka ewen hanak hajarian batatap, awi jadi sampai katikā Ranying Hatala akan malaluhan ewen. **22** Tutuk hapeteh raweí, Raja Uju Hakanduang gandang halalian buli nyembang Ranying Hatala, janjaruman ampin gawin ewen je uras jadi inyampaí umba uluh Lewu Bukit Batu Nindan Tarung tuntang umba Raja Bunu ewen hanak hajarian.

23 Manyameí Tunggul Garing Janjahunan Laut ewen hanak hajarian tuntang kakare raja-raja je atun mijen Lewu Bukit Batu Nindan Tarung uras karamahan dumah intu Lewu Bukit Tambak Raja, mentaí intu hete, hayak umba manatap paramun Raja Bunu ewen hanak hajarian je akan ilaluhan awi Ranying Hatala nanturung Pantaí Danum Kalunen mijen lewu injam tingang.

36 Uluh Lewu Bukit Batu Nindan Tarung sama manandang petak mampar buang ekā mangkalewu intu Pantaí Danum Sangiang

1 Ampī Ranying Hatala mangahandak tinaí akan mambagi ungkup kakaren raja-raja tuntang kameluh-kameluh bara Lewu Bukit Batu Nindan Tarung akan eka ewen je taheta palus ekā mijen gagenep ewen palus katatahī. **2** Sahelu bara Ranying Hatala mambagi tuntang maandak ewen handiaí tumun gawī, te Ranying Hatala mameteh ewen je kareh akan ilalus awi panakan Raja Bunu huang Pantaí Danum Kalunen. Ranying Hatala maatuh akan ewen ampin ekā mijen palus batang danumà, kalute kea kare panataú panuhā. **3** Limbah sama jadi hapeteh raweí, Ranying Hatala buli Batang Danum Banyahu Bulaú, Guhung Mangkilat Hintan, tuntang ewen Lewu Bukit Batu Nindan Tarung sama nampara madu pananjung manggau petak mampar buang.

4 Raja Sangen tulak batanjung panjang manggau ekā mijen, iē palus sundaú ije batang danum, intu hete are ruwut sahirai. Iē palus manandang petak mampar buang, hayak iē manyewut

aran batang danum jete bagare Batang Danum Barirai, Guhung Putak Buren Bulaú Lampang. **5** Raja Sangen tulak kea mananjung akan ije batang danum, hete are ruwut bajakah balayan, palus intu hete iē nampara manandang petak mampar buang, hayak iē mananggare aran batang danum jete bagare Batang Danum Jalayan, Guhung Riak Lamiang.

6 Raja Garing Hatungku Batulak kea batanjung panjang manggau batang danum petak mampar buang. Iē palus sundaú ije batang danum tuntang batang danum jete paham badehes tutu hayak atun bahantung ije bila. Hete Raja Garing Hatungku palus manandang petak mampar buang jete ekā mampendeng balaí ayū hayak iē mananggare aran batang danum te bagare Batang Danum Sangkalila Bulaú, Guhung Hintan Kananteng Tahl.

7 Limbah te tinaí ewen sama mambagi arepà bilang bulangan tambangà, babungkat mangkalewu huang batang danum aī-aī, hayak kea ampin kakare gawi-gawiā tumun je iatuh awi Ranying Hatala akan ewen, tuntang gawi ewen je mambatang tutu iete tantaí masi utus panakan Raja Bunu intu Pantaí Danum Kalunen. **8** Tinaí Raja Garing Hatungku palus babungkat bara Lewu Bukit Batu Nindan Tarung nanturung Batang Danum Sangkalila Bulaú, kalute kea iē palus nasaran pantar bulaú sulep ikuh tambun, imbità nanturung Batang Danum Sangkalila Bulaú. **9** Raja Garing Hatungku ewen due bulan bawi bambaíà Nyai Endas Bulaú Lisan Tingang, nabasan balaí ekā mijen hayak manyewut gangguranan aran lewu ekā mijen te bagare Lewu

Bukit Sinta Kasambuyan. **10** Raja Garing Hatungku ewen due bulan bawi bambaíà narantang Duhung Tunggal Pantang Langit, hayak Ranying Hatala manampa gangguranan aran tarantang Raja Garing Hatungku te bagare Raja Tunggal Sangumang Nyaring Emban Bakuwu Hanyi, palus ekā mijen iete Parung Suling Marakuran Liu, Napatah Bulaú Sangkalemu, Kalabien Puser Kambang Kabunteran Bulan. **11** Tinaí pantar bulaú sulep ikuh tambun tuntang rambat karuheí Bapa Sangumang je basaluh kajadian manjadi bajang kalingkaí lawung, palus hadari hayak basaluh tinaí manjadi karangking penyang karuheí tataú mijen Bukit Tampung Karuheí. **12** Jetuh je ihaga tinaí kareh awi tingang esun Raja Garing Hatungku, iete Raja Tunggal Sangumang je bagare arā Raja Sagagaling Langit, hayak aran pantar bulaú sulep ikuh tambun hubah arā hete bagare garing paleng bajamban kanderang tingang, sihung pantep tantean riak ujan bulaú, hayak jetuh je manjadi jamban Raja Sagagaling Langit nambang banama tingang namueí. **13** Jetuh jamban Raja Sagagaling Langit bara parung karangking penyang karuheí tataú mangguang tumbang Batang Danum Simpei Karuheí, nambang tamueí banama tingang mandulang bulaú untung aseng panjang, bulaú tampung buhul, bulaú aseng tipeng bereng akan ulun Pantaí Danum Kalunen. **14** Limbah narantang Duhung Tunggal Pantang Langit, Raja Garing Hatungku ewen due bulan bawi bambaíà Nyai Endas Bulaú Lisan Tingang babungkat tinaí bara Batang Danum Sangkalila Bulaú, nanturung ekā mijen je nabasan awi Ranying Hatala akan ewen sintung

due, iete intu Tasik Manuah, Batang Danum Tataú Nyahukan. **15** Ranying Hatala nyahuan Raja Garing Hatungku mukeí kakaren palakun Nyai Endas Bulaú Lisan Tingang iete Bukit Barantaí Bulaú, Parung Nyahu Marakunjung Liu, Kalabien Puser Kambang Kabunteran Bulan mijen tahanjungan Bukit Bulaú Salumpuk Rujan. **16** Je ihaga awi ewen sintung due iete suling bulaú rumbaí ambun, limbah te je melaí tuntang palus ihaga awi Raja Tunggal Sangumang iete gariding bulaú sangkalemu. **17** Limbah te kare raja-raja, nyai, kameluh, je babungkat mamindah arep ewen bara Lewu Bukit Batu Nindan Tarung nampara bara Tasik Ambun Baragantung Langit nyamah sembang Batang Danum Banyahu Bulaú.

18 Aran kare raja-raja tuntang kameluh intu Bukit Ambun Baragantung Langit iete bagare Tanggalung Anak Andaú, Hantarung Rajan Dahiang, Dahiang Mantung Bulaú, Tunggal Kurung, Putir Irang Pasihaí, Dahiang Batanduk Tunggal, Darehan Rajan Antang, Antang Rawing Batutuk Bunu, Putir Lanting Bawin Dahiang, Kameluh Irang Pasihaí, Antang Habarun Bulaú, Antang Habarun Lamiang, Antang Habarun Karungut, Antang Habarun Rujan, Antang Habarun Sangkalemu, Antang Baputi Manduí Riak Bulan, Putir Santang Sintung Uju, Umban Bulaú Balinga Pulu, tuntang Liang Tutuk Baluhur Ambun.

19 Aran kare raja-raja tuntang kameluh-kameluh intu Lewu Bukit Bajaga Bulan iete bagare Manyameí Kajangga Hatuen Bulan, Kameluh Pamalumpuk Bulan, Manyameí Hatuen Patendu, Manyameí Bintang Ijang Bawuí,

Manyameí Bintang Tampung Bua, Manyameí Bintang Ijang Pahera, Manyameí Bintang Kalianan, Manyameí Tatu Asun Bulan, tuntang Jangkarang Matan Andaú.

20 Aran kare raja-raja tuntang kameluh-kameluh intu Lewu Bukit Tambak Raja iete bagare Raja Helu Maruhum Usang, Patih Rumbih, Dambung Mangkurap, Patih Dadar, Patih Muhur, Raja Landa Bagadung Batu, Raja Sina Bakuncir Panjang, Raja Siam Tempun Tambaku Mangat, Raja Kaling Babilem Pamungkal Garantung, Raja Pait Panampa Ringgit, Ratu Jampa Panampa Balanga, Raja Sariantang Penyang, Garahasi Minton Panuang Badil Tambun, Kameluh Nyai Siti, Kameluh Diang Lawaí, Kameluh Nyai Bitak, Kameluh Nyai Banun, tuntang Kameluh Rangkang Sangiang.

21 Aran kare raja-raja tuntang kameluh-kameluh je mijen intu Lewu Bukit Batu Nindan Tarung iete bagare Raja Tantaulang Bulaú, Raja Singkuh Batu, Indang Salangking, Apang Selamat, Bungking Kalipapan Tanduk, Kameluh Sahumpuk Awang Sangalang, Raja Manurun Bunu, Raja Kamanduh Bunu, Raja Maliambung Bunu, Raja Manyimpeí Penyang, Raja Pamahimping Langit, Raja Mandurut Bunu, Raja Jangkarung Tingang, Busu Dandan Kahayan, Manyameí Sunsunan, Tiung Malianā, Raja Mandurut Bulaú, Hawun Baru Barun, Sabuyung Nyaring Uhing, tuntang Sabira Nangguí Garantung.

22 Aran raja tuntang kameluh je mijen likut Lewu Bukit Batu Nindan Tarung intu Talaga Matuk Dia Tawan Tumbang, Tasik Jamperung Isen

Batuana Hulū, iete Raja Bisu Bajela Bulaú Kanaruhan Buntat Batengap Rabia ewen due bulan bawi bambaià Kameluh Mandalan Bulan. **23** Amun huang jalanan banama nyahu tuntang lanting samben, te arā inyewut Tasik Galumbang Bulaú, Laut Jambangan Hintan, penda garing santah nangkenya kambang kabunteran bulan, sihung sundung nyangkalah lumpung matan andaú. **24** Tinaí aran ewen due huang katika te je hatue inyewut Raja Nyangkurun Batu, je bawi inyewut Putir Matenggar Langit. Ewen due te mahaga butuh panji ringkin danum basalupu butuh amben penyang, nyirat bulaú jara-jarang, ngalumbu bajakah nataú, kayu tataú. Amun uluh katawā, uluh je mahagā baka tataú manyambung.

25 Aran kare raja-raja tuntang kameluh-kameluh je mijen intu Lewu Bukit Lampayung Nyahu, Tasik Sangiang, Batang Danum Barirai iete bagare Raja Panyarawan Katingan, Raja Ngalang Bulaú, Raja Kanarean Sawang, Manyameí Pahang Tempun Lingga Garantung, Kameluh Tempun Tiawun, Kameluh Tiawun Bulaú, Kameluh Bungen Bulaú, tuntang Kameluh Bawi Randan.

26 Aran kare raja-raja tuntang kameluh-kameluh je mijen intu Lewu Bukit Sua Penyang, Batang Danum Jalayan, Rahang Penyang Karuheí iete bagare Raja Pampulaú Hawun, Raja Rawing Tempun Telun, Telun, Hamparung, Raja Duhung Bulaú, Raja Sahawung Bulaú, Bujang Barendeng Baka Impun Lawu, Ramping Tingang Balinga Nangkeru Metas Hurung Pulu, Bajang Linga-lingaí Lawung, Pakihu Bingkok Nantahan Bujur, Peteng Dawen Ura-

urái, Petak Baputi Kalabien Bintik Palangka, Pisaú Tampak Tumbang Tabanganen, Baliung Tinih Tumbang Tabangiaú, Kameluh Tempun Hendan Bulaú, Kameluh Hendan Bulaú, Rampan Bawi Hai, Kameluh Timuk Tantawa, tuntang Kameluh Panguraí Dare.

27 Aran kare raja-raja tuntang kameluh-kameluh je mijen intu Batang Danum Jalayan, Guhung Riak Lamian, lewu due hatandipah hajamban garing batang pantar, making ranying pandereh bunu, iete bagare ungkup hila pangantau ain Raja Mantir Mama Luhing Bungaí, Salutan Raja Nalawung Bulaú, balaíà iete Balaí Mihing Nyapundu Runjan, Sali Nyalung Maruruk Hintan; ungkup hila pajambileí ain Raja Duhung Mama Tandang, Langkah Sawang Apang Bungaí Sangiang, balaíà iete Balaí Nyahu Matunggang Pulu, Sali Ganggerang Bambuakan Jalatien.

28 Aran kare raja-raja tuntang kameluh-kameluh je mijen intu Lewu Bukit Sinta Bungaí, Batang Danum Sangkalila Bulaú iete bagare Kameluh Lentar Bulaú, Kameluh Langgir Bulaú, Kameluh Bayan Hintan, Kameluh Indang Paluí, Kameluh Indang Sangkanak, Kameluh Kambang Kabunteran Bulan, Putir Sintung Jahawen, Raja Haci, Raja Tunggal Sangumang, Rasing Penyang, Apang Sapahatu, Apang Sangkanak, Apang Maratih Sintung Uju, tuntang Anak Loting Sintung Uju.

29 Raja Tunggal Sangumang mijen intu likut Lewu Bukit Sinta Bungaí, mijen balaí aī je bagare Parung Suling Marakuran Liu, Napatah Bulaú Sangkalemu, Kalabien Puser Kambang

Kabunteran Bulan.

30 Aran raja tuntang putir je mijen intu Batang Danum Simpei Karuheí, Bukit Tampung Karuheí iete bagare Raja Sagagaling Langit tuntang Putir Kamasarin Garing.

31 Aran raja intu Lewu Bukit Entang Tingang, Batang Danum Entang Tingang iete bagare Raja Entang Tingang.

32 Aran raja intu Lewu Bukit Nyalampai Timpung, Batang Danum Nyalampai Timpung iete bagare Raja Nyalampai Timpung.

33 Aran kare raja-raja tuntang kameluh-kameluh je mijen intu Lewu Bukit Letai Runjan, Batang Danum Letai Runjan iete bagare Nyai Inai Mangut, Nyai Inai Kamandai, Nyai Inai Ingoi, Nyai Inai Botaú, Kariaú Inai Suri, Kaun Mina Bumbun, Manyang Benang, Rangka Runjan, Nyaring Karaú, Apang Reai Buroú, Patih Inai Bumbun, Jakā Jako Mandan Bunu, Tukaú Amaí Tuah, tuntang Oring Sangarang.

34 Aran kare raja-raja tuntang kameluh-kameluh je mijen intu Lewu Bukit Takaras Kereng, Tasik Mandalan Bulan iete bagare Duhung Keang Bunu, Ampit Putung Gambangan Nyahu, Tapahunduk Tuntung Tampaliaú Tungku, Pitik Rumbaí Bajampung Bulaú, Uhit Malingkahuí Balangkaí Lamiang, Hanjalutung Bakas Dia Malik Dawe, Sawang Santah Bunge Sundung, Tindan Nanjala Sawang, tuntang Tapang Jamperung Nyahu.

35 Aran kare raja-raja je mijen intu Lewu Bukit Sandung Tambarirang, Tasik Rampai Bulan, Rahang Kambang iete bagare Gambalang Bahandang

Rajan Sangiang, Tatu Samatian Tingang, Sangiang Riang Tingang, Nyalung Tatu Sangiang, tuntang Sawang Lambayung Nyahu.

36 Aran kare raja-raja tuntang kameluh-kameluh je mijen intu Lewu Bukit Linda Saran Bulan, Tasik Mangirai Bintang iete bagare Manyamei Tempun Telun Tingang, Kajangga Tanjung Garing, Liu Pimping Kaninding Jarenang, Acak Menteng Baturus Bunu, Raja Pandak Habarun Dare, Raja Pandak Kanuntung Peteng, Manyamei Tungking Langit, Kameluh Tempun Tiawun Tingang, Kameluh Kuwun Garantung, Rampan Tumbang Tutuh Bintang, Rampan Tumbang Uling Nyaring, Rampan Tumbang Sahai Timpun, Rampan Tumbang Sahai Samben, Rampan Tumbang Sahai Lamiang, Rampan Tumbang Sahai Dare, Rampan Tumbang Sahai Garantung, Rampan Tumbang Sahai Runjan, Rampan Tumbang Mahanjung Jala, tuntang Rampan Laut Pahe.

37 Aran kare raja-raja tuntang kameluh-kameluh je mijen intu Lewu Bukit Tampung Buhul, Batang Danum Hintan Mantining Langit, Balaí Saramin Nalaga Bulaú iete bagare Sambung Maut, Nyabilalang Habunu, Sabaliki Hanyi, Raden Tunjung, Jahangan Tingang, Pusun Balusuh, Pusun Garing, Kambang Garing, Putir Pating Garing, Tenung Garagak, Raja Tekai Tingang, tuntang Kamatek Tintu Bidik.

38 Aran raja tuntang kameluh je mijen intu Bukit Nanjungan Garu, Tasik Kaharingan intu Garing Nganderang Sukah Lumpung Matan Andaú iete bagare Panyalumpuk Mangku Amat Sangen ewen due Nyai Jaya Sangiang.

39 Aran kare raja-raja je mijen intu Tasik Gandang Ngarambang Nyahu, Laut Tuwung Hambalat Kilat, eka gandang batu je basalupu apuī nyaru puntungà Nyalung Kaharingan puntungà, huang Batang Danum Mendeng Mahejan Langit iete bagare Gambala Rajan Tanggara, Janjalung Tatu Riwtu, Sangkaria Nyaru Menteng, Raja Runjang Langit, tuntang Siak Sakung Baguti Tandang Harimaung.

40 Aran kare raja-raja tuntang kameluh-kameluh je mijen intu Lewu Bukit Nabuhi Bulaú, Tasik Pawah Bulaú iete bagare Kameluh Indu Tiwun Bulaú, Rajan Burung Tampung Bua, Tumbu Tatu Batu, Tambak Tatu Petak, Umbuh Tatu Pulut, Ongguh Tatu Pareí, tuntang Jampen Tatu Katam.

41 Aran kare raja-raja tuntang kameluh-kameluh je mijen intu Lewu Bukit Kangantung Gandang, Tasik Malambung Bulaú iete bagare Raja Angking Penyang, Raja Tuntung Tahaseng, Raja Tuntung Umur, Raja Ngasaú Langit, Raja Bea Langit, Raja Sapunang, Raja Sapaning, Raja Ulih Napakah Langit, Raja Nguntuhe Hintan, Raja Ujan Pintih Nanjala Sawang, Raja Riwtu Ambun Hatantali, Putir Selung Tamanang, Kameluh Selung Untung, Kameluh Selung Buhul, Kameluh Selung Daha, Kameluh Selung Bulan, Kameluh Timbang Tambangan Nyahu, Kameluh Timbang Tambangan Daha.

42 Aran raja je mijen Balaí Ulang Harantung, hulu Batang Danum Banyahu Bulaú iete bagare Manyameí Rajan Untung.

43 Kalute ampin kakare raja-raja tuntang kameluh-kameluh, palus uluh

are pangarak Lewu Bukit Batu Nindan Tarung je sama manggau batang danum ekā manampa lewu humā, tuntang je pangkaraḥiā batulak bara Lewu Bukit Batu Nindan Tarung iete bagare Raja Pampulaú Hawun Kanaruhan Batanduk Tunggal Randing Talampe Bajampung Tahlil.

44 Raja Pampulaú Hawun mijen mapan banama. Awi iē mapan banama te, iē mamali katahin uju andaú dia tau uluh bawi mingkang taluh je inggawī, katahin te kea iē manyadia danum, masip manyuang kandarāh bulaú, sangku bulaú, mangat uluh kareh ela haguēt balua bara parung mahawangā muhun manduī atawā muhun masip. **45** Kilen kea Kameluh Mandalan Bulan, betau Raja Pampulaú Hawun katika jete bukeí kambang tarungà awi kahalapà kilaú bulan babangkang langit, binta-bintang panyaran pipī, nyamah sembang lawang langit, kalang labehun jata. **46** Yē dumah Raja Awu-awu Tasik najahan kambang tarungà, palus tende ningang batang empas salumun tambun. Nduan uju andaú uju alem jadi katahī palus kilaú bulan panahu mateí iē nuntun kilen ampī uluh je bagare Kameluh Mandalan Bulan. **47** Yē Raja Awu-awu Tasik mangangkanan sampaga apuī, eleh balasut bakarah uluh are, nyamah teah danum mijen kandarāh bulaú, sangku bulaú, je iasip awi Raja Pampulaú Hawun. **48** Katahanan sampaga apuī, Kameluh Mandalan Bulaú balua parungà, nyarayung baun tunggang parung, taratuntū tingang tarawang, palus iē nunjung kumī, eleh parandahap tarin burung tingang palus nyalan kabanting mateí. **49** Limbah te taratuntū tinaí burung antang, palus nunjung kumī

tinaí Kameluh Mandalan Bulan, leka parandahap taribangā burung antang, palus nyalan kabanting mateí kea. Limbah te taratuntū tinaí tambarirang, mahin eleh parandahap taribangā palus nyalan kabanting mateí kea. **50** Kilen kea taratuntū ih tinaí randung banama je mapan awi nyahā Raja Pampulaú Hawun, yē randung banama te palus basaluh manjadi batu ampar banama. Tau kalute awi Kameluh Mandalan Bulan tege mahaga tatek hintan mintir langit huang kasingā. **51** Tatek hintan mintir langit puna ingahandak awi Ranying Hatala intu Kameluh Mandalan Bulan, jete nah bukū iē inyewut Balun Raung Saratus Jahawen Puluh, awi saratus jahawen puluh hatuen tingang je nyalan kabantingā awi kumin Kameluh Mandalan Bulan. **52** Limbah te harun Raja Pampulaú Hawun ewen handiaí ije kababuhan babungkat nanturung Batang Danum Jalayan, Guhung Labehu Pali, palus mahawang Lewu Bukit Sua Penyang, Rundung Kereng Tajur Paturung.

53 Kalute ampin taluh je ingahandak awi Ranying Hatala maatuh uluh Lewu Bukit Batu Nindan Tarung, Rundung Kereng Bantilung Nyaring.

37 Ranying Hatala malaluhan Raja Bunu ewen hanak hajarian nanturung Tantan Bukit Samatuan

1 Amun jadi sampai katika je jadi inukas awi Ranying Hatala dumah, Ranying Hatala manyuhu Raja Uju Hakanduang hadurut akan Lewu Bukit Tambak Raja. **2** Limbah hapeteh raweí umba Ranying Hatala, palus Raja Uju Hakanduang hadurut nanturung Lewu Bukit Tambak Raja, tumbang lawang

langit. **3** Dia umbet ije kahaliman pinang, Raja Uju Hakanduang sembang Lewu Bukit Tambak Raja. Hete ewen palus janjaruman umba Raja Bunu uka manatap arep ewen, basa Ranying Hatala atun dumah malaluhan ewen hanak hajarian. **4** Raja Bunu nahingan peteh mandehen te jadi atun hajamban Raja Uju Hakanduang, te ewen hanak hajarian manatap arepā, tuntang kakare raja-raja bara Lewu Bukit Batu Nindan Tarung uras karamahan dumah kea, kalute kea uluh tingang apangā, tingang indangā, tambun paharī, uras karamahan dumah. **5** Sana uluh are uras atun hakampeleng intu Lewu Bukit Tambak Raja, te Ranying Hatala hadurut mamparahan arepā huang kabentukan ewen uluh are. **6** Ampī sahelu bara Ranying Hatala malaluhan Raja Bunu ewen hanak hajarian, tuntang atun kea raja-raja je beken je akan mandengan Raja Bunu hadurut. **7** Ranying Hatala mameteh umba Raja Bunu palus ewen handiaí kuā:

*Aku janjaruman petehkū akan Raja Bunu palus kakare ketun handiaí je atun hakampeleng intu Lewu Bukit Tambak Raja tuh, uka ketun mingat tutu-tutu ampin kakare talatah gawin ketun belum huang lewu injam tingang tuntang gawin jalan ketun haluli buli Aku, je iharagapan awi panakan paharim Raja Sangen tuntang Raja Sangiang. **8** Tinaí gawin panakan ayun Raja Sangen tuntang Raja Sangiang, keleh jete ingat tutu-tutu awi ketun, basa kakare talatah gawi akan panakan Raja Bunu je belum huang Pantaí Danum Kalunen, jete puna gawin panakan ain*

ewen sintung due. 9 Basa gawi tiwah suntu je jadi ilalus huang Lewu Bukit Batu Nindan Tarung, jete puna manjadi suntu kareh akan anak esun Raja Bunu je manyuang petak danum sahapus Pantaí Danum Kalunen. 10 Tuntang intu tiwah suntu te kea atun gitan awi ketun haluli, ampin jalan buli manalih Aku, tuntang hinje Aku palus katatahī, iete akan panakan Raja Bunu je puna bagin mateí. 11 Limbah te tinaí, huang katika ketun malalus tiwah suntu bihin, ikaú Raja Bunu palus kare garing tarantangmù uras katawan kilen ampin gawi amun anak esum mateí, ketun malalus gawi tantulak ambun rutas mateí tuntang gawi akan liaú haring Kaharingan, sahelu bara iē buli haluli manalih Aku.

12 Sana hapus auh Ranying Hatala janjaruman kare peteh umba Raja Bunu tuntang kakare ungkup babuhā, hayak auh nyahu batengkung ngaruntung langit homboh malentar kilat basiring hawun, Ranying Hatala manjadian palangka bulaú lambayung nyahu je hai pahalendangā, datuh pahalingeíā. **13** Palangka bulaú lambayung nyahu puna lenda-lendang, linge-lingeí ampī, bara gantung Lewu Bukit Tambak Raja intu tumbang lawang langit. Te Ranying Hatala palus nyahuan Raja Bunu ewen hanak hajarian, kalute kea kakare raja-raja je mandengan ewen hadurut, uras lumpat huang palangka bulaú lambayung nyahu, hayak cukup kea kare puat bambuhatā. **14** Tinaí raja-raja je mandengan Raja Bunu ewen hanak hajarian ilaluhan awi Ranying Hatala iete bagare Antang, Patahu, tuntang

kakare panakan raja-raja je beken je injadian Ranying Hatala sahelu bara atun panakan ain Manyameí Tunggul Garing Janjahunan Laut. Ura-uras ewen lumpat palangka bulaú lambayung nyahu. **15** Limbah uras jadi batatap, te Ranying Hatala malaluhan Raja Bunu ewen hanak hajarian tuntang kare raja-raja je mandengan ewen mahapan palangka bulaú lambayung nyahu, balua tumbang lawang langit nanturung tantan Bukit Samatuan hila Pantaí Danum Kalunen, hayak te kea ewen nunjung tukiú tingang, mangkat lahap rawing hangka uju lulang luli naharep baluman matan andaú belum. **16** Balasang kilat panangkaje andaú, palangka bulaú lambayung nyahu hadurut ngasuhan pamahimping langit mahalaú ambun hatantilap halawu tantan Bukit Samatuan intu Pantaí Danum Kalunen. **17** Tantan Bukit Samatuan hila Pantaí Danum Kalunen, mangat ulun kalunen dapit jeha handung hakatawan, jete bukit ndu helat Kahayan Rotot umba Kahayan Katining, kalute auh gangguranan aran eka palangka bulaú lambayung nyahu te sembang, tuntang intu hete kea eka Raja Bunu ewen hanak hajarian palus kakare raja-raja je mandengan ewen te mijen. **18** Tinaí bara eka ewen mijen te, ewen manampayah hakaliling tantan Bukit Samatuan. Hete taratuntū atun tasik, batang danum, petak mampar buang, kakare kayun sangalang garing, puna lamat-lamatan dia gitan sarā. **19** Limbah ewen jadi uras baungkar puat bara palangka bulaú lambayung nyahu, ewen gandang halalian buli hajajitan bulaú namburak awi Ranying Hatala, hayak peteh je pangkalepahā bara Ranying Hatala akan Raja Bunu ewen hanak hajarian, uka ewen tutu-tutu

mingat huang tuntang malalus kare gawi tumun je iatuh awi Ranying Hatala umba ewen. **20** Ranying Hatala tuntang Raja Uju Hakanduang palus kea Manyamei Tunggul Garing Janjahunan Laut ewen hanak hajarian, kalute kea kakare sihung lalundungā uras gandang halalian buli bara Bukit Tambak Raja manalih Lewu Bukit Batu Nindan Tarung. **21** Tinaí je mahaga Lewu Bukit Tambak Raja limbah Raja Bunu ilaluhan akan Pantai Danum Kalunen, iete bagare raja-raja bara panakan Raja Bunu je kajalaten tilap intu Pantai Danum Kalunen, je induan haluli mahapan palangka bulaú lambayung nyahu awi Ranying Hatala, tuntang aran ewen te atun itah nahingā kareh huang katika mambagi ungkup ulun Pantai Danum Kalunen.

22 Kalute ampin kakare taluh handiaí je jadi iatuh awi Ranying Hatala akan Raja Bunu ewen hanak hajarian tuntang akan ewen Lewu Bukit Batu Nindan Tarung hemben huran.

38 Lewu Bukit Batu Nindan Tarung limbah uluh are babungkat

1 Limbah Ranying Hatala mambagi kare raja-raja tuntang kameluh-kameluh babungkat akan eka ewen je taheta bara Lewu Bukit Batu Nindan Tarung limbah gawi tiwah suntu, Lewu Bukit Batu Nindan Tarung inyewut tinaí Lewu Kaleka Bukit Batu Nindan Tarung, Rundung Kereng Angkat Bantilung Nyaring, tuntang puna bakarinah ampin katunisā. **2** Tinaí raja-raja tuntang kameluh-kameluh je batisa intu Lewu Kaleka Bukit Batu Nindan Tarung iete tarantang anak esun Manyamei Tunggul Garing Janjahunan

Laut ewen due Kameluh Putak Bulaú Janjulen Karangan ewen due puluh biti. **3** Ewen tuh je mahaga panataú je batisa tuntang puna dia ewen mimbitā babungkat, awi jadi iatuh manumun peteh mandehen Ranying Hatala, tuntang je batisa iete lalang tambangap langit basuang behas nyangen tingang, pulut lumpung penyang, hayak inutup mahapan pundang lauk ila-ilai langit. Jete dia tau rugi tuntang dia tau una, ingaut tuntang imipih mani-manih batambah are tuntang batambah hai. **4** Limbah te tinaí je batisa kea intu hete iete hanggulan garing je halajur kuwu-kuwu apuiā, tuntang hambutut garing je dia tau lepah. Limbah te Balaí Jala Miring Langit, palus karen pulaú pehun sawang, bulaú sangkalemu, pulaú bua, metu pambelum, burung usik, ueí rantihan tingang, tuntang tengang bulaú sangkalemu.

5 Limbah te Ranying Hatala nyahuan Raja Angking Penyang ewen due Putir Selung Tamanang bara Bukit Bulaú Kangantung Gandang, Kereng Rabia Nunyang Hapalangka Langit, nyambalut manjadian kambang garing nganderang sukah lumpung matan andaú manjadi pareí manyangen tingang, pulut lumpung penyang, je nyandang rahian, hayak padurutā tinaí nanturung Pantai Danum Kalunen. **6** Awi panakan Raja Bunu intu Pantai Danum Kalunen hatala tuntung tahasengā, lepah jata ndu tambing nyamā, basa behas nyangen tingang je ilaku ewen hemben huran bara lalang tambangap langit lius ewen ilaluhan awi Ranying Hatala akan Pantai Danum Kalunen jadi lepah, kapadahal peteh Ranying Hatala, amun behas te ilaku tuntang imindah bara lalang

tambangap langit, iē puna tau lepaḥ hayak dia tau batambah kilau iē mijen huang lalang tambangap langit. **7** Ranying Hatala mameteh kea umba Raja Angking Penyang ewen due Putir Selung Tamanang, amun ewen due malaluhan parei manyangen tingang, pulut lumpung penyang, te mahapan palangka bulaú lambayung nyahu je tau nganderang bulaú uja-ujan, nyahengkak rabia je rintirintih, nelun bulaú namburak kuntep uju sembang garantung. **8** Limbah sama jadi hapeteh rawei, Ranying Hatala palus gandang halalian buli, kalute kea Raja Angking Penyang ewen due Putir Selung Tamanang sama gandang halalian buli balaia intu Bukit Bulaú Kangantung Gandang.

9 Metuh Raja Angking Penyang ewen due Putir Selung Tamanang nyambalut kambang garing nganderang sukaḥ lumpung matan andaú, hete atun Ranying Hatala mameteh umba parei manyangen tingang. **10** Auh peteha:

Mangat panakan Raja Bunu handung hakatawan kagunan bitim parei manyangen tingang, je bakan bara akan tuntung tahaseng tuntang tambing nyaman ewen. Ikaú akan ndu duhung luang rawei ewen Pantaí Danum Kalunen nyembang Aku, awi Aku je puna katamparan taluh handiaí, kalute kea Aku je kahapus.

11 Raja Angking Penyang ewen due Putir Selung Tamanang manyadia kakare taluh je imeteh awi Ranying Hatala sahelu bara ewen due malaluhan parei manyangen tingang, pulut lumpung penyang akan Pantaí Danum

Kalunen. **12** Tumun peteh Ranying Hatala palus kahandakà je manjadi, te palus atun palangka bulaú lambayung nyahu hayak atun kea jadi sadia ije pati bahandang tabala raja, pambuk galungan penyang basuang uju sambang garantung kuntep uras kamaras baú, basuang parei manyangen tingang, pulut lumpung penyang. **13** Limbah taluh handiaí te uras jadi sadia, te Raja Angking Penyang ewen due Putir Selung Tamanang malaluhan palangka bulaú lambayung nyahu nanturung tantan Bukit Samatuan intu Pantaí Danum Kalunen nyembang Raja Bunu ewen hanak hajarian. **14** Andaú Raja Angking Penyang ewen due Putir Selung Tamanang malaluhan palangka bulaú lambayung nyahu, andaú te kea Raja Bunu karehū mampah pulaú pehun sawang, nyahep ruang jumpung bunge, palus taratuntū pahalendang palangka bulaú lambayung nyahu. Hanjak rantang pahalawang huangà, rindang pahateluk kalingū, palus bawa hatangkiaú, reuk harandema, ngampeleng garing tarantangà. **15** Raja Bunu malawu riwut rawei kuà:

Iyoh garing tarantang, itah atun kanuah parei manyangen tingang, pulut lumpung penyang, pahadurut awi Ranying Hatala akan hatala tuntung tahaseng itah Pantaí Danum Kalunen, ndu jata tambing nyaman luwuk kampionship bunu, tuntang akan ndu duhung luang rawei, bunu bamban panyaruhan tisuí itah, nyembang Ranying Hatala ewen due Jata Balawang Bulaú.

16 Yē parei manyangen tingang, pulut lumpung penyang, kalabiē palus nangkaluman awi Raja Bunu palus kare

garing tarantangà mijen petak sintel habalambang tambun, marung liang deret habangkalan karangan, palus bagi-babagia akan uluh tingang esū sahapus Pantaí Danum Kalunen.

17 Kalute ampin kahandak Ranying Hatala jadi manataú Pantaí Danum Kalunen, manenga pareí manyangen tingang, pulut lumpung penyang, akan hatala tuntung tahaseng, jata tambing nyaman utus Raja Bunu intu Pantaí Danum Kalunen.

39 Ranying Hatala mambagi ungkup panakan Raja Bunu manyuang Pantaí Danum Kalunen

1 Limbah hapus tilap jalatien panakan Raja Bunu, kakare anak esū, buyut entahà, ewen mangkalewu huang Pantaí Danum Kalunen, hete ewen paham tutu angkat huang madu hasundaú umba Ranying Hatala. **2** Gagenep andaú alem baya mahining sarita bewei auh pabelum ewen Pantaí Danum Sangiang je puna rami tutu, amun tatu ewen Raja Bunu manyarita akan ewen, hayak uluh Pantaí Danum Sangiang dia tau mateí, kalute kea taluh handiaí huang pabelum ewen jatun ati katapasà. **3** Lewu ewen huang Pantaí Danum Kalunen puna hai tutu. Ewen tau pakat bulat, ije auh tiruk itung, bagawi handep habaring hurung, pakat putar, belum sanang mangat, hayak ewen manyewut aran lewun ewen te bagare Lewu Tambak Raja, Rundung Timbuk Kanarakan.

4 Kilen kea ewen Lewu Tambak Raja lampang tirukà hapakat mangun parung hai hayak gantung ngimai lumpung matan andaú, habangunan siru ambu

nguis kambang kabunteran bulan, akan ndu jamban ewen maja Pantaí Danum Sangiang tuntang maja Ranying Hatala. **5** Kueh balandung tahi, ewen nampara baramu kayun sangalang garing, puna nungka-nungkang andaú ewen hakampeleng, pakat putar nabasan parung hai hayak gantung, ngimai lumpung matan andaú. Yē palus pendeng ewen parung hai, sasa-sasar tukep lius sembang Pantaí Danum Sangiang. **6** Ranying Hatala nuntun ampin taluh gawin buyut entah Raja Bunu kalute, puna dia hakalayan sinde, tuntang ampī puna sasa-sasar gantung, ewen bagawi manyangit are bitī kilaú bitik rimpung nantelaí ruhung, rowan salagate miring sahempun pasang mangun sarangā. **7** Kuan Ranying Hatala:

Amun kilaú etuh panalataí lingu ewen, andaú kueh tau tuntung karangkan lingungkū manjadian Pantaí Danum Kalunen, luwuk kampuan bunu.

8 Yē Ranying Hatala palus mukeí kahain kuasā, nampaurai japa jimat tanteng. Hayak auh nyahu batengkung ngaruntung langit homboh malentar kilat basiring hawun, Iē manampa kakare kutak pander ewen sama hakabeken, tuntang palus mubah ngabeken kea kare tiruk tuga, itung-pitung. **9** Te salenga ih ewen handiaí sama mimbit auh kutak pander āi-āi gagenep bitī, pander sarita dia tau hakarasuk, kalute kea ampin kare gawigawian ewen uras hakabeken tintū. **10** Amun kuan ije bitī balaku juluk tasal, injuluk ragaji awi je beken. Amun kuan ije balaku ragaji, injuluk pahat, paku, sipat tali awi je beken. Kalute laju-lajur dia tau hasaruruí. Amun kuan ije

mimbit buli, nyuhu-nyuhu ewen bagawi. Belahà mamungkar kare gawin ewen je jadi. **11** Sana kakare pander sarita ewen te hakabeken, dia tau hakarasuk, ewen sama buli ekà, palus mananjung manggau petak mampar buang, sungeí saka, tasik lumbah, bukit panjang, eka ewen mangkalewu mambelum arepà gagenep bití.

12 Huang ije katika, Ranying Hatala masi manampayah ampin ewen Lewu Bukit Tambak Raja, intu Pantaí Danum Kalunen. Yē Ranying Hatala palus hadurut, salenga atun huang bentuk ewen handiaí, hayak Iē palus hamauh mantehaú ewen uka hakampeleng mahining auhà majar maningak, palus mambagi ungkup akan manyuang sahapus petak huang Pantaí Danum Kalunen. **13** Ranying Hatala maatuh akan ewen, bara eka ewen kareh mangkalewu palus manyewut aran ewen je akan manataí arepà belum manyuang petak mampar buang sahapus Pantaí Danum Kalunen. **14** Aran ewen je inyewut awi Ranying Hatala je manjadi utus kakare ulun kalunen huang hunjun petak Pantaí Danum Kalunen iete bagare Raja Helu Maruhum Usang, Raja Sariantang Penyang, Kameluh Rangkang Sangiang, Raja Landa Bagadung Batu, Raja Sina Bakuncir Panjang, Raja Siam Tempun Tambaku Mangat, Raja Kaling Babilem Pamungkal Garantung, Raja Pait Panuang Duit, Ratu Jampa Panuang Balanga, Garahasi Minton Panuang Badil Tambun, Nyai Siti, Diang Lawaí, Nyai Bitak, Raja Malayu Batatupung Bulaú, Patih Rumbih, Dambung Mangkurap, tuntang Patih Dadar. **15** Limbah Ranying Hatala maatuh hayak manyewut aran ewen,

paham hanjak tutu ampin ewen, tuntang ewen palus manyadia arepà akan hagnet manandang manyadia eka ewen mangkalewu, manataí arep ewen sahapus petak danum huang Pantaí Danum Kalunen. **16** Huang kahapus Ranying Hatala majar maatuh ewen handiaí, Iē mameteh umba ewen kuā:

Ketun tuh kareh amun jadi sampai katikā je jadi inukaskū akan ketun, ketun uras buli mijen Lewu Bukit Tambak Raja huang Tasik Ampar Samben intu Pantaí Danum Sangiang, baya je mijen iete anak esun ketun je belum manyuang Pantaí Danum Kalunen.

17 Kalute Ranying Hatala maatuh tuntang mambagi ungkup ulun kalunen panakan Raja Bunu huang Pantaí Danum Kalunen, tumun je ingahandak awī kabuat.

40 Mangku Amat Sangen ewen due Nyai Jaya Sangiang saluh sawak bambang penyang

1 Limbah tiwah suntu tatu tantaulang bulaú, hiang tantaunyet nyaring intu Lewu Bukit Batu Nindan Tarung, Manyameí Tunggul Garing Janjahunan Laut ewen due Kameluh Putak Bulaú Janjulen Karangan inyuhu awi Ranying Hatala mamindah arepà manalih ije eka. **2** Tinaí eka je inyuhu tuntang inampa awi Ranying Hatala akan ewen due iete bagare Batang Danum Tataú Nyahukan, tuntang aran ewen due intu hete bagare Mangku Amat Sangen tuntang Nyai Jaya Sangiang. Ewen due mijen huang ije parung hayak mahaga garu bahari, santi mait, ulih mambelum tingang tapatusuk pimpingà,

nampaharing haramaung nampalang bulu. **3** Intu hulu Batang Danum Rasaú Kaput ewen due mijen kabuat, jatun uluh beken umba ewen due, tuntang huang katika tiwah suntu intu Lewu Bukit Batu Nindan Tarung, sapunā pea ati ulun je iniwah ewen, ulun kalunen metuh te hindaí atun, baya je atun tikas sangiang ih, tuntang ewen te dia tau mateí. Limbah te tatu tantaulang bulaú ewen due bulan bawi bambaíā hubah tampajeā tuntang ekā mijen.

4 Huang katika Ranying Hatala mambagi ungkup kakare raja-raja tuntang kameluh-kameluh, ewen uras jadi atun ekā mijen mangkalewu, tuntang Raja Pampulaú hawun ewen hanak hajarian mangkalewu intu Bukit Sua Penyang, Kereng Tajur Paturung. **5** Kilen kea panalataí Raja Pampulaú Hawun salenga haban karas intu Lewu Bukit Sua Penyang, Rundung Kereng Tajur Paturung, mawi kare garing tarantangā uras kapehe atéi nuntun kahaban uluh tingang apangā. **6** Raweí Kameluh Tempun Hendan Bulaú:

Amun kilaú etuh panalataí, uluh tingang apang itah tuh dia balang nyalan kabanting mateí. Keleh tingang nyahe ketun sintung due, Raja Linga Rawing Tempun Telun tuntang Raja Duhung Bulaú, pajing nanturung uluh tingang tatu itah Mangku Amat Sangen ewen due Nyai Jaya Sangiang, awi ewen due te atun mahaga garu bahari santi mait, akā mampakeleh kahaban uluh tingang apang itah tuh.

7 Kuan Raja Duhung Bulaú:

Amun kilaú te panalataí, aku ih batulak nanturung tingang tatu

itah te.

Yē Raja Duhung Bulaú tingang nulak lunuk. Kueh balandung tahi, sembang Raja Duhung Bulaú intu Tasik Sangkalemu, palus ngitarā haluan lasangā nintu tumbang Batang Danum Rasaú Kaput. **8** Tuje Batang Danum Rasaú Kaput puna patep sinde, atep awi batang rasaú belum, jatun je tau ihuru. Yē tende Raja Duhung Bulaú hete palus manandang batang rasaú. Nandang kahain kiap, nyurung kahain amak, ebe-ebes nanjan bereng Raja Duhung Bulaú, palus dia tau iē tame Batang Danum Rasaú Kaput nyembang eka uluh tingang tatū. **9** Kutuh katahī jadi Kameluh Tempun Hendan Bulaú manunggu Raja Duhung Bulaú karamahan dumah, palus jatun lembut. Kuan Kameluh Tempun Hendan Bulaú:

Teraí nyahe Raja Linga Rawing Tempun Telun, pajing bitim batulak tinaí manalih Raja Duhung Bulaú kanih, naraí haweh taluh je mawi iē nyamah tuh palus dia karamahan dumah, mateí beweí uluh tingang apang itah tuh.

10 Yē Raja Linga Rawing Tempun Telun palus batulak mahapan lasang bangkiraí bahenda, banyak Raja Duhung Bulaú. Dia umbet ije kahaliman pinang, sembang Raja Linga Rawing Tempun Telun intu Tasik Sangkalemu, hayak ngitarā haluan lasang bangkiraí bahenda hakatintu tumbang Batang Danum Rasaú Kaput. **11** Yē nuntun Raja Duhung Bulaú puna ebe-ebes nanjan berengā, malawu raweí Raja Linga Rawing Tempun Telun:

Iyo-iyoh karungkung aring, nyewutkū usa-usang ih bitim jadi

*sembang eka uluh tingang tatu
itah.*

Tumbuh Raja Duhung Bulaú:

*Kueh tau takan rasaú jetuh
nandang kahain kiap, nyurung
kahain amak, nandang kahain
amak, nyurung kahain tana.*

12 Tasang raweí Raja Linga Rawing
Tempun Telun:

*Mateí indang, kareh aku tuh
manandangà tinaí.*

Hayak nyilak nyahumpak duhung
papan benteng, duhung kurik tutuk jela
tambarirang. **13** Palus malawu raweí
Raja Linga Rawing Tempun Telun:

*Has rasaú kaput, amun ketun dia
nahuang lepah sawang, nunjung
balayu dawem, lila-lilang ih
kajanjulu, jalangkù Raja Linga
Rawing Tempun Telun nyembang
tingang tatu'kù Mangku Amat
Sangen ewen due Nyai Jaya
Sangiang.*

Yē palus lila-lilang rasaú kaput, hayak
pananturaú jalaan ewen sintung due
sembang eka uluh tingang tatū. **14**
Sembang eka uluh tingang tatū, hayak
malawu raweí Raja Linga Rawing
Tempun Telun kuā:

*Tuh tingang tatu Mangku Amat
Sangen, tuntang Nyai Jaya
Sangiang, kue tingang esum
karamahan dumah.*

Hayak ewen due mantang nyarandai
parung uluh tingang tatū.

15 Panjung tingang esu. Naraí
bulan janjulan ketun sintung
due, pājing mandukan bumbung
daren purun helu.

Raweí uluh tingang tatū, hayak
basarangan luhing pantar pinang,
tingang tatū Mangku Amat Sangen
ewen due Nyai Jaya Sangiang. **16** Sama
rantep garing pandukā munduk, Raja
Linga Rawing Tempun Telun ewen
sintung due Raja Duhung Bulaú palus
malawu raweí:

*Naraí isek nasekam kue tingang
esum, tatu. Kue karamahan
dumah nyembang bitim balaku asi
belum, palakuan awat maharing,
awi uluh tingang apangkù mijen
Lewu Bukit Sua Penyang,
ngantung asengà tapajurang-juri,
nyapenda hinting bawak lamiang,
tawam dia usang ih iē mahutus
lihin kue tuh.*

17 Nunjung kumin tingang uluh tingang
tatū Mangku Amat Sangen ewen due
Nyai Jaya Sangiang, palus malawu
raweí:

*Naraí mawi uluh tingang
apangmù esu, usa-usang ih iē
barigas, naraí usah kue tingang
tatum nanturung Lewu Bukit Sua
Penyang.*

18 Raweí Raja Linga Rawing Tempun
Telun ewen due Raja Duhung Bulaú
kuā:

*Dia, tingang tatu. Nyama-nyamah
ih ketun sintung due nanturung
Lewu Danum Jalayan, aluh
tingang apangkù jadi barigas, awi
are uluh tingang esum je dia puji
hasembang tanduk umba bitim
tatu.*

19 Raweí Mangku Amat Sangen ewen
due Nyai Jaya Sangiang kuā:

Iyoh tingang esu, kue tingang

*tatum tuh dia ulih mawi jаланan
kanih kate, mikh dia ulih ketun
mahaga palin bambang penyang
ikeí sintung due. Basa amun saluh
sawak bambang penyang kue
sintung due, pea ketun tau mite
kue tingang tatum tinaí.*

20 Raja Linga Rawing Tempun Telun
malawu rawéi kuā:

*Naraí gangguranan palin
bambang penyang ketun sintung
due tingang tatu?*

Rawéi tingang tatū kuā:

*Naraí isek nasekam tingang esu,
are palin kue tingang tatum, palin
taluh panginan: **21** Bajang
kalingkaí lawung, karahaú
tunjang pahera, palanduk
sumping taliwu, singkah uhut
tanjung, ujaú baberang hanyi,
bajeí bapelek penyang, kalakaí
batuyang bintang, ucin ngandang
tunggul, ngandang batang,
ngandang petak, pinang nampuh
riwut, tuntang sirih nambeleng
pusuk manyawung. **22** Limbah te
tinaí lauk tampala lelung
hempeng, tatawun ngarungkung
sahep, jajulung tusuk samben,
saluang renteng tantahan, undang
salintip kumpang, bua botong,
tuntang tungkul munus. Jete palin
kue tingang tatum.*

23 Rawéi Raja Linga Rawing Tempun
Telun ewen due Raja Duhung Bulaú
kuā:

*Amun kai panalataí tingang tatu,
ikeí Lewu Danum Jalayan mahi
sama ih mamalī, tuntang dia
memen ih tingang tatu, ela ketun
due nunjung ikeh tingang.*

Rawéi tingang tatū kuā:

*Amun kalute tingang esu, tau
batulak kue tingang tatum.*

24 Yē Raja Linga Rawing Tempun
Telun ewen Raja Duhung Bulaú palus
tingang nulak lunuk halalian Lewu
Danum Jalayan, Lewu Bukit Sua
Penyang, Rundung Kereng Tajur
Paturung, haya-hayak umba tingang
tatū ewen sintung due. **25** Kueh umbet
ije kahaliman pinang, sembang ewen
sintung epat intu Lewu Bukit Sua
Penyang, nuntun uluh tingang apangā
Raja Pampulaú Hawun usa-usang
mampah pulaú pehun sawang, tanju-
tanjung bentuk lawang parintaran
tingang. **26** Ture-ture Raja Duhung
Bulaú ewen due Raja Linga Rawing
Tempun Telun nuntun kamit kajayan
garun uluh tingang tatū Mangku Amat
Sangen ewen due Nyai Jaya Sangiang.
27 Kilen kea Raja Duhung Bulaú
malawu rawéi umba uluh bulan betaúā
Kameluh Tempun Hendan Bulaú kuā:

*Uluh tingang tatu itah tuh hindaí
ati hakananan rangkan panginan
simpan, aku tuh handak batulak
helu mangilaú taluh akan rangkan
pangan hapan itah basarungan
rangkan umba tingang tatu itah
sintung due.*

28 Kuan rawéi Kameluh Tempun
Hendan Bulaú kuā:

*Iyoh, naraí bulan kasalā. Pajing
bitim.*

Yē Raja Duhung Bulaú tulak mangilaú
bajang kalingkaí lawung, palus kakare
taluh je puna palin bambang penyang
uluh tingang tatū Mangku Amat Sangen
ewen due Nyai Jaya Sangiang. **29** Kueh
balandung tahi, karamahan dumah Raja

Duhung Bulaú. Sukup taluh dinū uras palin bambang penyang Mangku Amat Sangen ewen due Nyai Jaya Sangiang, palus nyahuā uluh bulan betaúā Kameluh Tempun Hendan Bulaú pakasak rangkan panginan simpan. **30** Dia umbet ije kahaliman pinang, masak rangkan panginan simpan. Yē palus surung-basurungan akan uluh tingang tatū sintung due, pajing nyurung mangantihan kuā:

Dia memen tingang tatu, rangkan panginan simpan tuh uras kabajuran, jatun buah palin bambang penyang ketun sintung due.

31 Raweí Mangku Amat Sangen ewen due Nyai Jaya Sangiang

Iyoh tingang esu.

Yē palus nyumput hakananan rangkan panginan simpan. Sinde nyumput eleh sapangitik sapangandang bitī, harandue nyamputā hijir hapangasa balitā, hantelu nyumput palus saluh sawak bambang penyang ewen sintung due. Lambaran balaúā basaluh nyalupu ueí rantihan tingang, bawak matā basaluh nyalupu bua pinang sarayung lewu, darung pindingā basaluh nyalupu dawen sirih jarenang, kasingā basaluh nyalupu baliung bangka, jelā basaluh nyalupu dawen sawang bulaú sangkalemu, untekā basaluh nyalupu ketuk, bangkong takulukā basaluh nyalupu bua katilambang nyahu, uhata basaluh nyalupu tengang bulaú sangkalemu, silū basaluh nyalupu bendang bulaú sangkalemu, tulang lawas paī basaluh nyalupu tabalien lantang penyang, tulang kahangā basaluh nyalupu sanaman jangkarang, sulaú ututā basaluh nyalupu pisih

memang, isī basaluh nyalupu petak sintel atawā petak kasambuyan tambun, dahā basaluh nyalupu danum, tulang tunjukā basaluh nyalupu lamiang bua garing belum, tahasengā basaluh nyalupu riwut, upak pupusā basaluh nyalupu kapas bulaú sangkalemu raja, puserā basaluh nyalupu garanuhing bulaú, balengkung tingangā basaluh nyalupu bakam batu sariampung tuhan, rombak urungā basaluh nyalupu baputan nyarung hiang, tuntang salumpukā mijen garing nganderang sukah lumpung matan andaú. **32** Kakare taluh je kajadian bara bitī bereng Mangku Amat Sangen ewen due Nyai Jaya Sangiang, uras basalupu umba ain uluh Pantai Danum Kalunen, manjadi panataú panuhan panakan Raja Bunu palus katatahī. **33** Tinaí panyalumpuk Mangku Amat Sangen ewen due Nyai Jaya Sangiang, manatap palus bakandung mijen garing nganderang sukah lumpung matan andaú, je belum ninggang Tasik Kaharingan, tinaí parungā iete Parung Kurik Bungking Garing, tuntang je tau hasupa umba ewen sintung due iete tikas Raja Tunggal Mama Turun Bulaú Apang Tuju Samar Tuang, Raja Tunggal Sangumang. **34** Limbah te tinaí Ranying Hatala nuntun taluh handiaí je patut ilalus mahapan aran panyalumpuk ewen sintung due, hayak mukeí kuasā, manjadian taluh je bara berengā manjadi kambang garing, je inyewut palus ingutak “*Ehem*”. **35** Auh kutak je inyewut “*Ehem*” jetuh gagenep katamparan uluh munduk manawur behas, mampisik gana huang gangguranan aran panyalumpuk Mangku Amat Sangen ewen due Nyai Jaya Sangiang, mingat tamparā je asalā bara Ranying Hatala.

36 Kalute ampin kahandak Ranying Hatala manjadian kakare taluh handiaí akan ulun kalunen panakan utus Raja Bunu, uka ewen tau-tau mahaga kakare panataú panuhan je manjadi eka bambang penyang Mangku Amat Sangen ewen due Nyai Jaya Sangiang te basalupu, mangat iē tau mait jaya huang pambelumà.

41 Bawi Ayah hadurut bara Lewu Telu nanturung Pantaí Danum Kalunen

1 Amun anak esun Raja Bunu je jadi ilaluhan akan Pantaí Danum Kalunen jadi sapuluh tilap, sapuluh turu katahī, te ampin ewen puna laya-layaú pangingatà malalus kakare ajar bara Ranying Hatala je tumun ampin gawi intu Lewu Kaleka Bukit Batu Nindan Tarung Rundung Kereng Angkar Bantilung Nyaring. **2** Amun kalute ampin kakare taluh handiaí huang pambelum anak esun Raja Bunu mijen Pantaí Danum Kalunen je jadi uras nalingu kakare ajar Ranying Hatala, te Ranying Hatala hamaui hayak nyahuan Raja Uju Hakanduang Kanaruhan Hanya Basakati, uka hadurut nanturung Lewu Telu Kalabuan Tingang Rundung Epat Kalehulun Talawang. **3** Sana Raja Uju Hakanduang jadi sembang Lewu Telu, te uluh are uras hakampeleng. Hete Raja Uju Hakanduang hamaui janjaruman panalataí anak esun Raja Bunu huang Pantaí Danum Kalunen je are dia mingat ampin kakare peteh Ranying Hatala metuh tiwah suntu tatu tantaulang bulaú intu Lewu Bukit Batu Nindan Tarung. **4** Raja Uju Hakanduang janjaruman peteh tuntang auh bara Ranying Hatala je manyahuan uluh Lewu Telu manatap manyadia

arep ewen, uka hadurut nanturung Pantaí Danum Kalunen, majar buyut entah Raja Bunu, sama kilaú Ranying Hatala je jadi manyahuan Raja Uju Hakanduang malalus kakare gawi katika tiwah suntu intu Lewu Bukit Batu Nindan Tarung taharep Raja Bunu. **5** Kuan Raja Uju Hakanduang:

Kakare ketun je muhun te kareh, manumun peteh Ranying Hatala iete Raja Tunggal Sangumang, Raja Mantir Mama Luhing Bungaí, tuntang Raja Linga Rawing Tempun Telun. Ketun majar ampin talatah gawin balian, bara balian tantulak dahiang baya, balian manyaki, balian mambuhul, balian balaku untung, tuntang kakare ajar je beken kea. 6 Ketun majar ewen nampara bara gawi je pangkakurikà sampaí gawi je pangkahaí, kilaú ampin ketun je manarima ajar bara Ranying Hatala huang taharep Raja Bunu intu Lewu Bukit Batu Nindan Tarung. 7 Kalute kea Raja Duhung Mama Tandang, ikaú kareh majar anak esun panakan Raja Bunu huang Pantaí Danum Kalunen, ampin talatah gawin balian tantulak ambun rutas mateí, talatah mariaran banama nyahu, tuntang kakare gawi je beken kea, huang gawi pampateí bara je kurik palus je hai, sama kilaú Ranying Hatala majar Raja Bunu huang taharep ketun handiaí intu Lewu Bukit Batu Nindan Tarung hemben huran. 8 Tinaí ikaú Raja Linga Rawing Tempul Telun, Telun Mama Tambun Bunu, tuntang

Hamparung Apang Kadayun Lanting, uka ketun majar ampin talatah gawi hanteran, kilaú auh Raja Pampulaú Hawun je mandukan usuk garantung, hasukah duhung tuntung enteng, bandung karungkung mangkepan sampulaú dare, iē naturan taluh handiaí, palus kea ampin talatah gawi tiwah tuntang je beken, sama ih kilaú ampin gawi tiwah suntu intu Lewu Bukit Batu Nindan Tarung. ⁹ Kalute kea ewen je beken, kilaú Raja Garing Hatungku, Nyai Endas Bulaú Lisan Tingang, Nyai Inaí Mangut, uka ketun kareh majar anak esun panakan Raja Bunu manyadia ampin kakare paramun gawi je beken, manampa katupat, kambungan, tetat sanggar, palangka, tuntang paramun gawi je beken, bara je kurik palus je hai, manumun kakurik tuntang kahain gawi, kalute kea ampin parabeā. ¹⁰ Ketun majar ewen ampin kakare gawin uluh belum, bara malalus gawi lunuk hakaja pating, handiwung kanyurung pusu, luas anak, tuntang kare ampin gawi je beken kea, ilalus awi ketun sama kilaú ampin kakare gawi je jadi ilalus akan ketun manumun peteh Ranying Hatala intu Lewu Bukit Batu Nindan Tarung hemben huran. ¹¹ Amun ketun tuh kareh hadurut nanturung Pantaí Danum Kalunen, Ranying Hatala akan mananggare aran ketun bagare Bawi Ayah, rimā ketun te kareh je pangkasulakà majar uluh bawi malalus gawi pampalian huang Pantaí Danum Kalunen, tuntang

amun Bawi Ayah kareh jadi majar uluh bawi balian, te ketun inanggare tinaí bagare bawin balian.

12 Limbah ewen hapeteh raweí uras jadi barasih, te Raja Uju Hakanduang mameteh tinaí umba Raja Ungkuh Batu Tuhan Jenjang Liang, uka iē helu hadurut nanturung Pantaí Danum Kalunen, manampayah huang kueh eka je tau rasuk pakat bahum uluh Lewu Telu hinje buyut entah Raja Bunu, je jadi tahi mijen Pantaí Danum Kalunen.

13 Amun Raja Uju Hakanduang uras jadi maatuh kakare taluh handiaí je manumun auh peteh bara Ranying Hatala, te ewen sintung uju gandang halalian buli Lewu Bukit Bulaú Kangantung Gandang, Rundung Kereng Rabia Nunyang Hapalangka Langit.

14 Limbah te Raja Ungkuh Batu hadurut, nyamah banyelu-nyelu katahī mangumbang petak danum, palus jatun iē manyupa lewu huma, petak danum je tau uluh Pantaí Danum Sangiang belum hinje umba uluh Pantaí Danum Kalunen. **15** Mangkeme kalute, Raja Ungkuh Batu Tuhan Jenjang Liang madu gandang halalian buli Lewu Telu. Kilen kea jalanā handak buli, iē sembang tantan Bukit Samatuan. **16** Hete Raja Ungkuh Batu Tuhan Jenjang Liang mendeng tampajahan ngaju nampaliaú ngawa, yē taratuntū atun pahalendang batang danum puna lenda-lendang sinde, tuntang huang kabentengan batang danum te atun kea pahalendang ije lewu je bahalap tutu ampī. **17** Bara hunjun tantan Bukit Samatuan, Raja Ungkuh Batu Tuhan Jenjang Liang palus masuh rahunan batang danum je hai pahalendangà, te

nanturung lewu je taratuntun awī puna bahalap ampī, andaú te jadi hamalem iē sembang lewu te palus mangahaú uluh huma balaku uap. **18** Sana uluh huma nahingan atun uluh balaku uap, te uluh huma nyahuan iē tame, palus ewen pander sarita, hayak misek bara kueh pandumah uluh te, eweh arā, tuntang akan kueh batang jalanā. Kuan Raja Ungkuh Batu Tuhan Jenjang Liang janjaruman janjulanā:

Aku tuh uluh bara Batang Danum Jalayan, Lewu Telu Kalubuan Tingang, tuntang gangguranan arangkū iete bagare Raja Ungkuh Batu Tuhan Jenjang Liang.

Bara katika jete uluh lewu mananggare arā bagare Ongko Jalayan. **19** Ongko Jalayan janjaruman janjulanā, iē jadi mangumbang ngurah Pantaí Danum Kalunen, manggau petak danum, lewu huma je rasuk hayak bahalap eka uluh Pantaí Danum Sangiang tau belum hinje hapakat umba ulun Pantaí Danum Kalunen. Kuan Ongko Jalayan:

20 Ampī hindaí atun je tau rasuk. Huang jalanangkū gandang halalian buli akan Pantaí Danum Sangiang, aku sembang ije tantan bukit, palus mandengan intu tantan bukit, je bagare Bukit Samatuan arā, hayak aku tampajahen ngaju nampaliaú ngawa, eleh taratuntungkū ije batang danum tuntang ije lewu je hai pahalendangà, datuh pahalingeí. Te bukū aku tuh dumah manalih ketun. Naraí aran lewu jetuh?

21 Te uluh huma palus janjaruman aran lewu ewen:

Lewu Tutuk Juking, tuntang aran batang danum jete bagare Batang Danum Kahayan. Ikeí nampara mangkalewu hetuh iete bara katika tatu hiang ikeí huang Lewu Bukit Tambak Raja sampalangan nampahendeng Parung Hai Ngimai Lumpung Matan Andaú maja Pantaí Danum Sangiang.

22 Limbah te tinaí Ongko Jalayan palus janjaruman peteh Ranying Hatala je jadi inyampaí hajamban Raja Uju Hakanduang, awi uluh bara Lewu Telu dia pire katikā tinaí hadurut nanturung Pantaí Danum Kalunen, je tantaí majar ulun kalunen kilaú gawin Raja Uju Hakanduang majar uluh Lewu Bukit Batu Nindan Tarung hemben huran taharep Raja Bunu palus kakare garing tarantangà.

*23 Hetuh aku atun karamahan dumah malalus peteh mandehen Ranying Hatala, awi kare buyut entah Raja Bunu je jadi mijen Pantaí Danum Kalunen tuh ampī jadi are kalapean ampin kakare peteh Ranying Hatala katika malalus tiwah suntu intu Lewu Bukit Batu Nindan Tarung hemben huran, tuntang limbah aku tuh kareh, atun tinaí uluh Lewu Telu hadurut nanturung lewu tuh. Ewen te kareh je mampahendeng mangun balaí, manampa kare hejan, batang talian. **24** Huang katika te kareh, ketun uras intehaú dumah. Kalute kea kakare raja, nyai, kameluh, putir, dambung, patih, panakan Raja Bunu, uka dumah umba mandinun ajar bara Bawi Ayah. Ewen te iete bagare Raja Helu Maruhum Usang, Raja*

Sariantang Penyang, Kameluh Rangkang Sangiang, Raja Landa Bagadung Batu, Raja Sina Bakuncir Panjang, Raja Siam Tempun Tambaku Mangat, Raja Kaling Babilem Pamungkal Garantung, Raja Pait Panuang Balanga, Raja Jampa Panuang Balanga, Garahasi Minton Panuang Badil Tambun, Nyai Siti, Diang Lawaí, Nyai Bitak, Nyai Banun, Raja Malayu Batatupung Bulaú, Patih Rumbih, Dambung Mangkurap, tuntang Patih Dadar.

25 Limbah hakutak kalute, Ongko Jalayan palus lilap dia katawan tintu dari. Uluh Lewu Tutuk Juking paham hengan angatà, akan kueh pandari Ongko Jalayan te, dia ewen handung hakatawā. Pehe tutu ateí ewen mite kajadian je kalute ampī. Kapadahal Ongko Jalayan jadi gandang halalian buli Batang Danum Jalayan, Lewu Telu Kalabuan Tingang.

26 Umbet jadi katahin andaú Ongko Jalayan janjaruman akan uluh Lewu Tutuk Juking, te huang benteng hanjewu, metuh ewen are mananjung kumbang batiliung akan ngaju akan ngawa, belahà metuh manampa jalanā malan, malauk mambilis, satiar bausaha, te salenga atun auh je manampa hengan ewen. **27** Tarahining auh taluh je guhu-guhup, letu-letus sinde auhà bara ngambu. Ewen uras nampayah akan ngambu, te salenga taragitan ewen taluh je duru-durut ampin tampayahà bara ngambu, palus muhun tende intu bentuk Lewu Tutuk Juking. **28** Harun ewen katawā tinaí, jete je inyewut palangka bulaú lambayung nyahu hadurut bara Lewu Telu, inambakas awi Raja Tunggal

Sangumang, Raja Linga Rawing Tempun Telun, Raja Duhung Bulaú Sahawung Bulaú Tempun Buang Penyang. Ewen te hadurut mangun balaí eka ewen majar ulun kalunen balian, palus sukup kea ampin kakare gawi je beken. **29** Kueh pire katahī pangun balaí te jadi, hayak hai tutu pahalendangà, eka Bawi Ayah kareh mijen, amun ewen majar ulun kalunen. Limbah te tege kea ije balaí eka ewen nantuar, tuntang balaí te paham hai kea pahalendangà, sukup kare hejan, pakang, tuntang batang taliā. **30** Amun kakare gawin balaí te uras jadi, te Raja Duhung Bulaú Sahawung Bulaú Tempun Buang Penyang, atun mimbul pinang tawar je palus belum bahalap tutu intu balikat balaí te. Limbah te Raja Duhung Bulaú Sahawung Bulaú Tempun Buang Penyang palus janjaruman tinaí akan uluh sahapus Lewu Tutuk Juking kuā:

Amun pinang tawar tuh kareh jadi nampara mamua, hete ikeí bara Lewu Telu akan karamahan dumah, palus nampara nantuar kakare gawi je manumun ampin ketun belum.

31 Limbah te tinaí Raja Duhung Bulaú Sahawung Bulaú Tempun Buang Penyang gandang halalian buli nanturing Lewu Telu. Amun jadi umbet katahī pinang tawar je imbul awi Raja Duhung Bulaú Sahawung Bulaú Tempun Buang Penyang nampara mamusu, mamotok, hayak mamua labat, te palus hadurut Bawi Ayah nanturing Lewu Tutuk Juking.

32 Ewen jadi sembang Lewu Tutuk Juking, te ewen handiaí je inyewut Bawi Ayah nampara nantuar ulun

kalunen balian, bara gawi je pangkakurik palus gawi je pangkahaī, kalute kea manampa kare katupat, sukup saregep manumun ampin gawi, hayak ewen kea nantuar ampin uluh maatuh kabalumā belum, maatuh kakare gawi-gawiā. **33** Huang katika Bawi Ayah nantuar ulun kalunen balian, hete ewen mambagi arepā. Inai Mangut, Inai Oring, tuntang Inai Kamandaī, manalih hila jalayan hulu danum, ewen nantuar mahapan auh kutak uluh Batang Danum Karimoī, awi te bukū uluh hulu batang danum mahapan kutak Karimoī atawā Ut Danum. **34** Limbah te tinaī je nantuar hila benteng Batang Danum Kahayan palus akan hila tumbangā, iete Raja Garing Hatungku ewen due Nyai Endas Bulaū Lisan Tingang, tuntang ewen je beken kea. Awi te tamparā atun Kutak Sangiang je ihapan awi uluh Pantaī Danum Kalunen je inyewut kutak utus batang petak. **35** Bara auh pander tantuar Bawi Ayah akan utus uluh batang petak, panakan Raja Bunu je atun huang Pantaī Danum Kalunen, amun ewen malalus kakare gawi, ewen mahapan bawin balian. **36** Awi te tamparā huran intu Pantaī Danum Kalunen tuh tege bawin balian. Sasasasar umba katahī, uluh bawī dia hindaī malalus gawi je babehat. Yē inangkiri tinaī mahapan balian hatue, palus wayah jetuh, je inyewut hatuen balian atawā basir balian.

37 Tinaī akan panakan anak esun Raja Bunu je belum natap-nayap manyuang petak danum, sungeī saka, atun hakabeken ampī malalus kakare gawi-gawiā. Jete awi manumun ampin kapatutā huang eka mijen. **38** Amun itah nampayah huang Batang Danum

Katingan, ewen malalus ampin gawin aī manumun ekā mijen, Batang Danum Kapuas malalus ampin gawin aī manumun ekā mijen, kalute kea Batang Danum Barito, Batang Danum Kapuas Buhang, Batang Danum Mantaya, Batang Danum Kumaī, Batang Danum Jelaī, Batang Danum Mahakam, Batang Danum Lamandaū, tuntang are kea batang danum je beken, uras malalus ampin gawī hakabeken tumun ekā mijen. **39** Je badehen tutu manumun je iajar sulakā awi Bawi Ayah iete huang ewen je mijen Batang Danum Kahayan, tuntang jatun kahubahā kilaū kakare gawi tumun auh ajar Ranying Hatala hemben huran je hajamban Raja Uju Hakanduang intu Lewu Bukit Batu Nindan Tarung, palus inangkaluli awi Bawi Ayah intu Lewu Tutuk Juking.

40 Tuntang tinaī Bawi Ayah maningak majar panakan utus Raja Bunu, bara ampin kare kutak pander, hadat basa, budi basara, maja barusik kulā bitī, uras mahapan hadat basara je bahalap. **41** Jakaī atun je sala kare kutak pander, talanjur pahalawu raweī, sala hadat basarā umba kulā, umba bawī tabela, jete iē buah singer, butang dandan kasalā. Mani-manih amun sala gawi-gawiā, tingkah lalangā, nyamah mangapehe kulā bitī, nakaū nyuhuk ramun kulā, jete paham hai singer dandan kasalā. **42** Kalute kea amun uluh kawin babane, ela sama sinde je atun auh kasalan huruī rinting. Awi te bukū amun atun kahandak madu anak jariā akan halumpat hajakat, hasanger hingat, helu-helu atun pangumbang auh bara hila je hatue. **43** Amun atun je kawin hasansala huruī rinting, jete bagare tulah atawā pali arā. Gawi je kalute mampatulah petak danum, atawā

manampa palin petak danum. Awi te ewen je manampa katulah, iē mampateí manuk, bawuí, sapi, hadangan, hapā manyaki petak danum, kayu lakaú, mangat kapali tulah sahu dia tau manjadi buah petak danum, bahu lakaú. Amun dia malalus jete, te kare bua dia tau mamua bahuruí, kalute kea pamalan dia tau bahasil. **44** Awi te puna ela sama sinde utus panakan Raja Bunu mawi gawi je sala, papa, sala huruí rinting, sala kutak pander, tingkah lalangà umba kulā bitī. Keleh belum bua-buah, tau-tau mahaga kare petak danum, taluh je belum hunjun petak, tuntang kare taluh je belum huang danum, taluh je jadi inyadia awi Ranying Hatala akan Pantaí Danum Kalunen.

45 Amun kakare gawin Bawi Ayah te uras jadi, tuntang katahin ewen huang Pantaí Danum Kalunen tanggar nduan uju nyelu, te ewen tinaí gandang halalian buli Lewu Telu Kalabuan Tingang, Rundung Epat Kalehulun Talawang, buli Pantaí Danum Sangiang, hayak te kea manandak mananggare aran lewu je eka ewen majar bagare Lewu Tanjung Nyahu, Rundung Karangan Penyang, palus batang danumà bagare Batang Danum Nyahu Maruang Duhung, Guhung Pintih Tambarirang Nahasak Hanyi, tuntang nampara bara katika jete ulun kalunen manyewut Ranying Hatala bagare Ranying Hatala Langit, Raja Tuntung Matan Andaú, Tuhan Tambing Kabunteran Bulan, Jata Balawang Bulaú, Kanaruhan Bapager Hintan.